

萬有文庫

第一集一千種

王雲五主編

四庫全書總目提要

(七十三)

永瑢等撰

商務印書館發行



要提目總書全庫四

(七十三)、
撰等塔永

四庫全書總目提要

卷一百八十三

集部三十六

別集類存目十

【耐俗軒詩集三卷】直隸總督採進本 國朝申頤撰。頤字敬立，廣平人。副榜貢生。明太僕寺丞佳允之孫。涵光之姪也。涵光所著聽山集，以杜甫爲宗。頤詩則惟作古體，無近體。古體又皆五言，無七言。大抵源出阮籍、詠懷、陳子昂、張九齡，感遇多託意寓言之作。而其運思取徑，又出入於黃庭堅、蘇軾之間，頗爲拔俗。然其間或有縱筆一往，傷於快縱者；或有故以波峭取姿，掩抑示意，傷於纖佻者；或有太涉理語，傷於實相者。瑕瑜互見，尙未能一一超詣也。

【一漑堂詩集一卷】江西巡撫採進本 國朝余光耿撰。光耿字介遵，婺源人。康熙初諸生。江南通志作康熙乙酉舉人。案光耿之父懋衡，爲明萬曆壬辰進士。距康熙乙酉凡一百一十四年，斷不相及。非順治乙酉之謬，即別一人同姓名也。懋衡與鄒元標、馮從吾等講學同罹黨禍。光耿承其父教，淡泊自守，故詩格亦樸實平近，不尚藻采。其拆貧字口號所云：「有分宜安分，營財本乏才。」乃里巷字謎之詞，尤不宜入集也。

【尋壑外言五卷】浙江巡撫採進本 國朝李繩遠撰。繩遠有姓氏譜，已著錄。是集詩二卷，文三卷。其詩

格意頗清文亦謹飭近人集中之有法度者然束於邊幅未能凌踔古人也。

【陽山詩集十卷】浙江巡撫採進本 國朝陳炳撰炳字虎文長洲人居陽山裘巷里因以自號是集分青桂巖稟潤州草風蓬吟楚遊草始閒吟寶華山稟蕉雨閒房寓中稟簷鈴集仙人塘上吟竺陽遺藁凡十集大致妥帖而頗乏遒警黃中堅作傳稱其少時有松頂紅雲拖綠上山腰白鳥破青飛之句山是知名然二語實卑俗非詩家上乘不知當時何以傳誦也。

【黃葉村莊詩集十卷】浙江巡撫採進本 國朝吳之振撰之振字孟舉石門人以貢生授中書科中書常選宋詩鈔行世故其詩流派亦頗近宋人是編凡初集八卷後集一卷續集一卷

【白漢文集四卷】江西巡撫採進本 國朝沈受宏撰受宏字台臣太倉人所居地名洗白漢故以名集江南通志載受宏白漢集十卷而此本止四卷核其目錄亦無闕佚殆後人汰削之本耶

【璇璣碎錦二卷】安徽巡撫採進本 國朝萬樹撰樹字紅友宜興人是集皆迴文詩圖上卷三十幅下

卷二十幅各以名物寓題組織頗巧然亦弊精神於無用之地矣蘇若蘭事不可無一亦不必有二也

【強恕堂詩集八卷】山東巡撫採進本 國朝高之驥撰之驥字仲治淄川人侍郎珩之子也詩學西崑香奩之體委致有餘放陶孫謂秦少游如時女步春終傷婉弱於淮海集非確評移評此集則確矣張篤慶序謂詩無定法與年俱進將又有老健於是者亦可謂婉而章也

【芙蓉集十七卷】兩江總督採進本 國朝宗元鼎撰元鼎字定九號梅岑江都人嘗從王士禛學詩漁洋詩話稱其詩以風調勝酷似才調集又稱其緣情綺靡不減西崑丁卯蓋其所取法者如此前有鄒祇

謨序謂其憔悴江濱，挂戶高吟，年已四十，猶在捉鼻時。則此集所編，皆其少作也。凡樂府一卷，古體詩三卷，律詩四卷，排律二卷，絕句二卷，詞一卷，賦一卷，雜文三卷。元鼎弟之瑾爲之箋註，頗傷冗贅。其以詩餘居賦雜文之前，亦之瑾編次之失也。

【不礙雲山樓彙】無卷數 江蘇周厚增家藏本 國朝周綸撰。綸字鷹垂，華亭人。周茂源之子。康熙初，以貢生官國子監學正，受業王士禎之門。士禎作居易錄，稱爲才士不偶者是也。是編詩文以體分，詞以小令中調長調分，皆不題卷數，亦無目錄及序跋。似爲刊刻未竟之本。

【重知堂詩二卷】兵部侍郎紀昀家藏本 國朝趙善慶撰。善慶字怡齋，德州人。由貢生授國子監助教，官至金華府知府。嘗學詩於新城王士禎。是集即士禎所點定。前有士禎序，稱其妙在本色，頗爲得實。惟序稱論次都爲一卷，而此本實二卷。又稱善慶將赴官國學，而下卷有歸田之作。殆後復續刻，而序則未追改歟。

【寵壽堂詩集三十卷】浙江巡撫採進本 國朝張競光撰。競光字覺菴，杭州人。其詩每首之後，評語雜還，殆於喧客奪主，蓋猶明季詩社之餘習也。

【雪菴詩存二卷】浙江巡撫採進本 國朝丁嗣徵撰。嗣徵字集虛，嘉善人。性嗜古，喜藏書，又頗耽心禪悅，故其詩格在宋元之間，亦時時有清逸之致。嘗自訂其集十卷，與巨硯同局笥中。爲盜者誤持去，購之不獲，乃掇拾殘剩，重輯此集，故名曰詩存云。

【天外談四卷】安徽巡撫採進本 國朝石龐撰。龐字天外，太湖人。詩文皆纖灰佻巧，墮入魔趣。惟迴文

雪賦一首春賦一首爲自古所無之格蓋小有才而未讀書聰明過於學問者也至遊春賦之每句用一部偏旁之字則彌無可取矣

【復園文集六卷】浙江巡撫採進本 國朝董聞京撰聞京字丹鳴烏程人康熙初官吉安府知府是集皆所作雜文自序謂明理以端其源博學以廣其識尊經以正其歸養氣以覈其實和聲以發其華持論甚高然核其所作不能出公安竟陵門戶也

【章江集五卷】內府藏本 國朝安世鼎撰世鼎字鑄九錢紅旗漢軍由保德州知州官至江西巡撫此集乃世鼎自輯歷官奏疏以及文移條告諸篇編爲是集後附以書記序二十一篇皆在江西時所作也

【尺五堂詩刪六卷】浙江巡撫採進本 國朝嚴我斯撰我斯字存菴歸安人康熙甲辰進士第一官至禮部左侍郎其詩近體最富古體僅十之二三大抵長於華贍之作湯惠休所謂如鍍金錯采亦雕繪滿眼者也

【讀書堂集四十六卷】江蘇巡撫採進本 國朝趙士麟撰士麟雲南河陽人康熙甲辰進士官至吏部侍郎是集爲士麟所自編凡語錄四卷文十七卷詩二十一卷條約四卷大抵應酬之作冠以序一卷題詞一卷密行細字凡八十二頁裒然自爲一巨冊亦向來刻集者所未有也

【珂雪詩】無卷數 山東巡撫採進本 國朝曹貞吉撰貞吉字升六號實菴安邱人康熙甲辰進士官至禮部員外郎初王士禎有十子詩略之刻貞吉與焉因其版分藏各家故往往各以別本單行後其曾孫益厚即士禎所錄附以朝天鴻爪黃山紀遊等集總顏之曰珂雪詩貞吉詩格遒鍊其黃山諸作極爲

宋肇所推在京師時和其文姬歸漢圖等長歌極有筆力今檢集中不載又士禎感舊集所選登望海樓吳山晚眺金山諸詩亦皆不見集中則全橐之散失者多矣

【九谷集六卷】兩江總督採進本 國朝方殿元撰 殿元字蒙章九谷其別號也番禺人康熙甲辰進士歷官鄭城江寧二縣知縣是集凡樂府二卷諸體詩二卷雜文一卷末卷爲環書上下篇附以四書講語數則其環書下篇多發明易義蓋亦雜家流也

【戒菴詩存一卷】浙江巡撫採進本 國朝邵遠平撰 遠平本名吳遠字戒三仁和人康熙甲辰進士官至光祿寺少卿己未詔試博學宏詞授翰林院侍讀官至詹事府少詹事此集首行下署曰京邸集自序謂己未再入京五載內所作多典禮紀頌之章酷摹唐音頗見宏贍長洲韓葵序謂其使粵時唱酬甚富別爲集以行於世則此卷乃其全集之一種耳

【雪園詩集八卷】編修鄭際唐家藏本 國朝梁珪撰 珪字至鉉號雪園福建長樂人是集前有其友袁免序作於康熙甲辰其詩凡分六集一曰靈峯草二曰江南遊草三曰循陔草四曰楚遊草五曰江西遊草六曰恆山遊草惟靈峯循陔二草爲居家奉母時所作餘皆其客遊南北登覽山川之什也

【健松齋集二十四卷續集十卷】浙江巡撫採進本 國朝方象瑛撰 象瑛有封長白山記已著錄是集象瑛所自編凡文十六卷少作及入翰林以後之作悉在焉十七卷以下爲詩集秋琴閣詩一卷刻於康熙己未少作也展臺詩鈔二卷展臺燕昭王展禮賢士之臺即金臺而變其名也錦官集二卷康熙癸亥典試四川所作時蜀亂始平補行鄉試故以癸亥行也舊遊詩一卷未仕時遊鄴遊燕遊越遊楚作也萍

留草一卷。國初浙閩未定時避兵杭州時作也。都門懷古詩倦還篇共一卷。都門懷古詩作於辛酉官翰林時。倦還篇則乞假歸里時作也。其編次不以作詩年月爲先後。不解其意。續集六卷。刻於康熙壬辰。凡文八卷。詩一二卷。詩題曰所之草。皆歸田以後作也。

【百尺梧桐閣集二十六卷】兩淮馬裕家藏本 國朝汪懋麟撰。懋麟字秀角。號蛟門。江都人。康熙丁未進士。授祕書院中書舍人。官至刑部主事。其詩法傳自王士禎。而才氣縱橫。視士禎又爲別格。趙執信談龍錄記。嘗見其浯溪中興頌詩起句云。楊家姊妹顏妖狐。即擲去不視。謂頌中興而自天寶致亂。叙起雖萬言不難辦也。雖以懋麟爲新城弟子。借懋麟以攻士禎。未免操之已蹙。然亦足見其少所翦裁矣。

【學文堂集四十三卷】江蘇周厚堉家藏本 國朝陳玉璽撰。玉璽字廣明。號椒峰。武進人。康熙丁未進士。官中書舍人。是集雜文三十卷。詩八卷。詞四卷。其說經之文。及辨議諸作。亦頗有源委。不同勦說。然大致透迤。平行學宋格而未成。詩則更非所長矣。

【別本學文堂集四十七卷】浙江巡撫採進本 國朝陳玉璽撰。此本凡文四十三卷。詩十卷。詞三卷。總

五十六卷。然文集之中。有錄無書者九卷。實爲四十七卷。與前一本大同小異。然兩本皆無總目。疑皆隨作隨刊之本。非其全帙也。王晫今世說稱玉璽每讀書至夜分。兩眸欲合如綫。輒用艾灼臂。久之成痴。蓋亦苦學之士。又稱其所爲詩文。旬日之間。動至盈尺。見者遜其俊才。則貪多務博可知。宜其集不一本也。

【五經堂文集五卷語錄一卷】山西巡撫採進本 國朝范鄗鼎撰。鄗鼎有理學備考已著錄。是集皆各體雜文。本名草草。卷首有鄗鼎自序。文格酷摹尚書。雖本之夏侯元昆弟誥。然未免太近游戲。末附語

錄一卷乃其子翻搜輯諸刻書中鄙鼎評識之語彙成一帙因竝梓之實非鄙鼎自作亦非門人所記也
【柳村詩集十二卷】山東巡撫採進本 國朝董訥撰訥有督漕疏草已著錄其詩皆訥手自刪定因有別墅在平原城南二里名曰柳村遂以名集平原縣志稱康熙四十一年聖祖南巡駐蹕柳村之南樓詢訥詩集其子思凝續寫恭呈御覽殆即此本歟

【石屋詩鈔八卷補鈔一卷】浙江巡撫採進本 國朝魏璽徵撰璽徵字蒼石溧陽人康熙丁未進士官至邵武府知府此集即在邵武所刊第二卷爲西湖和蘇詩第七卷爲和白香山樂府其瓣香所在可以想見第五卷爲擬漢樂府雖未至於苦學妃豨而形骸之外去之轉遠蓋唐樂府重在諷諭其文章可以力追漢樂府重在音律其節奏不可以臆揣也第三卷爲閩行日記詩第四卷爲閩中吟第六卷爲漁山詩皆以地記第一卷與第八卷則總題曰雜詩補鈔一卷亦無標目大抵詩材清拔而根柢不深如曉行詩暗燈移附壁句自是束裝真景而刻畫瑣碎已入武功末派矣

【縱釣居文集八卷】江西巡撫採進本 國朝應是撰是有讀孝經已著錄是編皆所著雜文集中多載論策蓋康熙丁未改八比爲論策時所擬作其文多摹擬蘇氏父子辯論瀾翻而未免過求駿快遂剽而不留其他序記傳誌諸篇則欲擬其鄉人王安石而邊幅亦微狹焉

【慎修堂詩集八卷】福建巡撫採進本 國朝廖騰煃撰騰煃字占五號蓮山將樂人康熙己酉舉人官至戶部侍郎其服官頗著清節詩則尙未成家

【匏菴遺集三卷】兩江總督採進本 國朝石璜撰璜字夏宗別號匏菴如臯人是集爲其子伊等所編

據目錄當爲五卷而此本僅三卷蓋不全之本也。

【憺園集二十八卷】兩淮馬裕家藏本 國朝徐乾學撰。乾學有讀禮通考已著錄。乾學家富圖籍。聖祖仁皇帝購求遺書。乾學奏進十二部。其疏今在集中。近所藏雖已散佚。而傳是樓書目猶存於世。所著讀禮通考及續宋元通鑑長編皆闡通淹貫。確有可傳。集中考辨議說之類亦多與傳註相闡發。蓋乾學爲顧炎武之甥。而閻若璩諸人亦多客其家。師友淵源具有所自。故學問頗有根據。然文章則功候未深。大抵隨題衍說。不甚講求古格。賦頌用韻尤多失考。尙未能掉鞅詞壇。與諸作者爭雄長也。是集刻於康熙丁丑。據宋肇原序稱。尚有外集。今未之見。或此本偶佚歟。

【白石山房彙十三卷】江西巡撫採進本 國朝李振裕撰。振裕字維饒。吉水人。康熙庚戌進士。官至兵部尙書。是集凡詩三卷。文九卷。又附江南所作詩一卷。乃振裕督學江南時所刊。前有施世綸汪琬序。世綸序惟述政績。不及文章。琬序稱其工於臺閣之體。亦頗著微詞。

【別本白石山房彙二十六卷】浙江巡撫採進本 國朝李振裕撰。此本詩文各十三卷。與刻於江南者大同小異。前後無序跋。亦無目錄。不知何時所刻也。

【已畦集二十一卷原詩四卷】江蘇巡撫採進本 國朝葉燮撰。燮有江南星野辨已著錄。是集前有自序。論文章利病。頗爲有見。然檢閱集中諸作。則頗不逮其所言。至於意態波瀾。彼此重複。如聽松堂秀野堂二記。其尤甚者也。

【趙恭毅刺橐八卷附裘萼臘橐二卷】兩江總督採進本 國朝趙申喬撰。申喬字松伍。武進人。康熙庚

戊進士官至戶部尙書謚恭毅是編首奏議次序記次案牘之文終以雜著其孫侗穀所編也後附裘萼臘囊三卷則申喬之子熊詔撰熊詔康熙己丑進士第一官至翰林院侍讀裘萼其號也

【玉巖詩集七卷】福建巡撫採進本 國朝林麟焻撰。麟焻字石來莆田人康熙庚戌進士官至貴州提學僉事其詩法受自王士禎初官中書舍人時嘗偕檢討汪楫奉使琉球途中唱酬甚夥是編凡前集二卷皆初年所作又星槎草一卷中山竹枝詞五十首爲一卷皆出使時所作郊居集一卷則官提學後家居時作也自中山竹枝詞以前皆載士禎評點竹枝詞後又以當時同人贈別之作附焉

【孜堂文集二卷】內府藏本 國朝張烈撰。烈有讀易日鈔已著錄烈篤守朱子之說故集中多講學之文然如朱陸異同論王學質疑皆未免有鍛鍊周內之意不及其賈董同異論之持平蓋漢學但有傳經之支派各守師說而已宋學既爭門戶則不得不百計以求勝亦勢之不得不然者歟

【臨野堂文集十卷】兩淮馬裕家藏本 國朝鈕琇撰。琇有觚臘已著錄是集前有潘耒序盛推其四六之工今觀所撰疏雋頗勝近人而渾雅終不逮古人其外篇俳諧諸作如商陸侯傳之類則不可作也

【立命堂二集十三卷】安徽巡撫採進本 國朝嵇宗孟撰。宗孟字淑子山陽人官至杭州府知府是集前有康熙壬子沈珩序稱已刻賦若干卷詩若干卷文若干卷故又編爲二集計賦十二首詩四百三首文八十八首凡七卷其七卷以下附刻各種小集曰蠡史曰星路陽秋曰識小箋曰詩拇曰甌樂行舊錄各爲一卷又詩餘一卷曰酒古董蓋其時去明未遠故通體皆規摹鍾譚以幽冷纖巧爲宗觀諸集之名而其詩可見矣

【古鉢集選一卷】山東巡撫採進本 國朝王士祜撰。士祜字叔子，一字子側，號東亭，又號古鉢山人。山東新城人。康熙庚戌進士，未仕而卒。是集爲其弟士禎所編。其詩長於情韻。士禎序述計東之言曰：三王竝著詩名，西樵阮亭早達，故聲譽易起。若東亭之才，詎可作蜂腰哉？然自是士禎篤念友于，存此標榜之詞耳。其實士祿不及士禎，士祜不及士祿，天下之公評也。

【有懷堂詩文彙二十八卷】內府藏本 國朝韓菼撰。菼字元少，號慕廬，長洲人。康熙癸丑進士第一，官至禮部尙書。乾隆三十年賜謚文懿。是集爲菼所自編。凡詩六卷，分躡躅歸愚病坊，繫迷四集。文二十二卷，以制藝著名。其古文亦法度嚴謹。凡安章宅句，皆刻意研削，然其不能脫然於畦封，亦即在此。詩則又其餘事矣。

【蘋村類彙三十卷附錄二卷】編修徐天柱家藏本 國朝徐倬撰。倬字方虎，蘋村其號也。德清人。康熙癸丑進士，官至翰林院侍讀。聖祖南巡，進所纂全唐詩錄。晉禮部侍郎是集凡修吉堂文彙八卷、應制集二卷、寓園小草一卷、燕臺小草一卷、梧下雜鈔二卷、蘋蓼閒集二卷、甲乙友鈔一卷、汗漫集二卷、野航集二卷、鼓缶集三卷、黃髮集二卷、詞集二卷。耄餘殘瀋二卷。附錄其子元正遺彙二卷。一曰清嘯樓草，皆未第以前作。一曰鸞坡存草，則自入詞館以後，應制紀恩遊讌贈答之什也。元正字子貞，號靜園。康熙乙丑進士，官至工部尙書。徐氏五世翰林，倬其第二世。元正其第三世云。

【禮山園文集八卷】浙江巡撫採進本 國朝李來章撰。來章有連陽八排風土記，已著錄。是集摹倣歐曾，頗爲近似，以作意點綴，求姿故或失之微縟。中如李氏紫雲山莊記、辛公子傳諸篇，規撫古人，亦覺墨

痕未化謂之不失典型則可矣

【殘本經史緒言一卷】兩江總督採進本 國朝朱董祥撰 董祥有讀禮記略已著錄是編名似筆記 實則文集前有雜論數篇其餘多言居家禮制而喪禮尤多大抵執古義以繩今與所作讀禮記略相出入如居喪不當稱制之類一字之爭動輒累牘多非大義所關也其書題曰上卷則尚有下卷而佚之目錄列文四十七篇而闕其原學上大司農本政書教子晨讀詩說三篇蓋併此卷亦非完本矣

【南晦文集十二卷】江蘇巡撫採進本 國朝彭定求撰定求有周忠介公遺事已著錄案定求之學出於湯斌斌之學出於孫奇逢奇逢之學出於鹿善繼善繼之學則宗王守仁傳習錄故自奇逢以下皆根柢於姚江而能參酌朱陸之間各擇其善不規規於門戶之異同定求是集於文章之有關於學術者尤所留意而持論則兼採二家無所偏倚云

【寶齋堂詩稾四卷】直隸總督採進本 國朝張榕端撰 榕端有海岱日記已著錄是集爲榕端官內閣學士時所刊皆其康熙己未至己卯之詩前有任邱龐壻序稱其詩和而不迫秀而不纖逸有不肆宛轉纏綿一寫其胸中之趣而未嘗借以宣其喜怒不平之氣頗近其實然婉約有餘遂乏雄渾之氣深湛之思蓋其長在是其短亦在是矣

【河上草二卷】直隸總督採進本 國朝張榕端撰 康熙庚辰榕端以內閣學士預治河之役至癸未始召還此編皆其四年之中在工次所作前有宋犖序稱其泥塗櫟櫟健石沈薪卒以塞決乃殊不見其有歌咏勤苦之勞而往往道其達天適性之樂今觀其詩雖醞釀不深而和平恬靜犖言蓋不誣云

【蘭樵歸田稟一卷】直隸總督採進本 國朝張榕端撰 皆康熙甲申以後致仕歸里之作。其詩直抒胸臆，多入香山一派，蓋老境優游，頹然自放，不復以文字爲意矣。

【彭椒巖詩稟二十二卷】江蘇周厚培家藏本 國朝彭開祐撰。開祐字孝緒，號椒巖，婁縣人。康熙丙辰進士，官至武岡州知州。是集分四種：曰瞻雲稟，曰游琴稟，曰一螺稟，各六卷；曰橐丸稟，四卷；游琴一螺稟，丸三稟，皆其官河閒及游大梁濟南時所著。瞻雲稟，則其官武岡時所著也。

【旭華堂文集十四卷附補遺一卷續編一卷】山西巡撫採進本 國朝王冕曾撰。冕曾字元亮，別字思顯，號誠軒，山西太平人。康熙丙辰進士，官至湖廣道監察御史。是編爲其孫壻趙勳典所刊。凡奏議一卷，雜文十三卷，附以補遺一卷，則奏議二首并序文雜著八首也。

【通志堂集十八卷附錄二卷】江西巡撫採進本 國朝納喇性德撰。性德有合訂刪補大易集義粹言已著錄。性德生長華閥，勤於學問，鄉試出徐乾學之門，遂受業焉。九經解即其所刻，而徐乾學延顧渭校正之，以書成於性德，歿後版藏徐氏，世遂稱徐氏九經解。竝通志堂而移之徐氏，實相傳之誤也。是編爲乾學所裒輯，凡詩五卷，詞四卷，文五卷，綠水亭雜識四卷，又附錄碑誌哀輓之作爲二卷。

【翠滴樓詩集六卷】監察御史戈岱家藏本 國朝馮雲驥撰。雲驥字懿生，代州人。康熙丙辰進士，官翰林院編修。是集皆所作古今體詩，惟冠以賦一篇，殿以詞一闋。蓋雲驥沒後，其門人鹿祐所編，故掇拾殘牋所存，僅此云。

【兼山堂集八卷】浙江巡撫採進本 國朝陳錫嘏撰。錫嘏字介眉，號怡庭，鄞縣人。康熙丙辰進士，官翰

林院編修是集爲慈谿鄭梁所選錄。凡文六卷，詩二卷，頗不失矩度。然錫嘏本以制義擅長，此則其餘力及之者也。

【清芬堂存藁八卷】浙江巡撫採進本。國朝胡會恩撰。會恩字孟綸，德清人。康熙丙辰進士，官至刑部尚書。其館閣諸詩別編爲廣麗集，今未見傳本。是集所錄，則由丙辰至庚寅三十五年所作也。詩有清腴之致，而風骨未遒，故於一時流輩之中，尙不能排突諸家，自成一隊。

【蘧廬草一卷】兩江總督採進本。國朝黃鐘撰。鐘字宏音，號蘧廬，如臯人。康熙中諸生。是集爲其門人鄧士英所編。凡文四十四篇，前列總目。總目之後，仿史記自序漢書敘傳之例，每篇各爲之序述。所以立言之意，自有別集以來，茲爲創體。然亦足以見其文不苟作，必有所取義矣。其文大抵縱橫奇肆，自達所見，其與友人論文書，大旨主於不似古人，乃能爲古人，亦迥異貌擬秦漢詞雜齊梁之習。惟其文多作於明末，感觸時事，往往言之過當。如洪範論謂治世之天，甚願乎人之爲君子也；則所嚮在此矣。亂世之天，甚怒乎人之爲君子也；則所威在此矣。至終篇歸於順受其正，亦仍沿劉峻辯命論之旨，非和平中正之道。其楊墨論雖爲僞談，忠孝者發而以墨翟爲僞，楊朱爲誠，亦未免憤激太甚，大抵其才力足以馳驟古人，而學養之深醇，則未之逮也。

【西澗初集六卷】江蘇周厚培家藏本。國朝劉然撰。然字簡齋，江寧人。卷首有康熙戊午杜潛序，稱其詩文閑深奧衍，不可名狀。今觀斯集，殊不副斯言。其水中雁字七言律詩，用上下平韻，至三十首，亦太誇多，鬪靡以如是題目，作如是體裁，雖李杜不能工也。

【青門籠橐十六卷附邵氏家錄一卷青門旅橐六卷青門臘橐八卷】安徽巡撫採進本 國朝邵長蘅撰。長蘅一名衡，字子湘，武進人。是集乃其兄子璿等編次。康熙戊午以前爲青門籠橐詩六卷文十卷。己未訖辛未爲旅橐詩二卷文四卷。壬申後爲臘橐詩三卷文五卷。其邵氏家錄則以康節祠堂碑記之類彙爲一編者也。

【竹垞文類二十六卷】內府藏本 國朝朱彝尊撰。彝尊有經義考已著錄。是集乃其未遇時所刻。中有曝書亭所未錄者。皆悔其少作。自爲刪汰也。

【受祺堂詩集二十四卷】陝西巡撫採進本 國朝李因篤撰。因篤字子德。又字天生。富平人。康熙己未召試博學鴻詞。授翰林院檢討。顧炎武作音學五書。特載與因篤一札。蓋頗重之。閻若璩作潛邱劄記。則云杜造故事。莫過於李天生。然所謂杜造故事者。今不可考。則姑存其說矣。是集爲因篤所自定。本三十五卷。此本獨闕第四卷。目錄註云未出。其爲因篤自刪之。或爲隨寫隨刻。誤排卷數。不得已而立一虛卷。均未可知也。其詩大抵意氣蒼莽。才力富贍。而亢厲之氣一往無前。失於粗豪者。蓋亦時時有之。殆所謂利鈍互陳者歟。

【世恩堂集二十五卷】江蘇巡撫採進本 國朝王頊齡撰。頊齡號瑁湖。華亭人。康熙丙辰進士。己未召試博學鴻詞。授編修官至大學士。謚文恭。是編凡詩集三十卷。經進集三卷。詩餘二卷。頊齡值文治昌明之日。奏太平黼黻之音。故一時臺閣文章迥異乎郊寒島瘦。即早年未達時。作亦無衰颯哀怨之意。足以見其襟抱矣。

【深秀亭近草五卷】江蘇周厚培家藏本 國朝潘鍾麟撰。鍾麟字層峰，華亭人。是編皆七言律詩。前四卷爲乞酒之作。所投贈者凡二百六十五人。後一卷爲寄懷之作。所投贈者凡三十人。以大學士王頊齡戶部尙書王鴻緒爲冠。蓋借此以存其人。乞酒寄懷特假託之詞耳。

【遂初堂詩集十五卷文集二十卷別集四卷】江蘇巡撫採進本 國朝潘耒撰。耒有類音已著錄。詩分少遊夢遊近遊江嶺遊海岱遊台蕩遊閩遊黃廬遊楚粵遊豫遊臥遊諸草分年編次。文則各以體分。惟爲二氏作者入之別集。用楊傑無爲集例也。耒性好遊名山。足跡甚廣。其詩不事雕飾。直抒所見。古文蹊徑較平。稍遜於魏禧諸人。而氣體渾厚。空所依傍。則又耒所獨得也。耒家吳江之爛溪。少受業於顧炎武。頗得其傳。故詩文皆有原本。特其議論之文。往往反覆求快。太傷於盡。未免失之好辯焉。

【抱經齋集二十卷附焚餘草一卷】浙江巡撫採進本 國朝徐嘉炎撰。嘉炎字華隱，秀水人。康熙己未召試博學鴻詞。授翰林院檢討。官至內閣學士兼禮部侍郎。是集凡應制詩一卷。樂府一卷。古時四卷。律詩五卷。絕句二卷。玉臺詞一卷。賦頌一卷。論一卷。序三卷。雜文一卷。末附焚餘草一卷。乃嘉炎父肇森所作。遭亂散失。僅存二十餘首。嘉炎記而錄之。猶山谷集後附伐檀集意也。

【叢碧山房集五十七卷附詩義固說二卷】內府藏本 國朝龐壇撰。壇字霽公。號雪崖。任邱人。康熙己未召試博學鴻詞。授翰林院檢討。降中書舍人。終於建寧府知府。是集凡文八卷。雜著三卷。翰苑藁十四卷。舍人藁六卷。工部稿十一卷。戶部稿十卷。建州稿五卷。皆其所手自編定也。壇爲詩主於平正冲澹。不求文飾。當王士禛名極盛時。能文之士。率奔走門牆。假借聲譽。壇獨落落不相親附。故士禛亦不甚稱之。

惟記其病足詩切防美人笑蹙者春來不過平原門一絕而已然壇早歲所作頗得深婉清微之致晚年青華既竭流於枯淡其舍人稿不及翰苑工部藁不及舍人戶部藁不及工部至建州藁以後頽唐益甚田靈爲作戶部藁序以白居易陸游比之壇意頗慍然實箴規之言也末附詩義固說二卷論亦切實惟推衍嚴羽之說以禪談詩轉至於支離曼衍是其好高之過矣

【臥象山房集三卷附錄二卷】山東巡撫採進本 國朝李澄中撰 澄中有滇南日紀已著錄是編賦一卷文一卷詩一卷附滇南集一卷又良齋文選一卷安若訥爲作墓誌記其夢爲李攀龍後身趙執信亦稱其生而父夢攀龍入室故其詩仍學攀龍麗壇論文絕句則有壽光安子非知己強爲于鱗認後身句今觀其集頗不類滄溟體格是壇所論者爲允若訥執信皆好奇之論也

【白雲村集八卷】山東巡撫採進本 國朝李澄中撰康熙己未以召試入史館者澄中與龐壇交最契文格詩格二人往往互似是集即壇官建寧府知府時爲刻於福建者壇序稱王新城阮亭田德州綸霞壇坫久成於時望重龍門漁村入都與鼎足而立士林稱山左三大家然澄中詩文修潔有餘至魄力雄厚終非王田比也王士禎感舊集載其齊謳行三首細草谷一首此集皆未載又魚龍圖一篇亦與感舊集所載數字不同蓋壇與士禎門徑稍別故去取亦稍異也

【秋錦山房集二十二卷】江蘇巡撫採進本 國朝李良年撰 良年字武曾秀水人康熙己未嘗薦舉博學鴻詞初冒姓虞氏名兆潢故當時薦牘無良年名朱彝尊所作墓誌僅載其原名而未載其冒姓亦偶疎也是編凡詩集十卷詞二卷文集十卷良年少有雋才其游蹤幾遍天下所未至者秦蜀嶺嶠耳其詩

清峭灑落亦頗得江山之助惟自少至老風調不變其蹊徑之狹殆才分所偏歟文則長於議論而短於敘述不逮其詩詞則已刻入六家詞中者殆三分之二品在其詩文之間云

【別本蓮洋集二十卷】刑部員外郎張道源家刻本 國朝吳震撰震蓮洋集已著錄案王士禎作震墓誌稱其詩一刻於吳再刻於都下三刻於津門今皆未見趙執信懷舊詩序稱震以遺橐付王士禎震歿後將二十年其集未出疑士禎耄而忘之又稱池北藏書散失殆盡是集可知則震之原真似乎散佚近時乃疊出三本一爲臨汾劉組曾所刻一爲山東孫峨所刻一即此本爲浮山張體乾所刻劉本稱得自士禎門人黃叔琳家孫本及此本并稱得自震姪秉厚家皆以士禎評點相誇孫本並考核評語之同異此本更較量圈點之真偽考第七卷中畱別車全詩載士禎評曰今車全果領解中州此亦識也惜天章不及見耳灼爲震沒後之語則士禎所定或歸諸吳氏亦未可知也然士禎諸說部中所品題獎借者幾於指不勝屈今其集率久覆醬瓿無人重其姓名而震詩獨數刻而未已是知震詩足以自傳不以士禎始重也刻震集者反若借士禎以傳震然則使震不及識士禎即謂震詩不工乎三本之中劉本詳備於孫本此本又詳備於劉本要之詩之工拙不係篇帙之多少今繕孫本入祕閣而此本則存其目焉

學鴻詞其詩刻意摹杜然大抵在形似之間

【思復堂集十卷】浙江巡撫採進本 國朝邵廷采撰廷采字念魯餘姚人熙康初諸生嘗從毛奇齡遊是集刊於康熙壬辰以龔翔麟所撰墓誌邵思淵所撰墓表萬經所撰小傳冠諸編首

【徐都講詩一卷】浙江巡撫採進本 國朝徐昭華撰。昭華字亦曰昭華，駢加采之妻也。其父咸清與毛奇齡善。奇齡暮年里居，昭華從之學詩，稱女弟子。故有都講之目。是集即奇齡所點定，附刻西河集中者也。

【拙齋集五卷】浙江巡撫採進本 國朝朱奇齡撰。奇齡有春秋測微已著錄。其平生潦倒塲屋，老而不遇，刻意以古文自任，所作皆簡潔明鬯，無鉤章棘句之態，而邊幅不免於稍狹。

【張邇可集四卷】浙江巡撫採進本 國朝張遠撰。遠有杜詩薈粹已著錄。是集凡分三種。曰雲嶠集一卷，蕉園集一卷，梅莊集二卷。梅莊集兼載詩文。蕉園、雲嶠二集，則有詩無文。顧汎序謂其詩凡三變。蕉園最先，梅莊次之，雲嶠則官縉雲時所作，爲最後。三集格調皆與毛奇齡相近。蓋二人同里，得法於奇齡者多云。

【超然詩集八卷】福建巡撫採進本 國朝張遠撰。遠字超然，侯官人。康熙己卯舉人。官祿豐縣知縣。與蕭山張遠同姓名，而其生稍後，是集諸詩多近元白長慶體。在晉安詩派之中，自爲別調。杭世駿榕城詩話曰：「張遠領康熙己卯鄉薦第一，遊京師，與竹垞初白諸人倡和甚富，有集梓行。」初嘗挾策遊四方，未有所遇。登滕王閣題詩，一達官嗟賞，爲之延譽。詩名遂振。其詠松濤有月明何處，雨風定數聲，鐘亦佳句也。

【山曉閣詩十二卷】浙江巡撫採進本 國朝孫琮撰。琮字執升，嘉善人。山曉閣其讀書處也。集前有魏坤序，謂其初集不下千首。其後數十年復成兩集。今計此本所存僅十之二三耳。其詩頗有警句，而醞釀未深。

【香草居集七卷】浙江巡撫採進本。國朝李符撰。符本名符遠，字分虎，號耕客，嘉興人。是集後有其從孫菊房跋，稱所作詩詞，刻於滇南者曰香草居詩，刻於金陵者曰未邊詞。未刻詩詞曰花南老屋集，排偶之文曰補袍集，後補袍集寄於容城胡具慶家，遂亡其本。花南老屋集亦僅存詩一冊。此篇即菊房以香草花南二集合爲一編。凡古今體五卷，第六卷以下爲詞，即所謂未邊詞也。符早受知於曹溶，得讀其藏書，又與朱彝尊等結詩社，故其學頗有淵源。詩則詞意清婉，似源出於范成大，與彝尊等格又異焉。

【秋水閣文鈔一卷】江蘇巡撫採進本。國朝陳維岳撰。維岳字緯雲，宜興人。檢討維崧之弟也。晚年自定古文百篇，詩二冊，詞二冊。其季弟欲附梓於維崧迦陵集後，未果，遂多散佚。此其傳寫殘本，僅存賦十篇，雜文十五篇。卷首有同里蔣景祁序，以維岳比其兄維崧，然駢體略得維崧之格，至魄力根柢，皆遠遜之。雜文中如十三經考特科舉策略，無所發明。漆園生傳亦毛穎傳之窠臼，仲兄半雪傳亦失諱親之義。考景祁序，乃爲全集而作，豈別有佳製？佚不可覩歟。

【寶蘭堂遺詩二卷】山東巡撫採進本。國朝趙執端撰。執端號緩菴，益都人。雍正中分益都置博山。趙氏所居割隸焉。故此本追題爲博山人。執端於趙執信爲從弟，而於王士禛爲甥。執信士禛以爭名，構讐著書互詆，兩家詬爭如水火。執端獨含執信而從士禛，其詩句擬字摹亦頗得其一體。集中有過士禛舊居詩曰：突兀龍門羣仰望，飄零宅相獨徘徊。依然萬壑朝宗在，不禁蚍蜉撼樹來。蓋爲執信談龍錄發也。執信談龍錄負氣指摘，或不免失之太過，而所言不盡無理。執端直以羣兒謗傷詆之，是其門戶之見，尙未湔明。季餘習矣。

【友柏堂遺詩選二卷】編修周永年家藏本 國朝馮協一撰。協一字躬暨，益都人。大學士馮溥第三子也。以溥陰官至臺灣府知府。是集乃協一歿後，其子厚檢收遺稿，求正於其姻家趙執信。執信託目疾不省覽，命門人常熟仲是保代刪之而執信爲之序。是保跋焉：其詩雖未極工，亦非極惡。而執信序嘲誚百端，殊可怪訝。亦可云魏收驚蛱蝶矣。

【野香亭集十三卷】浙江巡撫採進本 國朝李半青撰。半青字丹壑，合肥人。大學士天馥子。康熙己未進士，官翰林院編修。是集詩編年分卷起康熙戊寅訖己亥。毛奇齡西河詩話中極稱其吐屬工敏，蓋其穎悟有過人者。其氣骨未適，則年未四十而歿。功候猶淺之故也。

【夢鼎堂文集四卷】若溪集一卷】大理寺少卿劉天成家藏本 國朝任觀瀛撰。觀瀛字子登，或書曰紫登，以同音相假借也。蕭縣人。康熙己未進士，官至陝西潼商道。是二集皆其官長興知縣時所作。若溪集以水名，名其詩夢鼎堂，在長興署中。明歸有光所建，觀瀛重構之，因以名其文集云。

【晚樹樓詩稟四卷】江蘇周厚堉家藏本 國朝吳震方撰。震方有讀書正音已著錄。是編乃其詩稟。始於康熙己未初館選時，終於甲申遊滁州時所作。初震方以御史罷歸，康熙癸未恭逢聖祖仁皇帝南巡，以所輯朱子論定文鈔進呈，蒙恩復職。且御書白居易詩以賜，因摘詩中晚樹二字以名其樓，併以名集云。

【雙溪草堂詩集一卷附遊西山詩一卷】兩淮鹽政採進本 國朝王晉徵撰。晉徵字涵齋，休寧人。康熙己未進士，官至戶部侍郎。是集爲晉徵所自定，以編年爲次，始於康熙癸丑，終於戊子。

【老雲齋詩刪十卷】浙江巡撫採進本 國朝沈不負撰。不負字集九，一字次山，平湖人。是集據乾隆庚申陸奎勛序。謂康熙己卯不負手刪其詩存十之五編年而不分體以授其子方蕙曰汝他日力能開雕當名之曰老雲齋詩刪不必更有增入云云而愈懋琪所作不負小傳乃稱不負病亟時客有傳濟南劉中丞幕中貫花主人降於乩案貫花主人謂金人瑞也不負慨然而興口吟云云竟絕筆於此今此詩刻於卷末則似非盡自定之本或以其事奇異故附存耶。

【馮舍人遺詩六卷】山東巡撫採進本 國朝馮廷樞撰。廷樞字大木，德州人。康熙壬戌進士，官中書舍人。丁卯典試湖廣作詩一卷，名曰晴川集。王士禎嘗序之。是集乃廷樞歿後趙執信所編。首爲京集三卷，次即晴川集一卷。又雪林集一卷。曹村集一卷。併爲作序。以士禎序爲知之未盡。蓋當日執信方以論詩與士禎相左。故雖同一推獎亦持異議云。

【居業齋文集二十卷別集十卷】湖南巡撫採進本 國朝金德嘉撰。德嘉字會公，廣濟人。康熙壬戌進士，官翰林院檢討。德嘉晚年鍵戶著書。時同郡顧景星張仁熙劉醇驥往往追摹秦漢宗尚王李晳歸有光爲秀善婉媚。德嘉獨不爲高論。力摹韓歐。雖其闊肆博贍。遜於國初前輩。而先民矩矱彷彿猶存。惟復胡石莊書謂史館方開吾楚先輩故事。尙待折衷江陵當國綜覈名實富國強兵數十年而論者以專病之。熊楊慷慨任事而熊以過剛見嫉於當世。楊專閩仗鉞憂憤以死。或曰自縊當時失機逸賊別有主名。武陵豈自經溝瀆者耶。云云爲狃於鄉曲之私。未可爲萬世之公論也。

【艾納山房集五卷】江蘇周厚堉家藏本 國朝王九齡撰。九齡字子武，華亭人。廣心之仲子也。康熙壬

戊進士官至監察御史其詩欲挹何李之流波而才思富豔加以纖穠如金陵雜感云十里青樓原上草六朝紅粉路菊花殆純以情韻勝矣

【德星堂文集八卷續集一卷河工集一卷詩集五卷】浙江巡撫採進本 國朝許汝霖撰汝霖字時菴海寧人康熙壬戌進士官至禮部尙書是編文集目列十四卷而十一卷以下有錄無書註曰以下嗣出又目列卷九爲課士條約卷十爲河工集而書中九卷題曰續集河工集則自爲一帙不入卷數且書有刊刻未完之處蓋初刻未校之本故體例不盡一也詩集五卷而分爲八編曰祥獻集曰應制集曰冰銜集曰使旋集曰河干集曰還朝集曰歸田集曰酬應集汝霖才思富贍集中諸體皆備然如河工集內批高陽水災詳文云仰速行確查候撫部堂批示繳之類僅十二字亦列之集中則授梓之時舉其平生手跡一字不遺未免不能割愛耳

【素巖文稟二十六卷】江蘇巡撫採進本 國朝王誥生撰誥生有懿言日錄已著錄是編所載皆雜文末卷並錄及訟牒則太甚矣

【周廣菴全集三十八卷】浙江巡撫採進本 國朝周金然撰金然字廣菴上海人康熙壬戌進士官至司經局洗馬是編分爲七種飲醇堂文集八卷抱膝庭詩草二十卷娛暉堂集二卷和陶靖節集三卷和李昌谷集一卷西山紀遊詩一卷南浦詞三卷金然與施閏章宋琬遊其才思格力亦介於二人之間
【奉使滇南集】無卷數 江蘇巡撫採進本 國朝許嗣隆撰嗣隆字山濤如臯人康熙壬戌進士官翰林院編修是編乃康熙癸酉奉命典試雲南往來紀行之作多述山川名勝

【嶺南二紀二卷】浙江巡撫採進本 國朝茅兆儒撰 兆儒號雪鴻 錢塘人 是編皆其紀遊之詩 一曰嶺南方物紀 乃康熙壬戌居韶州時所作 凡二百四十種 各以絕句一首紀之 而略註其狀於題下 一曰粵行日紀 則述其戊午歲自錢塘至廣州途中六十二日所經 凡一百四十首 亦每題爲一絕句

【正誼堂集十二卷】江西巡撫採進本 國朝張伯行撰 伯行有道統錄 已著錄 是編前二卷爲奏議 第三卷至第五卷皆尋常案牘之文 第六卷爲書 大抵講學之語 第七卷八卷爲序 皆已見所刊各書中 第九卷至十二卷爲記論說議傳墓誌墓表祭文雜著 記其一生大抵步趨陸隴其也

【愛日堂詩二十七卷】浙江巡撫採進本 國朝陳元龍撰 元龍有格致鏡原已著錄 愛日堂者聖祖仁皇帝御書 故以名集 其詩編年分集 凡十二種

【鶴侶齋集三卷】山東巡撫採進本 國朝孫勑撰 勑字子未 一字子未 號莪山 又號誠齋 德州人 康熙乙丑進士官至大理寺少卿 終於通政司參議 其集凡詩一卷 文二卷 勑性簡傲 不諳於俗 集中石丈詩云 山鬼矜伎倆 此老如不聞 或具袍笏拜此老亦不尊 坦然自高臥 雨蝕青苔痕 蓋亦自寓云

【寶宸堂集四卷】湖北巡撫採進本 國朝張希良撰 希良有春秋大義 已著錄 是集凡文二卷 詩二卷

希良久困名場 早年著述頗多亢厲之音 自選入詞館後 其體格乃一變焉

【倚雲閣詩集一卷】山東巡撫採進本 國朝汪灝撰 灝字文漪 一字天泉 臨清人 康熙乙丑進士官至貴州巡撫 是集爲王士禎所定 凡評點悉仍士禎之舊 自題蔣都憲家慶圖以下 則士禎所未見 故評點闕焉 灝詩一以士禎爲法 集中有讀唐賢三昧集二絕句 殆於鑄金呼佛然姿韻略同 而近體多湊泊語

不及士禎之天然也。同時別有汪灝字紫滄休寧人康熙癸未進士官翰林院編修二人詩文傳寫者往往相淆惟以字爲別識而已。

【嶠老編年詩鈔十三卷】浙江巡撫採進本 國朝金張撰。張字介山錢塘人。其詩起康熙乙丑迄癸酉凡九年之作分年爲卷。甲戌至丙子詩四卷題曰續鈔其外集五種。己未詩刪曰么鳳詩曰庚申詩刪。曰學誠齋詩話。曰雜著則皆有錄無書不知爲殘闕爲未刻也。張詩力掃明人蹈襲之弊而間失之輕。自稱學楊誠齋今檢所作其得失皆去之不遠所言可謂不誣矣。

【崑崙山房集三卷】山東巡撫採進本 國朝張篤慶撰。篤慶有班范肪截已著錄。其詩古文頗知名於時此集乃有文而無詩。疑編次未竟之本也。篤慶才藻富有洋洋灑灑動輒千言風發泉涌不可節制。如集中所載代王士禎作候補中書吳燦墓誌銘今錄入蠶尾續集者已刪削十之三四則亦頗病其冗漫矣。其曰崑崙山房者以所居室旁有小山號崑崙因以名集云。

【鬲津草堂詩集】無卷數 山東巡撫採進本 國朝田震撰。震字子益號樂園又號香城居士德州人。康熙丙寅拔貢生授堂邑縣敎諭以病未赴。震與兄雯需竝能詩。雯才調縱橫沿幾社之餘風以奇偉鉅麗自喜與王士禎同郡同時而隱然負氣不相下。士禎池北偶談中載其服藥必取異名一事亦陰不滿之震乃獨從士禎遊是編凡鬲津草堂五字古體詩一卷五字今體詩一卷皆士禎評而序之序稱唐有詩不必建安黃初也元和以後有詩不必神龍開元也北宋有詩不必李杜高岑也語蓋爲雯而發又鬲津草堂絕句詩一卷里人孫勸序之序稱吾州近時前輩以詩名者無間於時余性不近詩然嘗披編佩

句之餘亦或頗有所覩於作者之旨大都若格格於余懷未能強以爲無間然也語亦侵雲然觀牒所作雖密咏恬吟成一邱一壑之趣至才力富健究不足以敵斐也集後又有菊隱集一卷南遊稟一卷總題曰鬲津草堂七十以後詩黃越序之稱其垂老所作彌淡彌甘大抵嚴生平爲詩以七言絕句自負自少至老亦惟是體特多云

【匡山集六卷】山東巡撫採進本 國朝王沛恂撰。沛恂字書巖。諸城人。官兵部主事。是集凡文五卷。詩一卷。詩文皆伉直有氣。而亦有恃氣之處。故意之所至。暢所欲言。不免時有累句。

【綺榭閣稟一卷】山東巡撫採進本 國朝安箕撰。箕字青士。壽光人。致遠之次子。是集止詩二十八首。賦九首。記一篇。附載致遠集末。箕名父之子。承其家學。故詩文皆有矩度。惟波瀾尙未老成。則問世太早之故也。

【簫菴遺稟一卷】內府藏本 國朝汪筠撰。筠字禹吹。編修琬之長子。少補吳江學諸生。年三十二病略血卒。琬得其遺詩數十篇。爲刊附於汪氏家傳集後。

【學古堂詩集六卷】浙江巡撫採進本 國朝沈季友撰。季友字客子。平湖人。康熙丁卯副榜貢生。其集卷一至卷三曰南旋集。卷四至卷六曰秋蓬集。乃其孫鑰所合刊。季友爲陸菜之壻。與汪琬毛奇齡以詩相倡和。奇齡爲作集序。亦以才子目之。然抑揚皆在是兩字矣。

【半菴詩稟】無卷數 山東巡撫採進本 國朝勞曠撰。曠字貞著。陽信人。山左詩鈔作勞礪。其字從石。然此本爲其家刻。字皆從山。則山左詩鈔誤也。曠年五十四爲詩。故工候未深。多不入律。高適曠代之才。

固不容於有二矣。

【東湖文集三卷】江蘇周厚堉家藏本 國朝朱璘撰。璘所編諸葛丞相集已著錄。是集前二卷爲雜文。第三卷即所作通鑑輯略之論斷。然止於唐末似非完本也。

【藥亭詩集二卷】江蘇周厚堉家藏本 國朝梁佩蘭撰。佩蘭字藥亭。番禺人。康熙戊辰進士。改庶吉士。是編乃休寧汪觀所選。皆近體詩。卷首有朱文小印曰古體嗣出。則不但非其全集。即選本亦尙未刻竣矣。

【鉢山堂詩集十九卷】浙江巡撫採進本 國朝陳阿平撰。阿平字獻吉。東莞人。康熙中諸生。與梁佩蘭同時。是集即佩蘭爲之序。其古體勁直。而少醞釀。五言律詩。如東風歸故國。孤燭對高樓。明月又將滿。秋風吹別離。諸聯頗有風味。惜不多得耳。

【紺寒亭詩集十卷文集四卷】江西巡撫採進本 國朝趙彞撰。彞號蒙泉。嘉定人。康熙戊辰進士。官定陶縣知縣。是集彞所自編。詩格極爲適上。但才鋒太銳。少一唱三嘆之致。文則縱筆而成。傷於平易。又不及其詩。

【林左堂詩集六卷詞四卷續集三卷】江西巡撫採進本 國朝孫致彌撰。致彌字愷似。嘉定人。康熙中被薦以太學生賜二品服。出使朝鮮採詩。戊辰成進士。改庶吉士。官至翰林院侍讀學士。歿後詩藁散佚。雍正中張鵬翀朱厚章得鈔本於戴璣家。始選而刻之。詞凡三種。曰別花餘事。曰梅卉。曰衲琴。皆其門人樓儼所定。續集附詞後。則未詳何人編次也。致彌以書名。得董其昌之法。詩則以跌宕流逸爲長。而率易

亦所不免

【峩巘山人集】無卷數 山東巡撫採進本 國朝謝乃實撰 乃實字華函 福山人 福山有峩巘山 因號峩巘山人 康熙戊辰進士 官興寧縣知縣 是集不分卷數 但以各體類從 而附詩餘於末 其詞名絕句一百三十首 別爲一冊 爲古今所未有 然雜體昉自齊梁 究爲小品 可偶一爲之 不可以爲擅長之技也

【過江集四卷】兩淮馬裕家藏本 國朝史申義撰 申義字叔時 號蕉飲江都人 康熙戊辰進士 選庶吉士 散館改給事中 時新城王士禎 方以詩名海內 詈稱申義及湯右曾足傳其衣鉢 見集中自註 聖祖仁皇帝嘗以後進詩人詢澤州陳廷敬 廷敬以申義及周起渭對見廷敬序中 其官翰林時有蕪城集典試雲南時有使滇集 此則官給事中時 前後數年作也

【寒村集三十六卷】江蘇周厚堉家藏本 國朝鄭梁撰 梁字禹梅 慈谿人 康熙戊辰進士 官至高州府知府 是編詩分十一集 一曰見黃稊詩刪五卷 二曰五丁詩稊五卷 三曰安庸集一卷 四曰玉堂集一卷 五曰歸省偶錄一卷 六曰還朝詩存一卷 七曰玉堂後集一卷 八曰寶善堂集一卷 九曰白雲軒集一卷 十曰南行雜錄一卷 十一曰高州詩集二卷 文分四集 一曰見黃稊二卷 二曰五丁集二卷 三曰安庸集二卷 四曰寒村雜錄二卷 補一卷 又半生亭集一卷 息尙編四卷 則詩文合刻也 梁受學於黃宗羲 嘗謂陳師道年三十一見黃魯直 盡焚其稊而學焉 梁見宗羲時亦三十一 故詩文皆以見黃稊爲冠 其文得之宗羲者爲多 而根柢較宗羲少 薄詩則旁門別徑 累所謂有韻之語錄 其書定山詩鈔句云 明朝詩學崔公甫若語仙才拜定山 可以得其宗旨之所在矣

【雙雲堂文稟六卷詩稟六卷】浙江巡撫採進本 國朝范光陽撰。光陽字國斐，號北山，鄞縣人。康熙戊辰進士，改庶吉士，官至福建延平府知府。是集爲其晚年所手定，沒後其孫從律等以充安堂近稟附入刊行。其曰：「雙雲堂者，以其先墓有紅雲白雲二山，故名所居，以示不忘其祖之義。」

【藜乘初集一卷二集二卷】山東巡撫採進本 國朝劉以貴撰。以貴字滄嵐，灤縣人。康熙戊辰進士，是編初集先詩後文，二集先文後詩，每篇之後俱附王道炷評語。道炷序稱其語意獨造，刻鑿精深，蓋生澀爲工者，後附初學正鵠數十則，則皆鄉塾講師語也。

【曉山文集四卷詩集一卷】山西巡撫採進本 國朝田從典撰。從典字克正，陽城人。康熙戊辰進士，官至文華殿大學士。謚文端。是集奏疏序傳等雜文五十餘篇，爲四卷；詩三十餘首，爲一卷，又附以補刻文一冊。據卷首儲大文序，謂從典文多散佚，此乃其子暨族屬所搜輯者，故僅止於此，非全本也。

【潘中丞集四卷】江蘇巡撫採進本 國朝潘宗洛撰。潘宗洛字書原，號巢雲，又號垠谷，宜興人。康熙戊辰進士，官至湖南巡撫。詩文多臺閣之作，奏疏序記家訓等篇，明白質直，視其文頗爲勝。之卷末有儲大文所作傳，以爲古文詞上宗史記，詩由玉溪詣少陵，皆以千古第一人推之，則非其實也。

【棟亭詩鈔五卷附詞鈔一卷】江蘇巡撫採進本 國朝曹寅撰。寅有居常飲饌錄已著錄，其詩一刻於揚州，計盈千首，再刻於儀徵，則寅自汰其舊刻，而吳尙中開雕於東園者，此本即儀徵刻也。其詩出入於白居易、蘇軾之間。

【時用集】無卷數 浙江巡撫採進本 國朝陳訏撰。訏有句股引蒙已著錄，訏爲黃宗羲門人，又與查

慎行同里友善故文格詩格俱有所受然所作終亞於二人是集爲訏所自編凡四十歲以前所作悉刪去之斷自己已迄戊子爲正編又自己丑迄壬子爲續編則其晚所增刻也其曰時用集者訏自序爲家塾署聯用東坡語春秋古史乃家法詩筆離騷亦時用故手訂正續集遂以時用標題云

【舊卷堂六十四卷】浙江巡撫採進本 國朝陸繁弨撰吳自高註繁弨字拒右錢塘人自高字若山桐城人官翰林院待詔是集皆駢體之文崑山徐炯爲刻板陳廷會序之而章藻功爲之跋藻功繁弨之門人即作思綺堂四六者也本止四卷雍正甲寅自高爲之註始分十卷王晫今世說載繁弨自許儼語爲海內少雙蓋是時陳維崧吳綺皆已下世矣

卷一百八十四

集部三十七

別集類存目十一

【湖海集十三卷】山東巡撫採進本 國朝孔尙任撰尙任有節序同風錄已著錄尙任官國子監博士時隨侍郎孫在豐在淮揚疏濬海口因輯其入淮以後詩文自編此集故以湖海爲名

【幸跌草三卷】浙江巡撫採進本 國朝黃百家撰百家有體獨私鈔已著錄是集凡雜文二十篇其序盧氏春秋三傳纂凡謂春秋之本旨皆顯以示人無暗藏機括使人如猜謎射覆者深得聖人作春秋之意其王劉異同序亦深見兩家之闡奧大致頗肖其父但蒼老不及耳書首題曰學賓五稟則卷帙尙多

此其槩中之一種耳。

【眺秋樓詩八卷】浙江巡撫採進本。國朝高岑撰。岑字峴亭，商邱人。官豐城縣知縣。其詩每卷各爲集名，終之以和月。泉吟社田園雜興六十首，岑爲吏部尚書宋犖外孫，故其詩法亦本於犖。與宋至緯蕭草堂集體格相近，所謂酷似其舅者也。

【赤嵌集四卷】兩淮馬裕家藏本 國朝孫元衡撰。元衡字湘南，桐城人。康熙中官至東昌府知府。是集皆其爲臺灣同知時所作，以地有赤嵌城，故以爲名。多紀海外土風物產，頗逞才氣，而未能盡軌於詩律。王士楨爲之點定，謂其追蹤建安，躡跡長公，似乎太過也。

【四香樓集四卷】江蘇巡撫採進本。國朝范纘撰。纘字武公，婁縣人。其詩源出晚唐，而參以南宋。如蜂憎綠蟻，晴偷蜜燕覓青蟲，畫哺雛。一潭水聚，三更月四野山圍，小閣燈三秋樹老，蟬聲盡。八月江寒雁影遲，蟬聲送過秋。多少鶴夢憑他夜，短長之類皆綽有思致，而格調未高。陳元龍序稱其長堪輿學，蓋嘗館於元龍家，相傳格致鏡原，即其所纂，亦博洽之士也。

【釀川集十三卷】浙江巡撫採進本。國朝許尙質撰。尙質字又文，山陰人。是集賦一卷，雜文二卷，詩二卷，詞五卷。宋祖煜序謂尙質少而業詩，亦喜飲，指邑中所謂沈釀川者自號，因以名集。其文頗有法度，詞亦修整，惟歌詩稍嫌放縱，或不入律云。

【南園詩鈔十卷】江蘇巡撫採進本。國朝尤世求撰。世求字念修，長洲人。官南充縣知縣。是集分金臺草一卷，冰壺草二卷，湛華草一卷，懷新草二卷，沁雪草二卷，逢辰草一卷，都歷草一卷。世求爲侗之孫，故

詩格亦與西堂雜俎相近。

【舟車初集二十卷】浙江巡撫採進本 國朝陶季撰。季原名澂，字季深，後以一字爲字，又以字行。寶應人。王士禛漁洋詩話記其與萊陽董樵同以一字爲字，因而賦詩定交者是也。其平生足跡半天下，詩多於舟車得之。因名舟車集。其詩多才鋒踔厲，風發泉湧，不爲邊幅所窘。然有警句，亦有率句，有健句，亦有弱句。蓋跌宕有餘，而陶鍊未至者也。

【燕堂詩鈔八卷】戶部尙書王際華家藏本 國朝朱徑撰。徑字恭亭，寶應人。喬萊之壻也。是集爲徑所自編，自康熙丙寅至己卯，凡十四年之詩，緣情綺靡，頗有格韻。特少作居多，尙未能盡謝鉛華耳。

【鈍齋文鈔七卷】江西巡撫採進本 國朝楊兆嶠撰。兆嶠字又平瑞金人。是集前有自序，謂著文三百餘首，汰其三之二，授諸梓，則兆嶠所自定也。又有張尚瑗序，稱其文似歸有光，使汰其冗句俗字，固亦近之矣。

【集古梅花詩】無卷數 浙江巡撫採進本 國朝張吳曼撰。吳曼字也，倩上海人居吳淞江上，其地多梅，因爲集句賦咏。凡和中峯禪師韻者一百首，和陳涉江韻者三十首，自和者十首，又一百首，則吳曼以同里高士沈球本有是體，爲繼作而合刻之者。又一百首，則吳曼六十生日，其仲兄文卿取十月先開嶺上梅句，集古爲壽。吳曼因續爲之者，未附集唐梅歌一首，乃七十六歲所作，殆終身詠此一花也。

【根味齋詩集二十卷】編修徐天柱家藏本 國朝徐志莘撰。志莘字任可，一字商農，德清人。工部尙書元正子，以父蔭官順天府通判，是編凡趨庭集二卷，壯圖集三卷，小草集三卷，棄擔集七卷，起乾集二卷。

老傅集三卷。詩多取法蘇陸。不事雕飾。蓋其家學然也。

【笏峙樓集五卷】江蘇周厚堉家藏本。國朝張祖年撰。祖年有道驛集已著錄。是書釋疑孟一卷。以司馬光有疑孟一書。而祖年逐條爲之辨。廢言四卷。則其所自著也。中多遊戲之詞。與道驛集之正色講學者又殊。

【觀樹堂詩集十四卷】浙江巡撫採遺本。國朝朱樟撰。樟字鹿田。錢塘人。由舉人官至澤州府知府。其詩爲叱馭集一卷。入蜀時作也。問絹集一卷。白舫集二卷。古廳集四卷。皆令江油時作也。冬秀亭集四卷。官澤州時作也。剡曲集一卷。則天台紀遊詩也。一半勾留集一卷。則憂歸居杭詩也。

【恕谷後集十卷續刻三卷】直隸總督採遺本。國朝李塨撰。塨有周易傳註已著錄。是集所作古文也。

前有其門人閻鎬序。稱恕谷者。自名其里也。後集者。自康熙癸未以前俱置之。而惟存其後焉者也。集首第一篇爲送黃宗夏序。後有題曰。此王崑繩改本也。恕谷初學八大家。崑繩言。當宗秦漢章法。訂此恕谷後。謂唐宋不如秦漢。秦漢不如六經。於文法一宗聖經。題曰。後集云。云崑繩者。大興王源字也。嘗撰文章練要。分六宗百家。談古文之法。後與塨同師顏元。塨遂從學古文。盡棄其少作。後集之名。蓋別其前之所棄也。今觀其文。根柢仍出八家。但開合斷續。不主故常。異乎明以來學歐曾者。惟以紓餘曼衍爲長耳。遽曰秦漢。曰六經。溢其量矣。塨天分本高。其學自成一家。以經世致用爲主。亦具有根柢。然負氣求勝。其文或失之麤豪。少古人淳穆之氣。其持論又自命太高。自信太果。幾於唐宋元明諸儒。無一人能當其意。亦未免傷於偏激。蓋前明白萬歷以後。心學盛行。儒禪淆雜。其曲謹者。又闊於事情。沿及國初。猶存商俗。故

顏元及塚獨力以務實相爭存其說以補諸儒之枵腹高談未爲無益然不可獨以立訓蓋廢諸家譬諸
礮石大黃當其對證實有解結滌滯之功若專服久服則又生他疾耳

【東山草堂文集二十卷詩集八卷續集一卷】戶部尚書王際華家藏本 國朝邱嘉穗撰嘉穗有考定
石經大學經傳解已著錄其文頗條暢詩則淺弱集後舊附陶詩箋註五卷邇言六卷又考定石經大學
經傳解一卷今各分著於錄俾從其類

【在陸草堂集六卷】兩淮馬裕家藏本 國朝儲欣撰欣有春秋指掌已著錄欣以制藝名於時而古文
亦謹潔明暢有唐宋家法大致於蘇軾爲近所作蜀山東坡書院記宗旨可概見也其中如周公太公論
撻伯禽辨挾天子辨皆少近迂與齡辨則先儒久言之亦不免爲屋下之屋其正統辨不取帝蜀之說亦
不免失之好辨也

【息廬詩一卷】江蘇周厚培家藏本 國朝陶爾穉撰爾穉字穎儒華亭人是集前有曹溶序稱其人巧
極天工錯顏光敏序稱其七古似青蓮長吉近體不專一家而各盡其妙今觀所作大抵以才思擅長品
格故未能超詣雪美人七律二首世所豔稱實則小巧也

【陳恪勤集三十九卷】浙江巡撫採進本 國朝陳鵬年撰鵬年字北溟號滄洲湘潭人康熙辛未進士
官至兵部侍郎河道總督諡恪勤是集凡分十編曰耦耕集者以舍北耦耕堂而名也水東集者以其先
人鬻墓所在也蒿廬集者憂居前後所作也浮石集朐山集淮海集者皆宦游地也于山集香山集武夷
集者皆往來游息處也末附喝月詞五卷則詩餘也

【道榮堂文集六卷】兩江總督採進本 國朝陳鵬年撰。此本爲鵬年所自編，刻於恪勤集之前。其生平以清操受主知，詩文非所注意。集中亦皆應酬之作，更不見所長。

【固哉叟詩鈔八卷】浙江巡撫採進本 國朝高孝本撰。孝本字大立，號青華，嘉興人。康熙辛未進士，官績溪縣知縣。孝本雖年屆四十，始爲詩。然罷官後放浪山水，以老故，其詩灑落有清氣，但深厚不足耳。是編分十七集。曰趨庭集，曰江漢集，曰徑山集，曰琴溪集，曰嶺南集，曰秦遊集，曰大鄣集，曰葛園集，曰晉遊集，曰津門集，曰南州集，曰幔亭集，曰海岱集，曰黃梅集，曰台雁集。皆孝本七十八歲所自編，爲雍正丙午以前詩。至丁未又編其病中所作爲維摩集，附十七集後，故自序但列十七集云。

【葛莊詩鈔十三卷】內府藏本 國朝劉廷璣撰。廷璣有在園雜志，已著錄。其詩以陸游爲宗，在園雜志嘗自記：其童去自埋生，後火飯來還掩。讀殘書一聯，或以爲勸襲陸游呼童不至，自生火待飯未來，還讀書句，自辨其用意不同，是固誠然。然奪胎換骨，要不能謂不出於游也。又自記有人評其詩曰：此亦出入於香山劍南之間而未純者，自以爲允，可謂自知矣。

【葛莊編年詩】無卷數 江西巡撫採進本 國朝劉廷璣撰。葛莊詩鈔止於官九江道時，是編又其官淮徐道時所作，分年排次，起康熙丁巳，止於壬辰，後復有補遺一卷。

【咸齋文鈔七卷】浙江巡撫採進本 國朝查旭撰。旭字咸齋，海寧人。康熙癸酉副榜貢生。是集凡書一卷，序二卷，祭文一卷，論一卷，傳一卷，雜著一卷。旭有孝行，嘗於兵亂中崎嶇萬里，尋父遺柩。士論稱之，其文源出南宋，頗清雅有法度。使假之年，尚可追古作者，前有益都趙執信序，作於旭在之日。又有楊中納

序則旭沒後所作也。

【冰齋文集四卷】浙江巡撫採進本。國朝懷應聘撰。應聘字莘舉，秀水人。是編刊於康熙癸酉，蓋所自編皆散體古文，而時文選本之序最多。

【清端集八卷】江西巡撫採進本。國朝陳瑣撰。瑣字文煥，一字眉川，海康人。康熙甲戌進士，官至福建巡撫。謚清端。是集凡文七卷，詩一卷，皆非當行。然瑣居官以廉介稱，其節概足以自傳，亦不必以文章傳也。

【夢月巖詩集二十卷】浙江巡撫採進本。國朝呂履恆撰。履恆字元素，號坦菴，河南新安人。康熙甲戌進士，官至戶部侍郎。此集乃雍正乙巳，其姪續曾等校刊。詩以體分，末附詩餘二十四首。前有凡例，稱其詩或經歲一改，或一月數改。如洛陽秋思，河上寓目，詩之領聯，嫌其調近七子，輒加竄易。金陵雜感之結句，嫌其涉於怒罵，亦復易之。又稱盛朝詩選，載其秦中懷古詩、洛陽秋思詩、懷公毅詩，字句皆有所竄亂。今悉從原本云云，或刊版時有所點定歟。

【治古堂文集五卷】浙江巡撫採進本。國朝呂履恆撰。是集爲履恆歿後，淳安方婺如及其門人石屏張漢所選定。凡一百九十二篇，每篇各有評語，如制義之式。

【雪鴻堂文集四卷】山東巡撫採進本。國朝李鍾璧撰。鍾璧號鹿嵐，通江人。檢討蕃之子也。康熙丙子舉人，官平南縣知縣。考古來集部之名，往往相複，然無一家之中共一集名者。惟呂本中呂祖謙俱稱東萊，集然祖謙集加太史字以別之。見文獻通考。又洪巖虎及其子希文，皆名軒渠集。然希文集加續字以

別之。非竟相同。鍾璧之父蕃有雪鴻堂集已著錄。而鍾璧此集仍以雪鴻堂爲名。父子竟無所別。亦未有之剏例也。其詩皆信筆揮灑。於聲律多未能諳。疊韻詩九十一首尤多累句。自序謂隨手塗抹。長短得失。在所不計。諒矣。其文亦惟意所如。如與陳敷相書。引原憲貧也非病之語。至以聖賢爲戲。更軼乎規矩之外矣。

【克念堂文鈔二卷】江蘇巡撫採進本 國朝雷鐸撰。鐸字伯覺。蒲城人。康熙丙子舉人。陝西通志稱其事繼母孝。負米他郡以養。遇水幾溺。嘗終日不食。不致母缺於供家。雖貧養從兄弟及寡姊妹不少懈。朔望聚族人習禮講法。以相勸勉。蓋亦篤行之士。其文章則以人存之耳。

【殘本賦清草堂詩鈔六卷】江蘇巡撫採進本 國朝張棠撰。棠字吟樵。華亭人。康熙丙子舉人。官至桂林府知府。告歸後加銜爲太僕寺少卿。是編原分五集。曰白雲吟。曰一肩吟。曰獨宜吟。曰江上吟。最後所作曰雪蓬吟。今存者惟江上吟及雪蓬吟。餘俱散佚。其詩欲以風調勝。而骨幹未遯。

【山舟堂集十二卷】江蘇巡撫採進本 國朝周士彬撰。士彬字介文。婁縣人。康熙丙子副榜貢生。世居干山。其山舟堂額猶趙孟頫手書也。此集凡古今體詩一千餘首。乃其子忠忻等所刊。其論詩以真朴爲主。尤喜讀宋儒語錄。故所作如存心養性須常靜。莫負吾家太極翁之類。皆白沙定山派也。

【漢園未定彙六卷】浙江巡撫採進本 國朝姜宸英撰。宸英有江防總論已著錄。此本爲其未入書局以前所自定。不及大興黃氏本之完備。以別行已久。姑附存其目。

【真意堂文彙一卷】浙江巡撫採進本 國朝姜宸英撰。此本前有秦松齡序。言宸英奉纂修之命。治裝

北上莫爲此集蓋其中年所作初出問世之本也

【苑青集】無卷數 浙江巡撫採進本
官翰林院編修。早年與同郡張遠齊名。毛奇齡稱其能守古人三義八法之意而不變。今觀所作。以藻綺爲主。音繁節壯。頗似西河集中語。宜奇齡之喜其類己也。

【華鄂堂集二卷】江蘇周厚培家藏本
國朝周彝撰。彝字策銘。婁縣人。康熙丁丑進士。官翰林院編修。
其詩喜作長篇。如送張長史君山玩雪遊江心寺諸作。皆灑灑千言。才鋒橫溢。然律以和平之義。往往有乖。後附研山十咏。別爲一卷。蓋刊成之後。又續入者也。

【樸學齋詩集十卷】福建巡撫採進本
國朝林佶撰。佶有甘泉宮瓦記。已著錄。佶工於楷法。文師汪琬。詩師陳廷敬。王士禛。琬之堯峯文鈔。廷敬之午亭文編。士禎之精華錄。皆其手書付雕。廷敬之集。皆刻於名位烜耀之時。而琬集則繕寫於身後。故世以是稱之。茲集古體詩三卷。今體詩七卷。淵源有自。故體格猶爲近古。特才分差弱。出手微易耳。

【柳塘詩集十二卷】浙江巡撫採進本
國朝吳祖修撰。祖修字慎思。吳江人。是集乃康熙己卯。其子大庚所編。後有大庚跋。稱祖修在時。曾版行五七言古詩。已而悔之。謂詩當以編年爲次。不當分體。今所編詩十二卷。其半猶出祖修手定也。祖修詩頗雅馴。嘗作讀王子淵傳詩。有非無聖主賢臣頌。只教宮人記洞簫之句。後見升菴集中有之。喜其闡合。因作詩誌之。然此二語太涉論宗。本非上乘。且慎思亦即李商隱賈生詩可憐。夜半虛前席。不問蒼生問鬼神之意。亦非新義也。

【畏壘山人詩集四卷】浙江巡撫採進本 國朝徐昂發撰。昂發有畏壘筆記已著錄。是集諸體雜編。其五言古體大抵刻峭清新。一往駿利。有透空碎遠之音。而下手太快。亦頗乏渟蓄深厚。則思銳而才狹之故也。

【澄懷園全集二十七卷】通政司使張若渟家刊本 國朝張廷玉撰。廷玉字衡臣。號硯齋。桐城人。康熙庚辰進士。官至保和殿大學士。諡文和。是集爲廷玉所自編。凡文存十五卷。皆乾隆戊辰以前作。詩選十二卷。皆雍正乙卯以前作。載廣集六卷。皆乾隆丙辰以後作。澄懷園語四卷。則所作筆記也。

【秋江詩集六卷】福建巡撫採進本 國朝黃任撰。任字莘田。永福人。康熙壬午舉人。官至四會縣知縣。杭世駿榕城詩話稱其工書法。好賓客。詼諧談笑。一座盡傾。罷官歸里。壓裝惟端溪石數枚。詩束兩牛腰而已。其詩源出溫李。往往刻露清新。別深懷抱。如楊花絕句云。到底不知離別苦。後身還去作浮萍。春日雜思云。夕陽大是無情物。又送牆東一日春。所爲緣情綺靡。殆於近之。而低徊宛轉。亦或闌入小詞。大致古體不如今體。大篇又不如小詩。故榕城詩話獨稱其七絕。蓋才分各有所長云。

【秋葉軒詩鈔四卷】江蘇巡撫採進本 國朝張琳撰。琳字佩嘉。一字玉田。錢塘人。是集乃康熙丙戌。其友趙炎所選定。集中近體多於古體。而七言律詩一種。又多於諸體。大抵圓熟流利。篇篇如一。蓋其瓣香惟在劍南一集耳。

【黑蝶齋詩鈔四卷】浙江巡撫採進本 國朝沈岸登撰。岸登字覃九。號惰耕。鄞平湖人。是集乃康熙壬午岸登歿後。其從子黼熊所編。其詩四百四十餘首。其詩瘦削無俗韻。而邊幅微狹。亦緣於是。

【樓邨集二十五卷】安徽巡撫採進本 國朝王式丹撰。式丹字方若，寶應人。康熙癸未進士第一。官翰林院修撰。是集乃雍正甲辰其子懋訥所刻。分年編次。凡龍竽集五卷，翠蘇集七卷，補過齋集二卷。忍冬齋集七卷。鴻柯集一卷。梅花書屋集三卷。起壬申迄丙申。每年一卷。惟龍竽集之第五卷爲其壬申以前詩不以冠集而以殿集以少作故也。

【古劍書屋文鈔十卷】江蘇巡撫採進本 國朝吳廷楨撰。廷楨字山掄，長洲人。康熙癸未進士。官至左春坊左諭德。是編凡詩八卷。末附補遺及詩餘。又雜文二卷。乾隆丙子其孫士端刊於貴州。其名曰古劍書屋者。聖祖仁皇帝南巡。廷楨以舉人召試。御書古劍篇以賜。因以爲名。誌榮遇也。

【緯蕭草堂詩六卷】浙江巡撫採進本 國朝宋至撰。至字山言。商邱人。吏部尚書學之子。康熙癸未進士。官翰林院編修。初刻有緯蕭堂詩一卷。附學集後。此其全集也。至承其家學。兼得新城王士禎之傳。故其詩派亦介出於父師之間。但才與學均未及耳。集中孔雀聯句。父子同爲之。蓋用蘇軾與子過聯句例也。

【績學堂文鈔六卷詩鈔四卷】兩江總督採進本 國朝梅文鼎撰。文鼎有歷算全書已著錄。其以績學名堂者。初大學士李光地嘗薦文鼎於朝。康熙乙酉恭逢聖祖仁皇帝南巡。文鼎迎鑾道左蒙召對。御書績學參微四字賜之。因以名堂。併以名集也。然文鼎測驗推算諸法皆足以自傳於後。詩文特其餘事。非所擅長。蓋算術雖一藝。而非以畢生之精力專思研究。則莫造其微。雖超特絕世之姿。其勢不能以旁及。張衡深通歷算。妙契陰陽。至能作候風地動儀。而文章博麗。又能凌轢崔嵬之間。千古一人而已。自洛下

閔鮮于妄人以下淳風一行亦未能以詞采著也斯亦物不兩大之理矣。

【滋蘭堂詩集十卷】浙江巡撫採進本。國朝沈元滄撰。元滄有禮記類編已著錄。是編分六集。曰康瓠集。灌畦集。今雨集。紫貝集。勞薪集。西征集。前有其孫廷芳題識稱康瓠集爲家居侍親及爲查氏贅婿時作灌畦集爲移居龍山時作今雨集爲入直武英殿時作紫貝集爲官文昌時作勞薪集爲罷官後自京赴粵時作西征集爲由粵赴京謫居銀州時作元滄爲查昇之壻久與查慎行遊故其詩格頗近初白堂集云。

【澹初詩藁八卷附見山堂詩鈔一卷】編修程晉芳家藏本。國朝沈翼機撰。翼機字西園號澹初海寧人。康熙丙戌進士官至翰林院侍讀學士詩分十集。曰謀野集。曰新安集。附黃山紀遊百詠皆翼機爲諸生時作。曰瀛洲集。丹葵集。皆館選後作。曰蜀使草。康熙甲午典試四川時作。曰黔使草。康熙丁酉至庚子。爲貴州學政時作。曰江右使草。雍正癸卯至丙午。爲江右學政時作。曰兩山集。乞假歸田後作。曰觀光集。乾隆元年翼機復補原官後作。曰游衍集。則致仕後作也。附見山堂詩鈔一卷。爲其子廷薦之作。廷薦字澄懷。雍正壬子舉人未仕早卒僅存詩六十餘首。

【集虛齋學古文十二卷】浙江巡撫採進本。國朝方檠如撰。檠如有離騷經解已著錄。其制義最有時名。而散體之文亦頗奧勁有筆力。然喜雕琢新句。襞積古辭。遂流爲別派。蓋其制義亦喜以新穎爲工。天性然也。

【觀齋詩選二卷】山東巡撫採進本。國朝張謙宜撰。謙宜號稚松。膠州人。康熙丙戌進士。是集末有法

輝祖跋謂全橐三千餘首暮年自訂存詩四百餘篇自序凡千言極述其苦吟之狀然其詩出入於香山劍南之間一吟一咏亦足自娛起而抗衡古人則力尙不逮也

【蓼村集四卷】編修周永年家藏本 國朝王莘撰莘字秋史歷城人康熙丙戌進士其詩爲王士禛田雯所稱而文不甚顯乾隆癸巳桂林胡德琳得其本於歷城周氏爲刪訂付梓德琳爲之序稱原本分甲乙二集自癸亥至庚子三十四年之作各自編年惟辛丑以後之文無存今仍其舊編爲四卷乙居四之一惟書記記傳註于支於本目之下使後人有所考焉

【雪鴻堂文集二卷】山東巡撫採進本 國朝李鍾峩撰鍾峩號芝麓通江人康熙丙戌進士官翰林院檢討是集乃其督學福建時所編凡賦頌一卷詩一卷多館課及應酬之作案鍾峩父蕃有雪鴻堂集其兄鍾璧集襲用其名鍾峩又襲用其名殊不可解如以爲家乘之總名則又各爲卷第例亦難通也

【王石和文集】無卷數 山西巡撫採進本 國朝王璣撰璣字石和又字韞輝孟縣人康熙丙戌進士官翰林院檢討是集中多議論之文筆意亦頗縱橫其記周遇吉死節事謂賊兵攻城急城將陷賊募獻

遇吉者遇吉謂左右曰豈惜一死以累衆可獻我兵民環泣衆遂以繩繫公下有兩賊掖之去公見賊罵倒懸演武廳磔之云云與明史本傳不合又以好訪廟爲田子方廟與朱彝尊碑不合其最異者如文昌閣碑記謂孔子不得帝君之教天下將有悖心反道肆然於日用倫常之際而不復以天地日月爲可忌者尤不可爲訓也

【十峯集五卷】江蘇周厚堉家藏本 國朝徐基撰基字宗頊華亭人由貢生官訓導是集自詩賦文及

填詞皆集前後赤壁賦中字錯綜盡變極有巧思若其中遊小赤壁賦春日遊小赤壁賦及道德篇諸作皆洋洋數千言而伸之縮之不出四百餘字之外雖才人狡猾不足以語大雅而專門之技別開奧窓亦詞苑中之奇作亘古所未有者也末卷倣梁簡文蘇蕙蘭古盤鑑圖及宋庠寄范仲淹諸迴文皆有思致卷首有康熙丙戌陳元龍序序集聖教序中字亦如自己出以弁此集可云勁敵然元龍特偶一爲之尙無不可基則弊一生之精神成此一集可謂宋人之楮葉矣

【蓬莊詩集六卷】江西巡撫採進本 國朝沈虹撰虹字渭梁長洲人是集其所自編以作詩先後爲次起康熙丁亥訖雍正甲辰古今體共五百四首每卷之前皆有小引紀其歲月及所閱歷遭逢

【雄雉齋選集六卷】江蘇周厚堉家藏本 國朝顧圖河撰圖河字書宣江都人康熙己丑進士官翰林院編修圖河爲江左十五子之一其詩古體多學眉山近體多學劍南詠物諸作亦頗新穎而在同時諸人之中尙未能籠罩一切也

【青溪詩偶存十卷】江蘇巡撫採進本 國朝蔣錫震撰錫震字豈潛宜興人康熙己丑進士是集分二十二種曰輟耕草北征集渡河集贊脫集北游草楚游草還山草汗漫吟北行草歸耕草章江草還山草後北游草涉江草洛遊草灌園草游燕草廬中吟後章江草還山吟金臺草學製集自己已至壬寅凡十四年之作皆以年編次

【退谷文集十五卷詩集七卷】兩江總督採進本 國朝黃越撰越字際飛上元人康熙己丑進士改庶吉士所著四書大全合訂及選刻制義如明文商今文商墨卷商考卷商之類皆盛行一時蓋平生精力

注於講章時文。此集所著詩古文。乃以餘暇兼治者。其尙書古今文辨。惟以蔡傳折服諸家。三傳得失辨。惟以胡傳斷制衆論。亦仍舉業繩尺也。

【圭美堂集二十六卷】浙江巡撫採進本 國朝徐用錫撰。用錫字畫堂。宿遷人。康熙己丑進士。官翰林院編修。是集詩十卷。文十六卷。乃其族子鐸及門人周毓峯所校刊。用錫從學於李光地。作文以樸澹爲長。生平書法頗工。集中字學劄記二卷。皆自道其心得。其他題跋。亦辨論法帖手跡者居多。

【青要集十二卷】浙江巡撫採進本 國朝呂謙恆撰。謙恆字天益。河南新安人。康熙己丑進士。官至光祿寺卿。謙恆嘗讀書青要山。因以名集。其詩純作宋格。疎爽有餘。而亦頗傷樸直。如洗象行之類。皆病於太質。

【吾廬遺書】無卷數 江西巡撫採進本 國朝陶成撰。成有皇極數鈔。已著錄。是集爲其子其憲所編。皆所作雜文。頗純正有軌度。而稍狹於波瀾。其中象緯考一篇。有錄無書。意傳寫佚之。或訂定時刪去。而誤留其目也。

【性影集八卷】江蘇巡撫採進本 國朝王時憲撰。時憲字若千。號禊亭。太倉人。康熙己丑進士。由宜興教諭改翰林院庶吉士。是編凡八集。集各一卷。曰水邊林下。稟曰桐溪。稟曰無隱林。稟曰靜寄軒。稟曰莊謙。稟曰荆溪。稟曰楚遊。稟曰粵遊。稟其名性影者。蓋取邵子情爲性影之說也。集中近體。頗饒風致。擬古諸作。則隨意抒寫。不甚求工。

【改堂文鈔二卷】江蘇巡撫採進本 國朝唐紹祖撰。紹祖字次衣。江都人。康熙己丑進士。由庶吉士改

刑部主事官至湖州府知府仍入爲刑部員外郎告歸卒紹祖少師姜宸英登第出安溪李光地之門故其文蒼勁有師法此集乃晚年手自刪定僅存四十三篇皆其生平得意之作也

【石川詩鈔三卷】浙江巡撫採進本 國朝方觀撰觀字近叟江都人康熙己丑進士官至西安布政使是集乃其少子柱山所編凡各體詩二百六十餘首其題朱彝尊手書詩冊有曝書亭下自鈔詩想見蒼茫獨立時不是到門親受業唐音宋格有誰知蓋嘗從學於彝尊者也

【師經堂集十八卷】浙江巡撫採進本 國朝徐文駒撰文駒字子文鄞縣人康熙己丑進士是集爲文駒所自編凡文十三卷詩五卷前有孫勳序稱其潛伊洛之淵源探韓歐之骨髓沈浸釀郁積有年歲自序亦主於自達其情今觀其集滔滔而出足以暢所欲言然未能固而存之也

【墨瀾亭集】無卷數

江西巡撫採進本

國朝帥我撰我字備皆號簡齋奉新人康熙辛卯舉人江西

古文自艾南英倡於前魏禧等和於後踵而起者雖所造深淺不同而大都循循有舊法是集亦其一也舊刊版於南昌所載未備雍正乙卯其子念祖屬徐廷槐彙取已刻未刻諸稟裏爲此本凡一百四十篇

【殘本雲川閣詩集九卷】兩江總督採進本 國朝杜詔撰詔字紫綸無錫人康熙乙酉聖祖仁皇帝南巡迎鑾獻詩命供職內廷壬辰會試榜後特賜一體殿試改庶吉士是編總題雲川閣集而僅有古體詩詩又起於卷三終於第十二前無目錄其版又近時新刻不喻其故或裝緝者佚之耳

【閻邱詩集六十卷】兩淮馬裕家藏本 國朝顧嗣立撰嗣立有溫飛卿詩註已著錄江南通志文苑傳稱嗣立博學有才名尤工詩所居秀野草堂嘗集四方知名士觴詠無虛日風流文雅照映一時曾撰元

詩選四集採摭略備蓋其性之所近故詩亦往往似之

【今有堂詩集六卷附茗柯詞一卷】編修程晉芳家藏本 國朝程夢星撰夢星字午橋號香溪江都人康熙壬辰進士官翰林院編修家有篠園擅水竹之勝日與賓客吟詠其中年七十七乃卒是編分六集曰漪南集蠶餘集五覲集山心集琴語集就簡集末附茗柯詞其詩略近劍南一派而間出入於玉溪生詞亦具南宋之體但格力差減耳

【二水樓詩集十八卷文集十卷】江西巡撫採進本 國朝李茹旻撰茹旻字履如臨川人康熙癸巳進士官中書舍人嘗預修廣西通志撫州府志所作凡例及諸傳序皆載集中

【朱圉山人集十二卷】陝西巡撫採進本 國朝輩建豐撰建豐字子文號渭川又號介亭伏羌人康熙癸巳進士官至翰林院侍讀學士是集詩文各六卷又以補遺之文附於詩末大抵平實簡易無擅勝之處亦無踳駁之處

【三華集四卷】兵部侍郎紀昀家藏本 國朝梁機撰機字仙來泰和人康熙癸巳進士是集機所自編分四子部一曰入洛志勝多題詠古蹟之作一曰燕雲詩鈔隨侍其父宦游京邸之作皆王士禛選定一曰徵草則乾隆元年薦舉博學鴻詞召試入都之作一曰還草則試不入格歸途之作也

【練溪集五卷】山東巡撫採進本 國朝傅米石撰米石字立元鉅野人康熙癸巳舉人是集凡文二卷詩二卷雜記一卷前有其門人李包序後有其子爾德所作家傳其古文頗謹嚴有法度如琢磨偶記序誤以碧雲駿爲白獺髓引據或疎管蔡論謂周公勝季友殊爲贅衍季札論責以當爲伯夷泰伯之逃亦

爲吹索然其他率不失醇正雜說持論亦平允其曰讀書之人屏伏田里不敢爲崎邪之行不敢爲詭激之論不敢著非聖之書謹身力行以爲齊民先是即所以報君父可謂有德之言其誤以鉤轄爲蟬之類特小失耳惟古詩以文筆爲之猶未乖大雅近體則皆不入格甚至以海若押入馬韻是蘭若之若也以刻鏤讀爲平聲是屬鏤之鏤也吟詠非所擅長而雜然編錄轉爲全集之累是則其後人之過矣

【約園詩鈔二卷】福建巡撫採進本 國朝郭_公撰雍字仲穆一字書禪福清人約園其號也康熙癸巳

舉人是集各體詩共二百餘首雍自謂前後所作多屬近體於古體歌行間存一二樂府則有待而未及今觀其詩惟五言律詩頗有局度餘皆平平詩不沿溯於古而先求之偶儼之格終不能探其本也

【瓦缶集十二卷】浙江巡撫採進本 國朝李宗渭撰宗渭字秦川嘉興人康熙癸巳舉人初於康熙丁

亥自編其詩爲瓦缶集三卷後又有永懷集一卷附刻以行宗渭沒後其壇高衡乃裒其遺詩編爲樂府一卷古體九卷近體二卷仍以瓦缶爲名從其初稱也其詩古體多於近體五言多於七言大旨以漢魏六朝唐人爲法而不屑爲宋元之格故字句率有古意昔人論林鴻之詩如唐摹晉帖者其庶幾乎

【若菴集五卷】兩江總督採進本 國朝程庭撰庭字且碩號若菴歙縣人是集文一卷次詩一卷次詩餘一卷次停驂隨筆一卷康熙癸巳庭至京祝釐隨日紀行所作附以詩詞次春帆紀程一卷則自揚州至歙往返所作亦有詩詞附焉

【嗜退山房稟五卷】江西巡撫採進本 國朝帥仍祖撰仍祖字宗道號介亭山人奉新人是集乃仍祖自編其康熙癸巳甲午二年所作凡詩二卷文三卷

【空明子詩集十卷又八卷文集六卷又二卷雜錄一卷詩餘一卷】江蘇巡撫採進本 國朝張榮撰。榮字景桓，華亭人。自序謂生平共得古文雜作六百餘首，詩三萬餘首，詩餘一千五百餘首，歌謠三百餘首。康熙甲午檢出盡付祖龍，僅存三十分之一，即是編也。詞意多放曠不羈。

【挹青軒詩藁一卷】江蘇巡撫採進本 國朝華浣芳撰。浣芳蘇州女子，華亭張榮之妾也。年二十三而卒，榮刊其遺詩，自爲作序，述其九歲時夢見唐太宗召有唐一代諸詩人教之作詩，其事甚怪。榮好爲遊戲之文，殆亦寓言耶？

【龍溪草堂集十卷】山東巡撫採進本 國朝王世睿撰。世睿字道存，章邱人。康熙乙未進士，官上海縣知縣。世睿初改庶吉士，及散館仍外補。故是集多館課之作。至第九卷金陵宦橐中八勸八戒詩，意求通俗，然太質勝於文矣。

【陳玉几詩集三卷】禮部主事任大椿家藏本 國朝陳撰撰。撰字楞山，號玉几，鄞縣人。以書畫遊江淮間，窮愁寡合，故其詩多悽斷怨咽之音。是編刻於康熙丙申，蓋其中年所作。首曰繡鍊集，一卷。次曰玉几山房吟，一卷。次曰玉几山房擬古詩，一卷。皆戛戛獨造，如其爲人，雖未及古，要能離俗。惟擬古詩中多載勝流評語，仍沿明末山人之習耳。

【雲溪文集五卷】兩江總督採進本 國朝儲掌文撰。掌文字曰虞，一字越漁，宜興人。康熙丁酉舉人，官四川納溪縣知縣。納溪舊名雲溪，故掌文以雲溪自號。是集又名雲溪隨筆，自儲欣以古文詞有名，其家父子兄弟多以此相鍛厲。掌文爲欣之孫，得其指授爲多。今世所傳欣選左國史漢及唐宋十家文，即其

甄錄以授掌文者也。

【據梧詩集十五卷】兩淮馬裕家藏本 國朝管榆撰。榆有師宗州志已著錄。是編凡吹萬集二卷。柏軒草二卷。修琴閣集二卷。鷗馴集二卷。天外集二卷。圃華集二卷。寓槩囊三卷。邵長蘅序稱其詩先學劍南後學少陵。今觀所作大抵先入者爲主也。

【近道齋文集六卷詩集四卷】吏部主事張慎和家藏本 國朝陳萬策撰。萬策字對初。一字謙季。安溪人。徙於晉江。康熙戊戌進士。官至詹事府詹事。緣事降翰林院檢討。終於侍讀學士。萬策以康熙癸酉舉於鄉。因公車者二十六年。久從李光地游。多得其指授。然平生詩文多散佚不收。此本乃乾隆癸亥。其子冕世所輯。其中西洋算法異同論頗能究其所以。然李光地施琅諸傳。軼聞舊事亦多可考云。

【白田草堂存藁二十四卷】兩江總督採進本 國朝王懋竑撰。懋竑有白田雜著已著錄。是集凡文二十卷。詩四卷。末附行狀一篇。其學長於考證。故全集以雜著爲冠。詩文則未能過人。其與方苞書。自謂筆力拖沓。不近古人。所謂人之知我不如我之自知。亦足見其學問之篤實也。

【莊元仲集一卷】福建巡撫採進本 國朝莊亨陽撰。亨陽有算學已著錄。此集僅文十二篇。乃其官淮徐道時所上河防條議也。

【綠蘿山房文集二十四卷詩集三十三卷】江蘇巡撫採進本 國朝胡浚撰。浚字希張。號竹巖。會稽人。康熙庚子舉人。是編文皆駢體。浚自爲之註。前有魯曾煜序。稱仿韓非子有經有傳例。然韓非子經傳各自爲條。其著書句下自註者始班固漢書藝文志。作文句下自註者始謝靈運山居賦。浚蓋用靈運例也。

【寒香閣詩集四卷】山東巡撫採進本 國朝鄧鍾岳撰 鍾岳有知非錄已著錄是集爲乾隆乙亥其子汝功汝敏所編 凡古今體詩一百九十二首 其詩頗溫厚和平無血脈儕張之狀而材地稍弱尙未能韻頌古人

【墨麟詩十二卷】浙江巡撫採進本 國朝馬維翰撰 維翰字墨麟海鹽人康熙辛丑進士官至四川川東道其詩以縱橫排奡爲長意之所向不避險阻然神鋒太雋者居多

【秋塍文鈔十二卷三州詩鈔四卷】浙江巡撫採進本 國朝魯曾煜撰 曾煜字啓人秋塍其別號也會稽人康熙辛丑進士改庶吉士未授職乞養親歸教授生徒終於家是集文一百二十一篇中多考證之作其文氣頗剽急蓋才性使然若續中山狼傳之類雖規撫毛穎然不作可也目列易本末論六十四篇易纂例八十篇而有錄無書蓋均未刻又廣東祥符二志凡例亦有錄無書殆以已見於兩志歟其詩以三州名集自序曰杭州汴州廣州也蓋其歷主講席游蹤所及之地云

【最古園二編十八卷】江蘇周厚堉家藏本 國朝羅人琮撰 人琮字紫蘿湖南桃源人康熙辛丑進士官至監察御史是集人琮所自定其云二編以尙有初刻最古園集二十四卷也然其初刻今未之見此集詩文則大抵以才氣用事曼衍縱橫者也

【陸堂文集二十卷詩集十六卷續詩集八卷】浙江巡撫採進本 國朝陸奎勳撰 奎勳有陸堂易學已著錄是集前有自序謂在長洲汪琬秀水朱彝尊之間其文內序問考辨諸篇亦頗博辨然說經好爲異論頗近毛奇齡尙不及琬與彝尊也

【唐堂集六十一卷】江蘇巡撫採進本 國朝黃之雋撰。之雋有香屑集已著錄。是集凡五十卷。又補遺二卷。續集八卷。皆之雋所手編。各有自序。末附冬錄一卷。則所自撰年譜也。之雋之學。排陸王而尊程朱。多散見所作詩文中。持論甚正。而綜覽浩博。才華富贍。興之所至。下筆不能自休。往往溢爲狡猾游戲之文。不免詞人之結習。又名譽既盛。贈答遂繁。牽率應酬。不能割愛。榛楓勿翦。所存者不盡精華。譬之古人。殆陸機之患才多矣。

【雲在詩鈔九卷】浙江巡撫採進本 國朝查祥撰。祥字星南海寧人。康熙辛丑進士。官翰林院編修。祥早歲嘗舉博學鴻詞。晚乃登第。年至八十餘而歿。詩集未經刊行。此流傳寫本也。

【小蘭陔集十二卷】福建巡撫採進本 國朝謝道承撰。道承字又紹號古梅。閩縣人。康熙辛丑進士。官至內閣學士兼禮部侍郎。是集詩十卷。文二卷。道承假歸養親。故取南陔補亡詩語名集。而集中所載。則應制館課之作。皆在焉。不專家居作也。其中碑帖題跋。亦頗具鑒賞。

【桐村詩九卷】江西巡撫採進本 國朝馮詠撰。詠字夔鵬。金谿人。康熙辛丑進士。官翰林院編修。是編一卷爲一集。一曰江漢集。二曰日下集。三曰章江集。四曰南海集。五曰南海二集。六曰公車集。七曰玉堂集。八曰京口集。九曰黔中集。分年編次。各以作詩之地爲名。始於康熙癸巳。迄於雍正己酉。共十七年之詩。前有自序。題康熙甲午。蓋江漢集之序。刊版時取冠全詩爾。

【崇德堂集八卷】直隸總督採進本 國朝王植撰。植有四書參註已著錄。此集植所自編。其學主於敦勵名節。而事事有濟於物。故集中所載多居官案牘之文。頗足見其生平。其考論經籍。則好以意推理。斷

不能一一徵於古也。

【偶存草】無卷數 直隸總督採進本 國朝王植撰。是集亦植所自編。植喜講學。故其詩全沿擊壤集之派。

【牆東雜著一卷】浙江巡撫採進本 國朝王汝驤撰。汝驤字雲衢。所刻制義或自書曰云劬。又自書曰耘渠。皆以同音假借也。金壇人。由貢生官通江縣知縣。此編乃所作古文。其以牆東爲名。蓋用後漢王君公事。汝驤掉鞅文壇。事殊牛僧。殆以其王姓斷章取義耶。文凡二十一篇。前六篇皆經說。後十五篇則皆史評也。其術序記謂學記術有序即遂也。辨舊志讀術爲州之非。考春秋秦伯使術來聘。公穀作使遂。則汝驤之說實闡合古義。其苟或論上下二篇。反覆推獎。以爲有道之士。則過矣。

【與梅堂遺集十二卷耳書一卷鮆話一卷】江蘇巡撫採進本 國朝佟世思撰。世思字儼若。正藍旗漢軍。以蔭生官恩縣知縣。是集凡詩十卷。詞一卷。雜文一卷。其弟世集裒而刻之。末附耳書一卷。皆記所聞見荒怪之事。分人物神異四部。鮆話一卷。則以公事至恩平。而記其風土也。

【金闡齋集十二卷】江蘇巡撫採進本 國朝金敞撰。敞字廓明。號闡齋。武進人。其學出於東林。是書首載家訓紀要。次默齋湯先生述略。次共學山居會約。次自知日錄。次讀史筆記。次古今體詩。次雜著。次可凡編。次客窗偶記。次師古約言。次宗約宗範。其中家訓紀要一卷。乃其父所箚記。以訓子孫。敞更纂而錄之。故冠首云。

【前溪集十四卷】浙江巡撫採進本 國朝唐靖撰。靖字聞宣。武康人。康熙中諸生。是集詩八卷。文五卷。

二集詩一卷。其詩頗具風骨。間傷率易。其文亦然。五卷論水利樂律諸條。則科舉答策之類耳。前溪在武康縣治南。源出銅峴山。在六朝爲繁會地。所謂前溪舞者是也。

【華林莊詩集四卷】江蘇巡撫採進本 國朝姚孔鐸撰。孔鐸字梁貢。號于巢。桐城人。康熙中諸生。其詩七言絕句。工於寫景。如垂楊枝上鶯捎蝶。撼得飛花破水痕之類。亦殊有晚唐風味。所謂香車金犧陌上。留連者也。至黃雲白雪門前路。蕎麥田中作菜花之類。則刻畫太甚。無情景交融之致矣。

【瓠尊山人詩集十七卷】檢討蕭芝家藏本 國朝夏熙臣撰。熙臣字無易。孝感人。七歲補諸生。以歲貢官安陸府敎授。初著有巢雲閣詩十五卷。後增以新作。重編爲此集。其詩才情富贍。故往往疊韻。至五六。又和阮籍詠懷。擬李東陽樂府。殆遍然連篇累幅。瑕瑜不免互見。亦所謂武庫之兵。利鈍互陳者矣。

【道腴堂詩集四卷】江西巡撫採進本 國朝曹煜曾撰。煜曾號麓蒿。上海人。康熙末貢生。是集爲其孫錫寶所編。石倉世纂之第一種也。凡詩一百五十五首。煜曾爲雲間董俞弟子。故其詩聲律格調頗有師法。然卷中但存近體。而無古詩。王延年序稱其懶不自惜。散佚頗多。今所傳者。皆其孫口授。豈訓課時。惟取聲律諧適。易於記誦故耶。

【長嘯軒詩集六卷】江西巡撫採進本 國朝曹炳曾撰。炳曾字祖望。號春浦。上海人。康熙末貢生。炳曾之弟也。是集爲石倉世纂之第二種。凡詩四卷。後附詩餘一卷。雜著一卷。其生平所注意者。在於詩餘。駢體。其詩亦專學晚唐。以纖麗自喜。

【放言居詩集六卷】江西巡撫採進本 國朝曹炳曾撰。炳曾字爲章。號巢南。上海人。康熙末諸生。煜曾

之從弟也是集爲石倉世纂之第三種。凡詩五卷，後附雜著一卷，并從子一士所撰墓誌銘。其詩與煜曾道腴堂集格律相近，而才地稍遜焉。

【隨村遺集六卷】江西巡撫採進本。國朝施環撰。環字隨村，宣城人。侍讀閔章之孫也。此集爲杭世駿所編，其詩酷學其祖，而風格稍峭，邊幅稍狹，則根柢之深厚不及也。

【有懷堂詩文集一卷】江西巡撫採進本。國朝田肇麗撰。肇麗字念始，號蒼厓，戶部侍郎霆之子。官戶部郎中，肇麗負雋才，而屢試不第，其入官也，以任子故。述懷詩有慚非科名人句，蓋吟咏之間，嘗以是耿耿云。

【靜便齋集十卷】浙江巡撫採進本。國朝王曾祥撰。曾祥字寧徵，仁和人。康熙末諸生，與厲鶚、金農諸人相唱和。是集前五卷爲詩，後五卷皆雜文。靜便齋者，館於義橋陳氏時所葺，取謝靈運還得靜者便句名之，有所爲記，見於集中。前有雷鋐所撰兩王生小傳，一謂曾祥，一謂江都王世球也。

【鍾水堂詩三卷】山東巡撫採進本。國朝顏肇維撰。肇維字次雷，曲阜人。官臨海縣知縣。是集乃其官浙東時所作，多學南宋諸家。

【帶月草堂詩集一卷】山東巡撫採進本。國朝顏懷禮撰。懷禮字約亭，曲阜人。襲世職爲五經博士。好學，喜爲詩。早年夭逝，故骨格未成。此集爲其弟懷繹所編，前有康熙後壬寅，譙縣李克敬序。亦稱天假以年，俾盡其勤，何遽不如鏤肝斲髓者之所爲也。

【青嶼彙存】無卷數。浙江巡撫採進本。國朝張安絃撰。安絃字琴父，烏程人。其文以才氣勝，而喜事

塗澤詩則音節疎放亦未能磨礱圭角。

【桐乳齋詩集十二卷】浙江巡撫採進本 國朝梁文灝撰。文灝字谿父，錢塘人。大學士詩正父也是集。凡詩九百餘首，而同時唱和諸作亦間附錄。杭世駿序稱其壯時南浮衡湘，北抵碣石，踐歷嵩華，迴旋宋衛之郊。蓋頗耽懷山水者，故記游之詩爲最多焉。

【橡村集四卷】山東巡撫採進本 國朝朱紹撰。紹字子青，號橡村，歷城人。候補主事，嘗學詩於王士禎。所作具有法程，而早年夭逝，故骨格未成。是集分四種：曰風香集，曰吳船書屋集，曰觀稼樓詩，曰雲根清壑集。自吳船書屋以下皆士禎之所評定也。

【蒼雪山房稟一卷】山東巡撫採進本 國朝朱綱撰。綱字子驄，歷城人。官至福建巡撫，與兄紹絳皆學詩於王士禎。是集亦士禎所評定。詩頗清淺，蓋少作也。

【吾友于齋詩鈔八卷】浙江巡撫採進本 國朝張錫爵撰。錫爵字擔伯，號中巖，嘉定人。寄居吳江。是集前有雍正乙巳張雲章序，題曰原序，蓋爲其舊稟而作。又有乾隆辛酉朱稻孫序，則刊此本時所作。其詩酷摹王士禎，亦往往得其一體。其齋名吾友于者，取杜甫岳麓寺詩「山鳥山花吾友于」語也。

卷一百八十五

集部三十八

別集類存目十二

【蔗尾詩集十五卷文集二卷】福建巡撫採進本 國朝鄭方坤撰 方坤有經稗已著錄 方坤天分既高記誦尤廣故其詩下筆不休有凌厲一切之意尤力攻嚴羽滄浪詩話詩不關學之非然於澀字險韻恆數十疊雖間見層出波瀾不窮要亦不免於炫博此又以學富失之所謂矯枉者必過直也其詩凡分十五集曰刪餘草曰公車草曰木石居草曰公車後草曰木石居後草曰丁年小草曰叢臺稟曰春明草曰廣川稟曰酒市稟曰一粟齋稟曰瓶花齋稟曰杞菊軒稟曰詩話軒稟皆古今體詩曰青衫詞則詩餘附錄者也文集二卷亦大抵儻體居多蓋其根柢在六朝也

【樹人堂詩七卷】江西巡撫採進本 國朝帥念祖撰 念祖字宗德號蘭臯奉新人雍正癸卯進士官至陝西布政使緣事謫戍軍臺沒於塞外是集前有何焯序稱念祖塞上所作有多博吟今未見此七卷則念祖官陝西時所自編也念祖以時文鳴一時務以幽渺之思擺脫陳因其詩亦清刻不俗但平生精力盡於八比徒以餘力爲之未能自成一隊耳

【涵有堂詩文集四卷】福建巡撫採進本 國朝游紹安撰 紹安號心水福清人雍正癸卯進士官至安府知府是集詩二卷文二卷紹安守南安幾二十年故詩文多南安所作其文務爲奇崛語詩亦欲以生僻見長

【南陔堂詩集十二卷】編修徐天柱家藏本 國朝徐以升撰 以升字階五號恕齋德清人雍正癸卯進士官至廣東按察使是編爲其孫天柱天驥所刊分年編次曰學步集雪泥集湘灘集秋帆集夢華集忽至草黃樓草嶠草南還集黔游草煙江疊嶂集閒閒集凡十二種

【王己山文集十卷別集四卷】江蘇巡撫採進本 國朝王步青撰。步青有四書本義匯參已著錄。金壇王氏以八比稱於世者。凡六人。所謂王氏六子是也。六子之中。汝驤及步青名尤著。汝驤文神思澹遠。取徑單微。步青則法律嚴謹。不失尺寸。在近時號爲正宗。於古文則餘力及之。非所專門也。其集原名竹里草堂遺稟。乃步青沒後。其子士鼈所編。後寧化雷鋐督學江蘇時。從士鼈取其稟本。重爲刪定。凡存九十九篇。勒爲十卷。用步青別號改題。今名又別集四卷。皆其時文選本之序論。則士鼈裒輯編次附刊以行。蓋步青困諸生者二十餘年。至康熙甲午。乃舉於鄉。往來公車又十年。至雍正癸卯。始成進士。旋以病乞歸里居。教授惟以評選時文爲事。平生精力盡在於是。故講論時文之語。至於積成卷帙。考論文之書。自摯虞文章流別後。凡數百家。其專論場屋程式者。則自元倪士毅作義要訣始。自爲一編。於例當入詩文評類。以其原附本集之末。故仍其舊焉。

【江聲草堂詩集八卷】浙江巡撫採進本 國朝金志章撰。志章字繪卣。仁和人。雍正癸卯舉人。官至口北道。是編分七集。曰敝帚。曰梅東。曰始游。曰鏡中。曰瞻雲。曰谷雲。曰漁浦。歸耕其詩。五言古體多近蘇軾。七言古體多近溫庭筠。近體多近陸游。范成大。

【謙齋詩稟二卷補遺一卷】浙江巡撫採進本 國朝曹庭樞撰。庭樞字六翬。嘉善人。雍正癸卯副榜貢生。乾隆元年嘗薦舉博學鴻詞。集中載有午門謝頌月廩恭紀詩。卽其事也。是集亦皆其游京師時所作。【司業文集四卷】江蘇巡撫採進本 國朝陳祖范撰。祖范有經咫已著錄。其爲文不規規於摹古。而學有根柢。暢所欲言。亦自合古人法度。其中如方孝孺死節論。讀禮記述史述斂用喪服議。陳貞女合葬議。

王罕皆文彙序。汪西京文彙序。王次山詩序。樂府解。皆有可觀。而如記昌黎集後務爲新論。別號舍文。忽作俳體。松筠堂宴集詩序。雜以儻詞。又多收一切應俗之作。蓋編錄時務盈卷帙。一概登載。未免失於刊除。使簡汰精華。十存三四。豈不翹然作者哉。

【司業詩集四卷】江蘇巡撫採進本 國朝陳祖范撰。前有自序。題乾隆壬申。而第四卷乃題自乙丑至甲戌詩。蓋又有所續入。如古人後集別集例也。其詩直抒胸臆。不煩繩削。於古人中去白居易爲近。效陶孫所謂事事言言。皆著實者也。自序有曰。詩之作出於無心。則其情真。又必各有所爲。則其義實。故一國之事。繫一人之本。而匹夫匹婦之歌吟。可以察治。忽也。其論洞悉本原。非明以來彫章刻句之流所能見及。又云。後之詩人。既以詩自命。人亦以詩相屬。於是外物爲主。而詩役焉。詩爲主。而心役焉。於是無真性情。真比興。然而情實彌隱。詞采彌工。義理彌消。波瀾彌富。而又格律以繩之。派別以嚴之。時代以區分之。回視詩教之本來。其然乎。其不然乎。其論亦切中流弊。劉勰所謂古之詩人。爲情而造文。今之詩人。爲文而造情者。祖范所言。殆庶幾焉。然文以載道。理不可移。而宋儒諸語錄。言言誠敬。字字性天。卒不能與韓柳歐蘇。爭文壇尺寸之地。則文質相宜。亦必有道矣。觀祖范之序。而其詩所長所短。蓋可以想見也。

【王艮齋集十四卷】江蘇巡撫採進本 國朝王峻撰。峻字次山。常熟人。雍正甲辰進士。官至江西道察院御史。是編凡詩十卷。文四卷。其吳中先哲諸傳。則修蘇州府志時所撰。亦併附之集中云。

【鐵經餘草十六卷】侍講劉亨地家藏本 國朝王文清撰。文清有周禮會要已著錄。此其所作詩集。前有論詩法十條。則其平生心得之語。而其門人錄以冠集者也。

【明史雜詠四卷】浙江巡撫採進本。國朝嚴遂成撰。遂成字海珊，烏程人。雍正甲辰進士。官雲南知州。詠史之作起於班固。承其流者唐胡曾、周曇皆用近體。明李東陽則用樂府體。遂成此編賦明一代之事。古體近體相間。故名曰雜詠。嚴震直一首力辨史彬致身錄之誣。雖子孫之詞實則公論。至於劉三吾一首謂太祖欲立燕王爲三吾所沮。釀靖難之禍不爲無見。至周公成王本一家事。猶賢於王莽篡句。則謬矣。姚廣孝二首盛推其功。比以蕭何、李泌且有特地。開科長取士不知漏落幾多人句。王越、王驥、王瓊三首謂三人之交結宦侍乃借其陰助以濟國事。非爲身家之計。比之郭子儀之俯仰魚朝恩持論皆有意抑揚。故翻定案。李夢陽一首詞多詆斥。併有附記曰：北地雖非西涯門人。然如王九思以仿西涯體中選。其餘諸子多有親承指授者。皆奪於北地之焰。改轍背之。猶之北地背之也。云云。夫文章公器。各自成家。原非爲植黨報恩之地。況夢陽與東陽本風馬牛不相及。而忽坐以背東陽之罪。尤未免深文鍛煉。踵明末門戶之舊論矣。

【絳跗閣詩稟十一卷】浙江巡撫採進本。國朝諸鈞撰。錦有毛詩說已著錄。是編古今體詩分三十集。自康熙甲申至乾隆壬午五十九年之作。共一千五百餘篇。

【賜書堂詩選八卷】編修吳壽昌家藏本。國朝周長發撰。長發字蘭坡。別號石帆。會稽籍山陰人。雍正甲辰進士。選庶吉士。散館外補廣昌縣知縣。又改樂清縣敎諭。乾隆丙辰召試博學鴻詞。授檢討。官至侍講學士。後降補侍講。長發詩才敏捷。操筆即成。故富贍有餘。而亦微傷於快。平生所作計逾萬首。此集八卷。蓋汰存十之一云。

【小山全集二十卷】江蘇周厚培家藏本 國朝王時翔撰時翔字臯謨一字抱翼號小山鎮洋人雍正戊申由諸生薦舉授晉江縣知縣官至成都府知府是集凡詩稿八卷詩餘四卷文稿八卷詩稿分初續後三稿詩稿分五集曰香濤曰紺寒曰青綰樂府曰初禪綺語曰旗亭夢曉

【就正草一卷】江西巡撫採進本 國朝徐璽撰璽號雷谿進賢人雍正乙酉拔貢是編乃其文集前題云續刻就正草則必先有初刻今未之見前有吳士玉序而卷中有祭士玉文殆刻在序後耶

【松源集】無卷數 兩江總督採進本 國朝孫之騷撰之騷所輯尙書大傳已著錄是集凡五種其題曰松源紀行者初取道富春赴慶元任作也曰龍泉舟中雜記者歲試至處州作也曰經說者告諸生五經源流紀也曰敦行錄者與諸生立條約及經傳雜訓也曰雜文者其酬應之作也集刻於雍正己酉庚戌間慶元古松源地故以爲是集之總名焉

【春及堂詩集四十三卷】太常寺卿倪承寬家藏本 國朝倪國璉撰國璉有康濟錄已著錄是集乃乾隆壬辰其子承寬所刊凡竹立園集一卷南隱山房小草一卷橘山游草二卷文杏館集一卷浮湍集一卷楓花草一卷松鱗書屋唱和詩一卷庚子詩草一卷剡東游草一卷廬江游草二卷西江游草三卷南游草二卷湖南吟藁二卷燕雲集一卷竹窗集三卷溟行集八卷春闌詩一卷星沙奉使集二卷潞河吟一卷庚申南行集三卷嘉陰書屋集三卷皆國璉嚴自刪汰惟存其得意之作故每卷多者不過四十餘首少者或十餘首云

【四焉齋詩集六卷附梯仙閣餘課一卷拂珠樓偶鈔二卷】江西巡撫採進本 國朝曹一士撰一士字

謗庭號濟寰上海人雍正庚戌進士官至兵科給事中是編乃其詩集石倉世纂之第四種也附載悌仙閣餘課爲一士繼室陸氏鳳池作刻於康熙壬辰又拂珠樓偶鈔一士之女錫珪所作刻於雍正甲寅

【四焉齋文集八卷】江西巡撫採進本 國朝曹一士撰石倉世纂之第五種也與其詩集同刻於乾隆庚午其論文之旨謂古文之所以稱古者乃意義之古非詞句之古有明潛溪遵巖荆川震川其文詞之近時者甚多不以此損其古意于麟元美字句之古幾於無一不肖而終與古遠觀其持論可以見其宗旨矣

【寒香草堂集四卷】江蘇巡撫採進本 檢討蕭芝家藏本 國朝劉元燮撰元燮字孟調湘潭人雍正庚戌進士官至山西道御史緣事降廣西布政司經歷所著有耨學齋藁梅垞吟篇什頗多是編古今體詩僅二百餘首乃其晚年所自訂也

【金管集一卷】江蘇巡撫採進本 國朝顧成天撰成天有離騷解已著錄其所作詩凡二千餘首嘗以質於蔡嵩嵩爲摘其中有關世教者八十三首鈔爲此集題曰金管用梁元帝事也

【花語山房詩文小鈔一卷附三重賦一卷燕京賦一卷】江蘇巡撫採進本 國朝顧成天撰是集乃雍正庚戌辛亥二年成天侍直內廷時所作花語山房即苑外直廬名也凡詩六十八首文二十三首以歲月先後雜編不分體裁又三重賦一卷成天爲諸生時恭逢聖祖南巡所獻燕京賦一卷併自註則雍正癸卯成天赴京會試時作也

【桑弢甫集八十四卷】浙江巡撫採進本 國朝桑調元撰調元有論語說已著錄是集詩十四卷續集

二十卷五嶽詩二十卷文三十卷調元才鋒踔厲學問亦足以副之故詩文縱橫排奡擺落蹊徑毅然自爲一家而恃其才學不主故常豪而失之怒張博而失之蔓衍者亦時有之所作鎮海樓詩至七言長律二百韻古人無是格也其所以長卽其所以短乎

【柯椽集一卷】侍講劉亨地家藏本 國朝周宣猷撰。宣猷字辰遠長沙人雍正癸丑進士官至浙江鹽運通判是集凡雜文五十七篇駢體及賦亦參錯其間前後亦無序跋似乎未定之藁其後人錄之成帙也末附陳兆崙所作傳一篇載宣猷所著尙有史斷史記難字南北史顧眠雲集禾中雜韻卷施小草諸編集中又有風鈴餘韻自序一篇亦所作詩集今惟卷施小草及此集存餘皆未見

【雪舫詩鈔八卷】侍講劉亨地家藏本 國朝周宣猷撰其詩自乾隆辛未迄丁丑分年編次前七卷名卷施小草後一卷則南巡紀盛皇太后萬壽詩各三十首

【柳漁詩鈔十二卷】浙江巡撫採進本 國朝張渭撰渭字鷺洲錢塘人雍正癸丑進士官至給事中是編分于野雞木輒景溟行癡牀海槎帖懷皖游鵠風囊恥十集渭與金志章厲鶚等以詩相鏹厲故集中與諸人唱和爲多

【秋水齋詩集十五卷】浙江巡撫採進本 國朝張映斗撰映斗字雪子烏程人雍正癸丑進士官翰林院編修是編凡十四集首曰或可存集次江上集次釣磯集次雲林集次范湖集次日下集次水籤集次新館集次內舍集次新館後集次舊雨集次清祕集次瀛臺集次使星集皆其子守約守愚所編前有湯右曾序作於康熙乙未蓋其早年即爲右曾所賞識也

【寧遠堂詩集一卷】侍講劉亨地家藏本 國朝朱成點撰成點字司衡寧鄉人此集其所自編自序有云遷徒流離至庚子疾中閉門卻軌始多作詩以自遣而集中又有己酉下第詩蓋老於諸生者也

【松桂讀書堂集八卷】江蘇周厚堉家藏本 國朝姚培謙撰培謙字平山華亭人喜刻巾箱小本亦好事之士所著有春帆集刻於康熙庚子自知集刻於雍正甲辰樂府及覽古詩刻於乾隆己未此本乃乾隆庚申裒合諸編刪爲一集培謙自爲之序其諸集序亦仍列之於卷端

【舒曉齋存藁三卷】山東巡撫採進本 國朝黃溶撰溶字涪遠鄆城人雍正中貢生是集凡詩二卷詞賦共一卷皆未合古人尺度蓋鄉曲無師之學也

【桐陰書屋集二卷】山東巡撫採進本 國朝朱崇勳撰崇勳字彝存號怡園歷城人其詩沿新城末派清脫有餘而深厚不足

【湖上草堂詩一卷】山東巡撫採進本 國朝朱崇道撰崇道字帶存崇勳弟也其詩如寒煙依樹澹餘雪傍山明樵聲通澗底人影上蘆花頗有思致然寥寥數篇不成卷帙

【蠶桑樂府一卷】江西巡撫採進本 國朝沈炳震撰炳震有九經辨字瀆蒙已著錄此乃其增默齋詩集之一種自護種至賽神凡二十首皆七言長句蓋欲以當蠶畢報賽之曲也

【無悔齋集十五卷】浙江巡撫採進本 國朝周京撰京字西穆一字少穆錢塘人雍正中諸生是集爲同里厲鶚所定分年編次附錄全祖望所撰墓誌銘及同人掃墓詩鶚序以高岑豪健比之今觀其詩源出劍南在一時詩社中酒旗茗椀拈韻分題亦足傾倒流輩若方駕古人則又當別論矣

【實嬪齋詩集四卷】浙江巡撫採進本。國朝張時泰撰。時泰字平山，號六可，嘉興人。官桐城縣知縣。是集前有時泰自作實嬪先生傳，頗以曠達間適自許。傳末系以詩曰：嬪送窮愁嬪顧身，嬪趨權貴嬪干人。嬪尋枯句每經日，嬪作報書恆幾旬。幽賞嬪殊辜景物，遠游嬪已絕風塵。嬪眠嬪起情如醉，十嬪先生嬪是真。其詩格大抵似此也。

【亦廬詩集二十八卷】江西巡撫採進本。國朝湯斯祚撰。斯祚字衍之，號亦廬，南豐人。雍正中以歲貢生官江西新昌縣訓導。是集以編年爲次。其居家則有超遙書堂草，茗柯山房草。游楚則爲匡廬山草，泗陽草。泊歸而復出，則有茗柯山房後草。崇眞禪院草，沅湘草。充貢以後，則有北征燕山南轍諸草。爲學官以後，則爲宜豐草。俸滿草，回任草。宜豐後草。其詩筆力頗爽健，惟功候未深耳。

【芝壇集二卷】山東巡撫採進本。國朝張鵬翼撰。鵬翼有芝壇史案，已著錄。其詩文皆以講學爲宗，體格多近於語錄。

【江湖閒吟八卷】福建巡撫採進本。國朝王道撰。道字直夫，漳浦人。官金山縣知縣。卷首有黃之雋序，稱所著有鹿臯文集，有京華藁，今未見。此集題曰江湖間吟，乃其罷官後寓居朱涇所作。其版心則題曰鹿臯詩集，蓋其集總名鹿臯，以詩文分集，而詩集之中此爲一種也。據所自述，初學李夢陽，後乃變以王維、陸游，然先入者爲主矣。

【慎獨軒文集八卷】浙江巡撫採進本。國朝劉青霞撰。青霞字嘯林，襄城人。雍正中諸生。是集皆散體雜文，前有王心敬所作小傳，稱其酷愛司馬遷班固書，未嘗釋手。今集中有小傳二卷，史論一卷，蓋亦留

心史學者也。

【孱守齋遺藁四卷】江西巡撫採進本 國朝姚世鉅撰。世鉅字玉裁，號慧田，歸安人。平生學問以何焯爲宗，故全祖望爲其墓銘曰：慧田之學私淑義門，義門之徒莫之或先。人亦有言：墨守太堅，慧田不信禦侮兀然，每逢異幟，互有爭端，焦脣敝舌，各尊所聞，紀其實也。祖望誌又稱：馬曰璐、馬曰璿、張四科收拾其遺文，開雕又稱所著爲蓮花莊集八卷。此本書名卷數皆與誌不合，末有張四教跋，稱勒爲詩文各二卷，則又無所闕佚，不知何故也。

【蘊亭詩稾二卷】江蘇巡撫採進本 國朝金綰撰。綰字連城，先世居廣東，綰移居於江南，遂爲吳縣人。是集爲其子祖靜所編，前有錢維城序，稱其詩派出自嶺南，少年至京師，秋日游靈佑寺，有高雲不礙靜，晴日自知寒，爲新城王士禎所賞，又附載舊評數條。其一條云：才不富，卻有氣，如裴旻舞劍，非行陣之才，而亦能令吳道子長筆力。思不苦，卻自深，如帝釋天人不能參扣，聞大迦葉語，亦一一入真法藏語格。欲正却亦別，如蜀漢南唐，稱名甚正，論其立國，固是偏隅，亦頗得其似云。

【翰村詩稾八卷】編修周永年家藏本 國朝仲呈保撰。呈保字羹梅，號翰村，常熟人。是集前五卷爲呈保所自編，皆題曰行卷。第一卷曰辛集，第二曰壬集，第三曰癸集，第四曰甲集，第五曰後甲集。案唐時進士以所業投贊當路，謂之行卷，見於摭言等書者頗詳。是呈保終老山林，而名所作爲行卷，未喻其說。又文集以甲乙標目，始於文選諸賦，其兩集分甲乙者，爲李商隱樊南集一集以甲乙分卷者，爲陸龜蒙笠澤叢書，然皆以十干爲次。是集獨以辛壬癸甲爲次，亦莫明其故。第八卷題曰遺集，則乾隆癸亥，呈保旅卒。

於博山其友趙念所續編也。是保初學詩於同里馮武、武馮班從子也。故其詩格律色澤皆馮氏法。康熙辛丑復北至益都從趙執信受學。故其詩運意鏗鏗。則純用趙氏法云。

【梧江雜詠一卷】編修汪如藻家藏本。國朝劉雲峯撰。雲峯字秋治。南昌人。是編取梧州風景古蹟爲竹枝詞四十五首。各附註其下。亦頗詳悉。然皆因仍地志之舊文。無所考辨。

【在亭叢藁二十卷】江蘇巡撫採進本。國朝李果撰。果字碩夫。長洲人在亭其號也。是集凡雜文十二卷。後附詠歸亭詩鈔八卷。果之論文。謂弇州北地文古而忠乎似義烏延陵文真而忠乎淺欲救似與淺之病。惟在讀書窮理。故所作頗有矩矱而墨守太甚。亦未能變化也。

【樸庭詩藁十卷】編修吳壽昌家藏本。國朝吳爚文撰。爚文字璞存。一字樸庭。會稽籍。山陰人。雍正中國子監生。屢舉不第。生平游歷。一寄諸吟咏。前四卷其友人嚴遂成所選。後六卷則晚年所自訂也。

【孤石山房詩集六卷】浙江巡撫採進本。國朝沈心撰。心字房仲仁。和人。雍正中諸生。早從查慎行游。其詩亦頗有查氏法。

【抗言在昔集一卷】江西巡撫採進本。國朝沈冰壺撰。冰壺字心玉。山陰人。是編皆咏古七言絕句。而多考證文史。與他家詠古評論事蹟得失者又別。其學識頗爲拔俗。而有意示高。或流於誕。如論帝魏帝蜀一條。洞見宋人之癥結。論蘇氏父子之文。自相矛盾。一條足關其口論。續述鑑綱曰。諸條皆頗公允。論岳飛女銀瓶一條。極有根據。羊祜周恭帝二條。亦頗有推闡。至於以司馬遷之先黃老。後六經爲是以王充論衡。欲藉諸子正經之誤爲識。在董仲舒上。以莊子荀子爲兩大儒。以老子配論語。莊子配易。管子配

書離騷配詩荀子配禮史記配春秋續爲沈氏六經謂管子地員篇班固地理志伯仲禹貢而周禮職方有愧色皆未免有意駭俗不爲定論其論劍俠傳之詳似矣不知劍俠傳本無是書乃明人鈔太平廣記二卷爲之其論亢倉子爲影撰似矣不知爲王士元所補士元作孟浩然集序自言其始末最明頗爲失考又如國朝詩人自王士禎朱彝尊田玉梁佩蘭宋琬諸人無一不肆詆排國朝文人自黃宗羲毛奇齡汪琬姜宸英王源方苞諸人無一不遭指摘或加以醜罵至謂其不堪供唾且謂此外寥寥自鄙無識其意欲於百餘年中以第一人自命尤放誕矣

【二須堂集二卷】戶部尚書王際華家藏本 詠淇所自編二須者取諸葛亮學須靜才須學語也上卷書十二首序十九首下卷記二首傳六首論二首辨一首說四首題跋五首畫事二首家訓十八則其中知希子傳未聞其人意爲自寓之詞歟文雖不甚入古格而頗以扶持名教爲主集中別有仰編序蓋其筆記又有慕濱詩鈔序爲其詩集今皆未見

【雙樹軒詩鈔一卷】編修李中簡家刊本 國朝僧湛性撰湛性一名湛汎字藥根又曰藥菴本丹徒徐氏子居揚州之祇園菴故其詩卷亦自署爲江都初自刻所作爲藥菴集沒後其版散佚此本乃乾隆壬辰所重刊也其詩宗法王士禎惟沿溯於士禎唐詩十選之中故結體修潔時有雋語如所謂春風拂禪衣流鶯啼樹杪二月青滿林百花開已早者亦頗近自然然骨力未堅興象頗淺十首以外語意略同蓋聰明多而學問少故流連光景所就止於如斯耳

【香域內外集十二卷】兩淮馬裕家藏本

國朝釋敏膺撰敏膺蘇州花山翠巖寺僧是集乃其弟子聖

藥等所編外集詩文凡七卷內集五卷皆語錄偈語蓋釋家以釋爲內學儒爲外學耳

【敲空遺響十二卷】內府藏本 國朝僧如乾撰如乾字憩休四川人嘗主陝西興善燉煌等寺是集凡雜文八卷詩四卷

【餐秀集二卷】浙江巡撫採進本 國朝黃千人撰千人字證孫餘姚人宗羲之孫百家之子也官泰安縣丞是集爲其同官覺羅普爾泰所刊前有普爾泰序又有顏懋价序引嚴羽王士禎之說皆警館閣之士以抒其憤懋价字介子曲阜人以貢生官肥鄉教諭老而不第故其詞如是云

【梯青集】無卷數 檢討蕭芝家藏本 國朝項大德撰大德字立上漢陽人刲股療母不愈以哀毀卒是集凡賦二十七首詞四十一首吐屬頗韶秀而得年僅二十有六功候未深故骨格未能成就焉

【月湖贊藁一卷】江西巡撫採進本 國朝王樸撰樸有讀畫錄已著錄是集僅文二十四首又多小品蓋猶明季山人之遺風鈔本題曰月河贊藁考集內所居丙舍地名皆作月湖樸別有讀畫錄亦載張庚爲作月湖圖則卷首月河字鈔本誤也

【夢村集二卷】編修周永年家藏本 國朝朱緯撰緯字義叔歷城人由歲貢生官邱縣訓導是集有七十自壽詩又有次兒生日詩作於七十四歲時蓋其晚年所自編詩頗清淺而時有脫灑之致

【後海書堂遺文二卷】江蘇巡撫採進本 國朝王孝詠撰孝詠有嶺西雜錄已著錄是集上卷爲雜文下卷皆金石題跋文頗質實而少覺其樸惟題跋則品題不苟可取者多

【微香集一卷】燕香集二卷燕香二集二卷】內閣中書方維甸家藏本 國朝方觀承撰觀承字遐穀號

問亭又號宜田桐田人由監生薦授中書舍人官至直隸總督謚恪敏觀承遭遇聖朝備蒙恩眷封疆宣力積有勤勞而性嗜詩篇政務之餘不廢吟詠舊所著有東園剩藁入塞詩懷南草暨步吟叩舷吟宜田彙藁看蠶詞松漠草共八種皆篇入述本堂詩集中已別著錄是編三集則其爲直隸總督時所作其子維甸編錄別行者也

【晚晴樓詩草二卷】大理寺卿陸錫熊家藏本 國朝曹錫淑字采菴上海人兵科給事中一士之女適同里舉人陸正笏一士有四焉齋詩集其妻陸鳳池亦有梯仙閣餘課錫淑承其家學具有軌範大致以性情深至爲主不規規於儂偶聲律之間云

【藍戶部集二十六卷】江西巡撫採進本 國朝藍千秋撰千秋字長青宜黃人以薦授國子監學正官至盛京戶部員外郎是集刻於乾隆丙寅凡詩四卷文二十二卷

【豐川全集二十八卷】內府藏本 國朝王心敬撰心敬有豐川易說已著錄此集乃所作語錄及雜著大抵講學者居多乃康熙丙申湖廣總督額倫特所刊額倫特即嘗以隱逸薦心敬者也

【豐川續集三十四卷】陝西巡撫採進本 國朝王心敬撰據其子勑凡例稱心敬康熙丙申刻有正續集二十八卷是已有正續兩集矣又稱自丙申至乾隆戊午與當代大人君子相酬答及與門人子弟講說論辨者視前刻倍多今裒成三十四卷是此本又出續集後矣然其二十八卷之本實不分正集續集之目未喻何說故此本仍刊版之名以豐川續集著錄焉

【綠筠軒詩四卷】編修周永年家藏本

國朝張元撰元字殿傳淄川人雍正丙午舉人官魚臺縣敎諭

元爲崑崙山人篤慶從子故詩法本王士禎之論以神韻爲宗晚乃漸歸朴老而終未忘其故轍是集凡七百餘首其孫庭案所刻也

【質園詩集三十二卷】編修程晉芳家藏本
官翰林院編修以養親乞外補改授同知終於沅江府知府盤與錢塘厲鶚名價相埒才情富贍生平篇什甚多此集乃刪汰之餘尙三千首云

【竹香詩集四卷】大理寺卿陸錫熊家藏本
書鑒爲吳偉業外孫於詩法頗有端緒此集凡詩三百餘首乃其友杭世駿所刪存也

【冰壑詩鈔六卷】編修周永年家藏本
國朝朱令昭撰令昭字次公歷城人少與淄川張元膠州高鳳翰等結柳莊詩社繪畫篆刻皆能留意其詩亦與鳳翰相伯仲而少遜其雄傑

【鵝浦集六卷】編修周永年家藏本
國朝朱懷樸撰懷樸字素存歷城人其詩格近宋人而時有風致
【菱溪遺草一卷】編修程晉芳家藏本
國朝蔣麟昌撰麟昌字靜存陽湖人乾隆己未進士官翰林院編修年僅二十有二而歿遺詩數十篇其父原任倉場侍郎炳爲刻而傳之

【松泉詩集六卷】編修程晉芳家藏本
國朝江昱撰昱有尙書私學已著錄其平生喜爲韻語與編修程夢星等相唱和游蹟多在衡湘間是集即刻於湖南者也

【閨房集一卷】編修程晉芳家藏本
國朝陳珮撰珮字懷玉天長人江都諸生江昱之妻是集僅詩四十首長短句十首附以傳誄及昱所作墓碣

【白雲詩集七卷別集一卷】兩江總督採進本 國朝盧存心撰。存心原名琨，字玉嚴，別字敬甫，錢塘人。恩貢生。乾隆元年嘗薦舉博學鴻詞。是集首以文廟從祀弟子贊八十首殿以詠梅七言律詩八十五首。前有桑調元序，稱爲總角交，其才氣亦調元之亞也。

【萬青樓詩文殘編一卷】國子監助教張羲年家藏本 國朝邵昂霄撰。昂霄有萬青樓圖編，已著錄。所著詩文名萬青樓稟，身後散佚，是編爲其從子是枅所手錄，僅存文數篇，詩數首而已。

【隨園詩集十卷附錄一卷】御史戈源家藏本 國朝邊連寶撰。連寶字趙珍，今刊本作肇畛，乃戲以同音書之。如申涵光本字符孟，而每書鳧盟，非其本字也。任邱人。雍正乙卯拔貢生。乾隆丙辰薦舉博學鴻詞。辛未又薦舉經學。是集前有乾隆丁丑戈濤序。而第四卷以下題曰病餘草者，乃皆戊寅以後詩，蓋續編而仍冠以原序也。附錄一卷，曰禪家公案頌，則其晚耽禪悅，讀指月錄所作云。

【隱拙齋集五十卷】浙江巡撫採進本 國朝沈廷芳撰。廷芳有十三經注疏正字，已著錄。是集爲廷芳所自編。凡詩賦三十二卷，散體文十八卷。其詩學出於查慎行，古文之學出於方苞，故所作雖無鉅麗之觀，而皆有法度。

【東山草堂集六卷】江西巡撫採進本 國朝潘安禮撰。安禮字立夫，南城人。乾隆丙辰召試博學鴻詞。官翰林院編修。是編皆其官京師時所作。律賦凡三十九首，其門人爲註而刻之。

【黃靜山集十二卷】江蘇巡撫採進本 國朝黃永年撰。永年字靜山，江西廣昌人。乾隆丙辰進士。官至常州府知府。是集前有雷鋐所作墓誌銘，稱所著有希賢編，春秋四傳異同辨，崧甫文類，南莊類稟，白雲

詩鈔靜子日錄此本僅南莊類編藁八卷白雲詩鈔二卷奉使集一卷靜子日錄一卷而他集不見其春秋四傳異同辨今在南莊類彙第二卷中亦不別爲書未喻其故又一別本僅有南莊類彙奉使集靜子日錄三種疑其隨刻隨印皆非完本云

【山陰集】一卷歸田遺草一卷編修鄭際唐家藏本國朝林其茂撰其茂字培根侯官人乾隆丙辰進士官山陰知縣此二集一爲官山陰時作一爲罷官後作其茂沒後其婦弟鄭天錦所編冠以魯曾煜所作家傳又有沈廷芳序惜其遘疾早世未克竟其所長蓋其茂沒時年僅三十有九云

【史復齋文集】四卷陝西巡撫採進本國朝史調撰調字勻五號後齋晚號雲臺山人華陰人乾隆丙辰進士官仙游縣知縣是集一卷爲其官仙游時稟諭及荒政義倉等略二卷爲序跋書論三卷爲橫渠書院規諭及諭子書而以仙游所定求士三則冠焉四卷爲語錄及功過式併以崔紀所作誌銘附於其後

【瑜齋詩草】一卷庶吉士盧遂家藏本國朝郭趙璧撰趙璧字名瑾侯官人乾隆丙辰舉人是集乃趙璧沒後其子文煥所編後其子文海又搜求佚藁附益之凡古今體詩一百十一首蓋趙璧喜吟詠而不自收拾故散失之餘所存僅此云

【卓山詩集】十二卷江西巡撫採進本國朝帥家相撰家相字伯子奉新人乾隆丁巳進士官至潯州府知府是集又名三十乘書樓集中多改竄之處蓋猶其自訂之原本也

【瓠息齋前集】二十四卷浙江巡撫採進本國朝凌樹屏撰樹屏字保釐烏程人乾隆己未進士官鳳

縣知縣調咸陽後改補嘉興府教授是集賦一卷詩二十三卷分十二集大抵才情奔放之作。

【問義軒詩鈔二卷贊草一卷】國子監助教張龜年家藏本 國朝莊綸渭撰綸渭字對樵號葦塘武進人乾隆壬戌進士官定海縣知縣是集爲綸渭所手定其子世駿校刊贊草乃其在定海時所著雜文及案牘已載入定海續志又別錄成帙附於詩集之後焉。

【詠史六言一卷】侍講劉亭地家藏本 國朝周宣武撰宣武字燮軒長沙人乾隆壬戌進士是編雜採史事以六言絕句評論之或一首詠一事或一首連類兩三事不分門目亦不敍時代後先每首之末各附論一篇六言一體古今作者頗少詩家偶一爲之避其難也宣武獨衍至百首以外意欲開道出奇然終不能見長也。

【月坡詩集四卷】福建巡撫採進本 國朝郭植撰植有經史問已著錄是集分四編一曰雪竹草堂集一曰北游集二曰臺江草一曰溫陵草以集中編年考之迄於辛酉蓋其鄉試中式之後所刊也。

【玉芝堂集九卷】江蘇巡撫採進本 國朝邵齊諲撰齊諲字苟慈昭文人乾隆壬戌進士官翰林院編修是集凡詩三卷文六卷乃其晚年所自定詩文皆不分體大抵駢偶之作爲多爲四六之文者陳維崧一派以博麗爲宗其弊也膚廓吳綺一派以秀潤爲宗其弊也甜熟章藻功一派以工切細巧爲宗其弊也刻鏤纖小齊壽欲矯三家之失故所作以氣格排奡色澤斑駁爲宗以自拔於蹊徑而斧痕則尙未渾化也。

【嬾真初集詩選八卷】江蘇巡撫採進本 國朝張用天撰用天字用六號誠菴婁縣人是集刻於乾隆

甲子有用天自序其詩氣體勻整而捶字往往未堅句法亦多沿襲如板橋吟中紅歸水上桃花簇青入煙中柳葉齊則直點竄杜甫句矣

【燕川集六卷】江蘇巡撫採進本 國朝范泰恆撰。泰恆字無厓。河內人。乾隆乙丑進士。改庶吉士。外補崇義縣知縣。此集皆其所爲古文。後附其祖父墓表。祖母壽序。皆他人作。而末又綴以泰恆代文六篇。編次不倫。疑墓表壽序即泰恆自作。嫁名於人。後仍收之集中耳。然究非體例也。

【敝帚集二卷附蘆中集一卷】國子監助教張羲年家藏本 國朝趙秉忠撰。秉忠字景光。號秋墅。興化人。乾隆乙丑進士。改庶吉士。未散館而卒。是集皆古今體詩。末附蘆中集。乃哭其子春祈而作也。

【凝齋遺集八卷】江西巡撫採進本 國朝陳道撰。道字紹洙。號凝齋。江西新城人。乾隆戊辰進士。是集爲其子守誠等所刊。凡文六卷。詩二卷。中頗多講學之作。

【柘坡居士集十二卷】浙江巡撫採進本 國朝萬光泰撰。光泰字循初。秀水人。乾隆庚午舉人。是集其所自定。卷一曰南村草堂集。卷二曰樂于集。卷三卷四曰聞魚閣集。卷五曰北郭草堂集。卷六卷七曰江船集。卷八曰聞魚閣續集。卷九曰觚屋集。卷十曰江船續集。卷十一曰五上春司集。卷十二曰青乳軒集。前有汪孟鋗序。稱循初計偕北上。以病卒。方病中。嘗自定詩十二卷。一緘寄余。有可存則付令子存之。不者燬之之說。又稱刻既成。取循初別字。題曰柘坡居士集。其古文詩餘極夥。聞手自燬去。外雜著十六種。則皆其自定緘寄者。俟他日續刻云云。蓋光泰才思富贍。篇什頗多。後乃悔其少作。所存止此也。

【浩波遺集三卷】庶吉士梁上國家藏本 國朝鄭際熙撰。際熙字大純。侯官人。乾隆丙子舉人。年三十

六而卒。是集爲其弟際唐等所刊。凡詩二卷。文一卷。文中杜律篇法序一篇。稱能詩者未嘗先言法。而自中法。且神而明之。變化以自成其法。未有案一定之科條而譜之。舍其性情才力。俯首以從法也。其論亦足破拘攣之說。其書則未之見也。

【觀光集五卷】浙江巡撫採進本 國朝蔡以封撰。以封字桐川。嘉善人。由優貢生官桐鄉訓導。是集凡古今體詩八十五首。擬樂府四十六首。皆其監敷文書院恭逢聖駕南巡。率諸生迎駕時所賦也。

【綠杉野屋集四卷】浙江巡撫採進本 國朝徐以泰撰。以泰字陶尊。德清人。國子監生。乾隆二十二年官陽曲縣知縣。其詩皆早年之作。故骨格未就。而時有雋句。如詠鷹翎扇附人終在乎。斷翮尙生風一聯。亦頗工點染也。

【強恕齋文鈔五卷】浙江巡撫採進本 國朝張庚撰。庚有通鑑綱目釋地糾繆。已著錄。庚少孤貧。賣畫養母。以餘力爲古文。是集乃其七十三歲所自編。中傳誌之文居十之七。多述忠孝節義之事。

【冬心集四卷】江蘇巡撫採進本 國朝金農撰。農字壽門。錢塘人。客於揚州。書畫皆以奇逸自喜。詩亦如之。其名冬心者。取崔國輔寂寥抱冬心之語也。

【產鶴亭詩集七卷】浙江巡撫採進本 國朝曹庭棟撰。庭棟有易準。已著錄。是集凡分七稟。每稟各爲小序。其書齋中有產鶴亭。因以名集。故集中詠鶴詩最多。其第二稟別題曰魏塘紀勝。第七稟亦別題曰續魏塘紀勝。蓋嘉善舊隸嘉興路。爲魏塘鎮。亦名武塘。明宣德五年始析爲縣。庭棟先詠其名蹟爲一百首。又續成五十首也。

【西澗草堂集四卷】編修周永年家藏本也。其文謹嚴，頗不苟作。循觀沒後，其同學韓夢周爲搜輯編次序而刊之，僅五十七篇。

【巒崛山人集八卷】禮部主事任大椿家藏本

塞貧病以沒。是集爲舸所自定，斷自五十歲以後。乾隆庚寅，杭世駿爲之序，併附錄世駿與沈沃田書，盛

稱其和丁隱君貝葉經歌、長春觀老子像絕句云。

【睫巢集六卷後集一卷】江西巡撫採進本。國朝李鍇撰。鍇有尙史，已著錄。鍇卜居盤山，優游泉石以終。故其詩意思蕭散，挺然拔俗。大都有古松奇石之態，而刻意求高務思擺脫，亦往往有剝削骨立、斧鑿留痕。較王世貞所謂高叔嗣詩如空山鼓琴、沈思忽往、木葉盡脫、石氣自青者，則猶有一閒之未達。蓋可以著力之處，精思者得之；不容著力之處，精思者反失之也。第一卷皆擬古樂府，古人音節既不可得，乃詰屈其詞，以意爲之。題下所註，如朱磾下註曰：建鼓殷所作，棲翔鶩於上。或曰：鶩鼓精此吳競解題本說也。臨高臺下註曰：趨帝鄉而會瑤臺也。借寓游仙，已非原解。雉子班下註曰：關雎之類，則純非古題之意，又不知其寓意所在。卷中大抵類此，殊不可解也。

【石閻詩一卷】江西巡撫採進本。國朝陳景元撰。景元號石間，鑲紅旗漢軍。生平作字效晉，作詩效漢，務欲自拔於流俗之上。是集乃其手書擬古詩六十餘首，以貽雷鋐者。前有短札，亦其手書。鋐竝鈎摹筆蹟，刻之紙版，頗爲精好。景元詩雖以漢爲宗，而性既孤僻，思復刻峭，結習所近，乃在孟郊、賈島之間。如米摹晉帖，矩度不失二王，而波勒鉤剔，乃時時露其本法於漢人不彰不琢之意，未能全似也。此本以篇頁

較少不能成帙舊附於李鍇睫巢集以行然二人同時唱和名亦相齊未可列諸附綴故仍各著於錄焉

【南阜山人詩集七卷】山東巡撫採進本 國朝高鳳翰撰鳳翰字西園晚自號南阜山人又曰歸雲老人膠州人嘗以縣丞署壩鹽大使患風痺罷歸卒鳳翰工於書畫筆墨脫洒不主故常風痺後右臂已廢乃以左臂揮洒益疎野有天趣閒作詩歌不甚研鍊往往頽唐自放亦不甚局於繩尺然天分絕高與之所至亦時有清詞麗句故少時以詩謁王士禎極稱賞之生平所作凡三千餘首曰擊林集曰湖海集曰岫雲集曰鴻雪集曰歸雲集曰歸雲續集曰青蓮集晚年貧病且死自跋其後曰盲子禎孫篋笥誰付不知後來所作尙復幾許亦不得成卷與冊否尙有人拾取於蛛絲蠶腹之餘以少得流傳於人世否露電茫茫老病日篤死且不知何時而猶倦倦於此故紙窠中物愚哉南阜不直達人一笑矣其志亦可哀也

【拙齋集一卷】編修周永年家藏本 國朝李遠撰遠字君宏益都人是集皆五七言近體吐屬亦頗恬雅其刊版字畫悉從說文以小篆改隸詭形怪態則殊爲好異

【密娛齋詩藁一卷】編修周永年家藏本 國朝鄧汝功撰汝功字謙持聊城人乾隆乙未進士傳臚後即病歸未及釋褐而卒是集乃其友桂林府同知李文藻所刊文藻序稱其古體出於韓蘇近體似錢郎皆非止境蓋其天分頗高而得年不永功候則尙未成就云

【放鶴村文集五卷】山東巡撫採進本 國朝張侗撰侗字同人一字石民諸城人是集前有方邁所作侗小傳稱其有孝行多奇節蓋亦孤高之士其文則欲擺脫町畦乙乙冥冥別標象外之趣而反墮公安

竟陵派中，蓋存一不落窠臼之意，即其窠臼矣。

【東坪集八卷】浙江巡撫採進本。國朝胡慶豫撰。慶豫字雖來，號東坪，平湖人。歲貢生。是集卷一曰南浦吟，客江右時所作。卷二曰昭陽小藁，客邗江時所作。卷三曰北征集，赴京道中及寓京師時所作。卷四卷五曰西征草，入關中及流寓西蜀時所作。卷六卷七卷八曰桐軒集，則里居所作也。其詩以雅淡爲宗，而未能超詣。

【六湖遺集十二卷】浙江巡撫採進本。國朝張文瑞撰。文瑞字雲表，六湖其號也。蕭山人。官青州府同知。其詩凡分十八集。其私印曰少陵私淑。又曰五言長城。自命頗高。所作則大抵以秀潤爲工也。

【念西堂詩集八卷】陝西巡撫採進本。

國朝王令撰。令字仲錫，渭南人。由拔貢生官至廣東按察使。是編分金石絲竹匏土革木八集。自序謂皆適性自樂之言。蓋沿波鍾譚全非慶陽武功以來秦中舊格矣。

【古雪堂文集十九卷】浙江巡撫採進本。國朝王令撰。是編乃其所著雜文。詞多蹇澀。似沿其鄉文翔鳳餘派。又好用釋典。頗雜宗門語錄所作詩話。如紀隴西施妙玉在冥中代高素臣作詩還魂遂爲夫婦事。亦多類唐人說部也。

【有蘭書屋存藁四卷】江蘇周厚堉家藏本。

國朝石球撰。球字鳴虞，嘉定人。其近體詩頗有風致。而骨

格未堅。徐樹紳序稱球自以生平蹤跡少所涉歷，無瑰偉奇特之觀，故亦罕沈博絕麗之作，可謂自知矣。

【寒玉屏集二卷】碎金集二卷】浙江巡撫採進本。

國朝閔南仲撰。南仲字湘人，號石漁，湖州人。其詩以新穎爲宗。體格頗近金元。

【薪煙集四卷】江蘇巡撫採進本 國朝許昌國撰。昌國字仔賡，原字一清。荆溪人。歲貢生。是書首雜著次論學次論古次課徒訓兒各爲一卷。大抵皆語錄之類。後集一卷則附錄也。未有其子重炎所作年譜。案其事狀蓋亦篤行好修之士。故集中講學之語多能切實近理。特不以著作見長耳。

【璞堂文鈔十一卷】江蘇巡撫採進本 國朝許重炎撰。重炎字少來。荆溪人。是集多講學之文。而持論平允無喧爭。門戶之習於忠孝節義尤曉。瞻表章亦非空談。性命自號聖賢者流。文則縱橫曼衍。惟意所如。不能一一入格也。

【禹門集四卷】內府藏本 國朝郭振遐撰。振遐字中洲。汾陽人。寄居揚州。詩頗率易。至以大禹顏回自比。尤爲狂縱矣。

【葉書六卷】浙江巡撫採巡本 國朝王鳳九撰。鳳九仙游人。是集自序謂倣笠澤叢書之例。故以彙書名之中多講易之文。其說皆宗程朱。詩則有韻語錄也。

【天門詩集六卷】內府藏本 國朝吳盛藻撰。盛藻字觀壯。和州人。由拔貢生官至廣東按察司副使。其詩文皆惟意所如。罄所欲言而止。

【歲寒堂存藁一卷】浙江巡撫採進本 國朝林璐撰。璐字鹿菴。錢塘人。是集皆其所著雜文。僅數十篇。相其版式。蓋陸續開雕。尚未編定成帙。其安溪懷古序。信建文出亡爲真。殊爲未考。所記顏允紹郭少尹等事。皆足裨史之闕。特敘述稍冗。筆力稍弱耳。

【天香閣詩集十卷】浙江巡撫採進本 國朝唐之鳳撰。之鳳字武曾。烏程人。其詩多愁苦之音。擬古諸

作亦頗具體，然未能變化。末附碎玉合編二卷。一題唐雲禎予霖著。一題唐德遠深源著。蓋之鳳兄弟行也。

【笑門詩集二十五卷】內府藏本。國朝戚理撰。理字後升。泗州人。由優貢授知縣。所作好爲新語。公安竟陵之流派也。

【偶存草堂集六卷】山東巡撫採進本。國朝林之脩撰之。舊字素園。楊夢琬序稱其產於魯。客於楚。其自署曰孝感。蓋寓籍也。其取法在中唐南宋之間。而學力則未逮焉。

右別集類一千五百六十八部。一萬六千四百三十九卷。內六十六部無卷數。皆附存目。

卷一百八十六

集部三十九

總集類一

文籍日興。散無統紀。於是總集作焉。一則網羅放佚。使零章殘什。竝有所歸。一則刪汰繁蕪。使秀稗咸除。菁華畢出。是固文章之衡鑒。著作之淵藪矣。三百篇既列爲經。王逸所衷。又僅楚辭一家。故體例所成。以摯虞流別爲始。其書雖佚。其論尙散見藝文類聚中。蓋分體編錄者也。文選而下。互有得失。至宋真德秀文章正宗。始別出談理一派。而總集遂判兩途。然文質相扶。理無偏廢。各明一義。未害同歸。惟末學循聲。主持過當。使方言俚語。俱入詞章。麗製鴻篇。橫遭嗤點。是則併德秀本旨失之耳。今一一別

裁務歸中道。至明萬歷以後。僉魁漁利坊刻彌增剽竊陳因動成巨帙。併無門徑之可言。姑存其目。爲冗濫之戒而已。

【文選註六十卷】內府藏本 案文選舊本三十卷。梁昭明太子蕭統撰。唐文林郎守太子右內率府錄事參軍事崇賢館直學士江都李善爲之註。始每卷各分爲二。新唐書李邕傳稱其父善始註文選。釋事而忘義。書成以問邕。邕意欲有所更。善因令補益之。邕乃附事見義。故兩書並行。今本事義兼釋。似爲邕所改定。然傳稱善註文選在顯慶中。與今本所載進表題顯慶三年者合。而舊唐書邕傳稱天寶五載坐柳勣事杖殺。年七十餘上距顯慶三年凡八十九年。是時邕尚未生。安得有助善註書之事。且自天寶五載上推七十餘年。當在高宗總章咸亨間。而舊書稱善文選之學受之曹憲。計在隋末年已弱冠。至生邕之時。當七十餘歲。亦決無伏生之壽。待其長而著書。考李匡乂資暇錄曰。李氏文選有初註成者。有覆註。有三註四註者。當時旋被傳寫。其絕筆之本皆釋音訓義。註解甚多。是善之定本。本事義兼釋。不由於邕。匡乂唐人時代相近。其言當必有徵。知新唐書喜采小說。未詳考也。其書自南宋以來。皆與五臣註合刊。名曰六臣註文選。而善註單行之本。世遂罕傳。此本爲毛晉所刻。雖稱從宋本校正。今考其第二十五卷。陸雲答兄機詩註中有向曰一條。濟曰一條。又答張士然詩註中有翰曰銑曰向曰濟曰各一條。殆因六臣之本削去五臣。獨留善註。故刊除不盡。未必真見單行本也。他如班固兩都賦誤以註列目錄下。左思三都賦。善明稱劉逵註蜀都。吳都。張載註魏都。乃三篇俱題劉淵林字。又如楚辭用王逸註。子虛上林賦用郭璞註。兩京賦用薛綜註。思元賦用舊註。魯靈光殿賦用張載註。詠懷詩用顏延年沈約註。射雉賦用

徐爰註皆題本名而補註則別稱善曰於薛綜條下發例甚明乃於揚雄羽獵賦用顏師古註之類則竟漏本名於班固幽通賦用曹大家註之類則散標句下又文選之例於作者皆書其字而杜預春秋傳序則獨題名豈非從六臣本中摘出善註以意排纂故體例互殊歟至二十七卷末附載樂府君子行一篇註曰李善本古詞止三首無此一篇五臣本有今附於後其非善原書尤爲顯證以是例之其孔安國尙書序杜預春秋傳序二篇僅列原文絕無一字之註疑亦從五臣本割入非其舊矣惟是此本之外更無別本故仍而錄之而附著其舛互如右

【六臣註文選六十卷】內府藏本案唐顯慶中李善受曹憲文選之學爲之作註至開元六年工部侍郎呂延祚復集衢州常山縣尉呂延濟都水使者劉承祖之子良處士張詭呂向李周翰五人共爲之註表進於朝其詆善之短則曰忽發章句是徵載籍述作之由何嘗措翰使復精核註引則陷於末學質訪旨趣則歸然舊文祇謂攬心胡爲析理其述五臣之長則曰相與三復乃詞周知祕旨一貫於理杳測澄懷目無全文心無留意作者爲志森然可觀觀其所言頗欲排突前人高自位置書首進表之末載高力士所宣口敕亦有此書甚好之語然唐李匡乂作資暇集備摘其竊據善註巧爲顛倒條分縷析言之甚詳又姚寬西溪叢語詆其註揚雄解嘲不知伯夷太公爲二老反駁善註之誤王林野客叢書詆其誤敘王暕世系以覽後爲祥後以曇首之曾孫爲曇首之子明田汝成重刊文選其子藝衡又摘所註西都賦之龍興虎視東都之乾符坤珍東京賦之巨猾閒疊蕪城賦之袤廣三墳諸條今觀所註迂陋鄙倍之處尚不止此而以空疏臆見輕詆通儒殆亦韓愈所謂蚍蜉撼樹者歟其書本與善註別行故唐志各著錄

黃伯思東觀餘論尙譏崇文總目誤以五臣註本置李善註本之前至陳振孫書錄解題始有六臣文選之目蓋南宋以來偶與善註合刻取便參證元明至今遂輾轉相沿併爲一集附驥以傳蓋亦幸矣然其疏通文意亦閒有可採唐人著述傳世已稀固不必竟廢之也田氏刊本頗有刪改猶明人竄亂古書之習此本爲明袁袞所刊朱彝尊跋謂從宋崇寧五年廣都裴氏本翻雕諱字闕筆尙仍其舊頗足亂真惟不題鏤版訖工年月以是爲別耳錢曾讀書敏求記稱所藏宋本五臣註作三十卷爲不失蕭統之舊其說與延祚表合今未見此本然田氏本及萬歷戊寅徐成位所刻亦均作三十卷蓋或合或分各隨刊者之意但不改舊文即爲善本正不必以卷數多寡定其工拙矣

【文選顏鮑謝詩評四卷】永樂大典本 元方回撰同有續古今考已著錄是編取文選所錄顏延之鮑照謝靈運謝惠連謝朓之詩各爲論次諸家書目皆不著錄惟永樂大典載之考集中顏延之三月三日侍游曲阿後湖作一首評曰本不書此詩書之以見夫雕繪滿眼之詩未可以望謝靈運也又北使洛一首評曰所以書此詩者有二又謝靈運擬鄴中集八首評曰規行矩步瑩砌妝點而成無可圈點故余評其詩而不書其全篇案此本八首皆書全篇與此評不合蓋不載本詩則所評無可繫屬故後人又爲補錄也則此集蓋回手書之冊後人得其墨蹟錄之成帙也回所撰瀛奎律髓持論頗偏此集所評如謝靈運詩多取其能作理語又好標一字爲句眼仍不出宋人窠臼然其他則多中理解又如謝靈運述祖德第二首評曰文選註高揖七州外謂舜分天下爲十二州時晉有七州故云七州余謂不然此指謝元所解徐兗青司冀幽并七州都督耳謂晉有七州而高揖其外則不復居晉土耶謝瞻張子房詩評曰東坡

詆五臣誤註三殤。其實乃是李善顏延之秋胡詩。評曰：秋胡之仕於陳，止是魯之鄰國，而云王畿，恐是延之一時寓言。雖以秋胡子爲題，亦泛言仕宦。善註乃引詩緯曰：陳王者所起也。此意似頗未通。亦閒有所考訂。至於評謝靈運九日戲馬臺送孔令詩，謂鳴葭當作鳴笳，則未考晉書夏統傳。評鮑煥行藥至城東橋詩，謂行藥爲乘興還來看藥欄之意，則誤引杜詩。評謝朓郡內高齋閒坐答呂法曹詩，謂或以爲岫本訓穴，以爲遠山，亦無害。則附會陶潛歸去來辭，小小舛漏，亦所不免。要不害其大體，統觀全集，究較瀛奎律髓爲勝。殆作於晚年，所見又進歟。

【玉臺新詠十卷】兵部侍郎紀昀家藏本
唐新語曰：梁簡文爲太子，好作艷詩，境內化之。晚年欲改作，追之不及，乃令徐陵爲玉臺集，以大其體。據此，則是書作於梁時，故簡文稱皇太子。元帝稱湘東王。今本題陳尚書左僕射太子少傅東海徐陵撰。殆後人之所追改。如劉勰文心雕龍，本作於齊，而題梁通事舍人耳。其梁武帝書謚書國號邵陵王等竝書名，亦出於追改也。其書前八卷，爲自漢至梁五言詩。第九卷，爲歌行。第十卷，爲五言二韻之詩。雖皆取綺羅脂粉之詞，而去古未遠，猶有講於溫柔敦厚之遺，未可概以淫艷斥之。其中如曹植棄婦篇，庾信七夕詩，今本集皆失載。據此可補闕佚。又如馮惟訥詩紀載蘇伯玉妻盤中詩，作漢人。據此知爲晉代梅鼎祚詩乘載蘇武妻答外詩。據此知爲魏文帝作。古詩西北有高樓等九首，文選無名氏。據此知爲枚乘作。飲馬長城窟行文選亦無名氏。據此知爲蔡邕作。其有資考證者，亦不一明。代刻本妄有增益，故馮舒疑庾信有入北之作。江總濫擘牋之什，茅元禎本顛倒改竄更甚。此本爲趙宦光家所傳宋刻，有嘉定乙亥永

嘉陳玉父重刻跋最爲完善。間有後人附入之作。如武陵王閨妾寄征人詩。沈約八詠之六諸篇皆一一註明。尤爲精審。然玉父跋稱初從外家李氏得舊京本。閒多錯謬。復得石氏所藏錄本。以補亾校脫。如五言詩中入李延年歌一首。陳琳飲馬長城窟行一首。沈約六憶詩四首。皆自亂其例。七言詩中移東飛伯勞歌於越人歌之前。亦乖世次。疑石氏本有所竄亂。而玉父因之未察也。觀劉克莊後村詩話所引玉臺新詠。一一與此本暗合。而嚴羽滄浪詩話謂古詩行行重行行篇。玉臺新詠以越鳥巢南枝以下另爲一首。此本仍聯爲一首。又謂盤中詩爲蘇伯玉妻作。見玉臺集。此本乃溷列傳元詩中。邢凱坦齋通編引玉臺新詠。以誰言去婦薄一首爲曹植作。此本乃題爲王宋自作。蓋克莊所見即此本。羽等所見者又一別本。是宋刻已有異同。非陵之舊矣。特不如明人變亂之甚。爲尙有興型耳。其書大唐新語稱玉臺集。元和姓纂亦稱梁有聞人蒨詩載玉臺集。然隋志已稱玉臺新詠。則玉臺集乃相沿之省文。今仍以其本名著錄焉。

【玉臺新詠考異十卷】大理寺卿陸錫熊家藏本
國朝紀容舒撰。容舒有孫氏唐韻考已著錄。是編因徐陵玉臺新詠。自明代以來。刊本不一。非惟字句異同。即所載諸詩。亦復參差不一。萬歷中張嗣修本。多所增竄。茅國縉本。又併其次第亂之。而原書之本真益失。惟寒山趙宦光所傳。嘉定乙亥永嘉陳玉父本。最爲近古。近時馮舒本。據以校正。差爲清整。然舒所校有宋刻本誤。而堅執以爲不誤者。如張衡同聲歌譜。恐標爲恐剽。鵡莞弱爲苑弱之類。亦以古字假借曲爲之說。旣牽強而難通。有宋刻本不誤。而反以爲誤者。如蘇武詩一首。舊本無題。而妄題爲留別妻之類。復僞妄而無據。又有宋刻已誤。因所改而益誤者。

如塘上行據宋書樂志改爲魏武帝之類全與原書相左彌失其真皆不可以爲定故容舒是編參考諸書裒合各本倣韓文考異之例兩可者並存之不可通者闕之明人刊本雖於義可通而於古無徵者則附見之各箋其棄取之由附之句下引證頗爲賅備他如塘上行之有四說劉勳妻詩之有三說蘇伯玉妻詩誤作傅元吳興妖神詩誤作妓童徐悱詩誤作俳妻其妻詩又誤作俳梁武帝詩誤作古歌以及徐幹室思本爲六首楊方合歡實共五篇與王融徐陵之獨書字昭明太子之不入選梁代帝王與諸臣並列之類考辨亦頗詳悉雖未必一一復徐陵之舊而較明人任臆竄亂之本則爲有據之文矣惟漢魏六朝諸作散見永樂大典者所據皆宋刻精本足資考證案文淵閣書皆宋刻見王冑堂鬱岡齋筆麈以書藏中祕非外間之所能窺其間文句之殊尙未能一一參訂今並詳爲校正各加案語於簡端以補其所遺焉

【高氏三宴詩集三卷附香山九老詩一卷】江蘇巡撫採進本 唐高正臣編所載皆同人會宴之詩以一會爲一卷各冠以序一爲陳子昂一爲周彥暉一爲長孫正隱三會正臣皆預故彙而編之與宴者凡二十一人考之新唐書有傳者三人則陳子昂郎餘令解琬也附見他傳者一人則周思鈞也見於本紀及世系表者一人則張錫也僅見於世系表者五人則正臣及高瑾王茂時高紹高嶠也餘皆不詳顛末案世系表正臣曾爲襄州刺史不云衛尉卿今詩後敘正臣及周思鈞事獨詳所云連媯帝室寓居洛陽皆與諸序語合似非無據末又附香山九老會詩一卷卷尾有夷白堂重雕字考宋鮑愼由字欽止括蒼人元祐六年進士著有夷白堂集此或愼由所刊歟九老會詩已附見白香山詩集而三宴詩之名新舊

唐書志皆不載。蓋當時編次詩歌，裝褫卷軸，如蘭亭詩之墨蹟流傳，但歸賞鑒之家，故不著藏書之錄。後好事者傳鈔成帙，乃列諸典籍之中耳。惟輾轉繕錄，不免多譌。如以高嶠爲司府郎中，唐百官志無此官。應從世系表改爲司門郎中。又張錫於武后久視元年拜同平章事，本兗州東武城人。詩中誤以錫東爲名，又弓嗣初高瑾周彥暉竝曰咸寧進士。唐無咸寧年號。惟高宗曾改元咸亨，寧字亦亨字之誤。茲竝爲改正云。

【篋中集一卷】江蘇巡撫採進本

唐元結編。結有次山集已著錄。是集成於乾元三年。錄沈千運王季友于逖孟雲卿張彪趙微明元季川七人之詩。凡二十四首。前有自序。稱已長逝者遺文散失。方阻絕者。

不見近作。盡篋中所有。總編次之。命曰篋中集。其詩皆淳古淡泊。絕去雕飾。非惟與當時作者門徑迥殊。即七人所作。見於他集者。亦不及此集之精善。蓋汰取精華。百中存一。特不欲居刊蘿之名。故記言篋中。所有僅此云爾。其沈千運寄祕書十四兄一首。較河岳英靈集所載。顛倒一聯。又少後四句。字句亦小有異同。而均以此本爲勝。疑結亦頗有所點定。館閣書目謂二十四首皆結作。則不然也。千運吳興人家。於汝北季友河南人家貧賣履博極羣書。豫章太守李勉引爲賓客。杜甫詩所謂豐城客子王季友也。逖里籍無考。李白獨孤及皆有詩贈之。雲卿河南人。或曰武昌人。嘗第進士。官校書郎。今所傳詩一卷。僅十七首。而悲苦之詞。凡十三首。則亦不得志之士。彪潁洛閒人。杜甫詩所稱張山人彪者。即其人。微明天水人。名見竇息述書賦。季川即結弟元融。獨書其字。未詳其故。或融之子孫所錄。如玉臺新詠之稱徐孝穆歟。【河岳英靈集三卷】江蘇巡撫採進本

唐殷璠編。璠丹陽人。序首題曰進士。書錄解題亦但稱唐進士。

其始末則未詳也。是集錄常建至閻防二十四人詩二百三十四首，姓名之下各著品題，仿鍾嶸詩品之體，雖不顯分次第，然篇數無多，而釐爲上中下卷，其人又不甚敘，時代母亦隱寓鍾嶸三品之意乎？文獻通考作二卷，蓋字誤也。其序謂爰因退迹，得遂宿心，蓋不得志而著書者，故所錄皆淹塞之士，所論多感慨之言，而序稱名不副實，才不合道，雖權壓梁竇，終無取焉。其宗旨可知也。凡所品題，類多精愜，張謂條下稱其代北州老翁答湖上對酒行，而集中但有湖上對酒行，無代北州老翁答，疑傳寫有所脫佚。其中字句多與國秀集小異。又毛晉刊本摹母潛條下註曰：「小序與時刻不同，蓋校刊者互有點竄，已非盡舊本矣。」

【國秀集三卷】江蘇巡撫採進本 唐芮挺章編。挺章里貫未詳，諸書稱爲國子進士，蓋太學生也。前有舊序，謂是集編於天寶三載，凡九十人詩二百二十首。宋元祐閒，曾彥和跋云：「名欠一士，詩增一篇，泊毛晉校刊，復謂虛列三人。今案編內實八十五人，詩二百十一首。」晉未及詳檢也。唐以前編輯總集，以己作入選者，始見於王逸之錄楚辭，再見於徐陵之撰玉臺新詠。挺章亦錄己作二篇，蓋仿其例。然文章論定，自有公評，要當待之天下後世。何必露才揚己，先自表章？雖有例可援，終不可爲訓。至舊序一篇，無作者姓氏。陳振孫書錄解題，謂爲樓穎所作。穎天寶中進士，其詩亦選入集中，考梁昭明太子撰文選，以何遜猶在，不錄其詩，蓋欲杜絕世情，用彰公道。今挺章與穎一則以見存之人採錄其詩，一則以選己之詩爲之作序，後來互相標榜之風，已萌於此。知明人詩社銅習，其來有漸，非一朝一夕之故矣。以唐人舊本所選，尚有可採，仍錄存之，而特著其陋，以爲文士戒焉。

【唐御覽詩一卷】江蘇巡撫採進本 一名唐歌詩 一名選進集 一名元和御覽 唐令狐楚編 楚字穀士 宜州華原人 貞元七年登進士第 桂管觀察使王拱辟入幕 後歷辟太原節度判官 召授右拾遺官至吏部尚書 檢校尚書左僕射 出爲山南西道節度使 卒於官事 蹤具唐書本傳 是書乃憲宗時奉敕編進 其結銜題翰林學士朝議郎守中書舍人 考楚本傳稱皇甫鏗與楚厚善 薦爲翰林學士 進中書舍人 元和十二年裴度以宰相領彰義節度使 楚草制其詞有所不合 停楚學士但爲中書舍人 則此書之進在元和十二年以前也 陸游渭南文集有是書跋曰 右唐御覽詩一卷 凡三十人二百八十九首 元和學士令狐楚所集也 案盧綸墓碑云 元和中 章武皇帝命侍臣採詩第名家得三百十一篇 公之章句奏御者居十之一 今御覽所載綸詩三十二篇 正所謂居十之一者也 據此則御覽爲唐舊本不疑 然碑云三百十一篇 而此纔二百八十九首 蓋散佚多矣 云云 此本人數詩數均與游所跋相合 蓋猶古本所錄惟韋應物爲天寶舊人 其餘李端司空曙等皆大歷以下人 張籍楊巨源竝及於同時之人 去取凡例不甚可解 其詩惟取近體無一古體 即巫山高等之用樂府題者亦皆律詩 蓋中唐以後世務以聲病諧婉相尚 其奮起而追古調者不過韓愈等數人 楚亦限於風氣不能自異也 本傳稱楚於牋奏制令尤善 每一篇成 人皆傳諷 舊唐書李商隱傳亦稱楚能章奏 以其道授商隱 均不稱其詩 劉禹錫集和楚詩雖有風情不似四登壇句 而今所傳詩一卷 惟宮中樂五首 從軍詞五首 年少行四首 差爲可觀 氣格色澤皆與此集相同 蓋取其性之所近 其他如郡齋詠懷詩之何時砧聞闌九日言懷詩之二九即重陽 立秋日悲懷詩之泉終閉不開 秋懷寄錢侍郎詩之燕鴻一聲叫 和嚴司空落帽臺宴詩之馬奔流電妓奔車 郡齋栽竹

詩之退公閒坐對嬪娟青雲干呂詩之瑞容驚不散譏劉白賞春不及之下馬貪趨廣運門皆時作鄙句而贈毛仙翁一首尤爲拙鈍蓋不甚避俚俗者故此集所錄如盧綸送道士詩騎馬花燭詩鄭鑑邯鄲俠少年詩楊凌閣前雙槿詩皆頗涉俗格亦其素習然也然大致雍容諧雅不失風格上比箇中集則不足下方才調集則有餘亦不以一二疵累棄其全書矣

【中興閒氣集二卷】江蘇巡撫採進本 唐高仲武編仲武自稱渤海人然唐人類多署郡望未知確貫何地也是集前有自序云起至德初迄大歷末凡二十六人詩一百四十首未有元祐戊辰曾子泓跋稱獨遺鄭當一人逸詩八首蓋在宋時已殘闕故陳振孫書錄解題云所選詩一百三十二首也姓氏下各有品題拈其警句如河岳英靈集例而張眾甫章八元戴叔倫孟雲卿劉灣五人俱闕考毛晉跋謂得舊鈔本所闕張章戴諸評俱在獨劉灣無考故編中於四家姓氏之下俱註云評載卷首今檢卷首無之當由久而復佚耳又案錢曾讀書敏求記謂得宋鋟本如朱灣詠玉一首玉字作三蓋每句皆藏三字義也後人不解詩義翻謂三爲謬字妄改爲詠玉自元至明刻本皆然此本仍襲舊謬知毛晉所云舊鈔本猶未足據也仲武持論頗矜慎其謂劉長卿十首以後語意略同落句尤甚鑒別特精而王士禛論詩絕句獨非之蓋士禛詩修詞之功多於鍊意其模山範水往往自歸窠臼與長卿所短頗同殆以中其所忌故有此自護之論耶陸游集有是書跋曰高適字仲武此乃名仲武非適也然適自字達夫游實誤記而誤辨至稱其評品多妄又稱其議論凡鄙則尤不然今觀所論如杜誦之流水生涯盡浮雲世事空語本習徑而以爲得生人始終之理張繼之女停襄邑杼農廢沒陽耕句太實相而以爲事理雙切頗不免逗漏

末派其餘則大抵精確不識游何以詆之至所稱錢起之窮達戀明主耕桑亦近郊劉長卿之得罪風霜苦全生天地仁此自詩人忠厚之遺尤不得目以凡鄙惟王世懋藝圃擷餘摘郎士元暮蟬不可聽落葉豈堪聞句謂聽聞合掌而仲武稱其工於發端則切中其失不爲苛論矣

【極元集二卷】江蘇巡撫採進本 唐姚合編合有詩集已著錄合爲詩刻意苦吟工於點綴小景搜求新意而刻畫太甚流於纖仄者亦復不少宋末江湖詩派皆從是導源者也然選錄是集乃特有鑒裁所取王維至戴叔倫二十一人之詩凡一百首今存者凡九十九合自稱爲詩家射雕手亦非虛語計敏夫唐詩紀事凡載集中所錄之詩皆註曰右姚合取爲極元集蓋宋人甚重其書矣二十一人之中惟僧靈一法振皎然清江四人不著始末祖詠不著其字暢當字下作一方空蓋原本有而傳寫佚闕其餘則凡字及爵里與登科之年一一詳載觀劉長卿名下註曰宣城人與唐書稱河間人者不同又皇甫曾註天寶十二載進士皇甫冉註天寶十五載進士以登科先後爲次置曾於冉之前與諸書稱兄弟同登進士者亦不同知爲合之原註非後人鈔撮諸書所增入總集之兼具小傳實自此始亦足以資考證也

【松陵集十卷】編修汪如藻家藏本 唐皮日休陸龜蒙等倡和之詩考卷端日休之序則編而成集者龜蒙題集名者日休也龜蒙有末耜經日休有文藪皆已著錄依韻倡和始於北魏王肅夫婦至唐代盛於元白而極於皮陸蓋其時崔璞以諫議大夫爲蘇州刺史辟日休爲從事而龜蒙適以所業謁璞因得與日休相贈答同時進士顏萱前廣文博士張賁進士鄭璧司馬都浙東觀察推官李穀前進士崔璐及處士魏朴羊昭業等亦相隨有作裒爲此集序稱共詩六百八十五首今考集中日休龜蒙各得往體詩

九十三首今體詩一百九十三首雜體詩三十八首又聯句及問答十有八首外顏萱得詩三首張貴得詩十四首鄭璧得詩四首司馬都得詩二首李穀得詩三首崔璐魏朴羊昭業各得詩一首崔璞亦得詩二首其他如清遠道士顏真卿李德裕幽獨君等五首皆以追錄舊作不在數內尙得詩六百九十八首與序中所列之數不符豈序以傳寫誤歟明宏治壬戌吳江知縣濟南劉濟民以舊本重刊都穆爲之跋尾歲久漫漶毛晉又得宋槧本重校刻之今所行者皆毛本唐人倡和真爲集者凡三斷金集久佚王士禛記湖廣莫進士有漢上題襟集求之不獲今亦未見傳本其存者惟此一集錄而存之尙可想見一時文雅之盛也

【二皇甫集七卷】江蘇蔣曾鑒家藏本 唐皇甫冉皇甫曾兄弟合集也冉字茂政丹陽人天寶十五載進士大歷中官至左補闕曾字孝常天寶十二載進士官至監察御史謫陽翟令以終曾集一卷與書錄解題合冉集六卷較書錄解題多五卷然曾集前有大歷十年獨孤及序稱三百有五十篇而此本僅一百三十四篇則已佚其一百十六篇又酬楊侍御寺中見招送薛判官之越送魏中丞還河北賦得越山皆三韻律詩而編五言古詩中奉寄皇甫補闕六言一首乃張繼詩冉有答詩竝序可證而亦編爲冉詩知舊本附答詩後重刊者分體編次乃雜入六言詩中遂誤爲冉詩則竝次第亦非其舊觀其與曾集皆以五言排律別立一體非惟唐無此名即宋元亦尙無此名其爲高棟以後不學者所竄亂審矣前有王廷相序後有楊慎跋竝稱河中劉潤之輯二皇甫集然則此集即潤之所編也

【唐四僧詩六卷】編修汪如藻家藏本 唐僧靈澈詩一卷靈一詩二卷清塞詩二卷常達詩一卷案書

錄解題載靈澈靈一集皆一卷而清塞與常達失載是集合而輯之不知何人所編靈澈靈一及常達集前各載宋沙門贊寧奉敕所撰本傳一篇惟清塞無之蓋贊寧作高僧傳時偶遺其名也靈澈詩前有劉禹錫序一篇文獻通考亦引之蓋靈澈當時與僧皎然游得見知於侍郎包佶李紓故來往長安其名較著得以求序於名流然禹錫序其詩凡十卷茲僅一卷則亦吉光片羽非其完書矣靈澈姓湯字源澄越州人靈一姓吳廣陵人常達姓顧字文舉海隅人清塞即周朴其人後返初服不應列爲四僧語詳李顥宏秀集條下茲不具論焉

【薛濤李治詩集二卷】編修汪如藻家藏本 薛濤蜀中妓李治烏程女道士濤與元稹相倡和治亦嘗與劉禹錫游皆中唐人也書錄解題載薛濤詩一卷李治詩一卷今皆不傳此本皆後人鈔撮而成濤集中如聞道邊城苦一首兼載洪邁唐人萬首絕句計有功唐詩紀事楊慎升菴詩話之說一詩兩見又唐詩紀事之五離詩唐摭言之十離詩乃一事譌傳其文互異亦相連竝載其編輯頗爲詳慎附以補遺三篇又採摭濤傳及諸書所載事蹟考證亦殊賅備治集僅詩十四首然其中恩命追入留別唐陵故人一首詳其詞意不類治作殆好事者欲哀治詩與濤相配病其太少姑摭他詩足之也濤送友人及題竹郎廟詩爲向來傳誦然如籌邊樓詩曰平臨雲鳥八窗秋壯壓西南四十州諸將莫貪羌族馬最高層處見邊頭其託意深遠有魯嫠不恤緯染室女坐嘯之思非尋常韞屐所及宜其名重一時治詩以五言擅長如寄校書七兄詩送韓揆之江西詩送閻二十六赴剡縣詩置之大歷十子之中不復可辨其風格又遠在濤上未可以篇什之少棄之矣

【竇氏聯珠集五卷】兩江總督採進本 唐酉江褚藏言所輯竇常竇牟竇羣竇庠竇輩兄弟五人之詩人爲一卷每卷各有小序詳其始末常字中行官國子祭酒牟字貽周官國子司業羣字丹列官容管經略庠字胄卿官婺州刺史輩字友封官祕書少監皆拾遺叔向之子羣庠以薦辟餘皆進士科叔向有集一卷常有集十八卷見唐書藝文志今竝不傳此集五卷唐志亦著錄而宋時傳本頗稀故劉克莊後村詩話稱惜未見聯珠集此本爲毛晉汲古閣所刊末有張昭跋署甲子歲爲宋太祖乾德二年峴凝之子峴跋稱借鈔於致政大夫即張昭也又有淳熙戊戌王崧跋亦稱世少其本今刊諸公府蓋鈔寫流傳至南宋始有蘄州雕版耳最後爲毛晉跋引洪邁容齋隨筆及計有功唐詩紀事附載叔向詩九篇又補輩詩六篇不載於此集者褚藏言序稱牟羣庠輩之集並未遑編錄蓋遺篇散見者也又稱手錄唐書列傳於後而此本無之殆偶佚耶集中附載楊憑韓愈韋執中李益武元衡韋貫之劉伯翁韋渠牟元稹白居易裴度令狐楚諸詩蓋謝朓集中附載王融之例庠詩一首常詩一首亦附載牟集之中不入本集蓋古人倡和意皆相答不似後來之泛應必聚而觀之乃互見作者之意是亦編次之不苟耳

【才調集十卷】江蘇巡撫進採本 蜀韋穀編穀杜王建爲監察御史其里貫事蹟皆未詳是集每卷錄詩一百首共一千首自序稱觀李杜集元白詩而集中無杜詩馮舒評此集謂崇重老杜不欲芟擇然實以杜詩高古與其書體例不同故不採錄舒所說非也其中頗有舛誤如李白錄愁陽春賦是賦非詩王建錄宮中調笑詞是詞非詩皆乖體例賀知章錄柳枝詞乃劉采春女所歌非知章作其曲起於中唐知

章時亦未有劉禹錫錄別蕩子怨乃隋薛道衡昔昔鹽王之漢錄惆悵詞所咏乃崔鶯鶯霍小玉事之漢不及見實王漢作皆姓名譌異然頗有諸家遺篇如白居易江南贈蕭十九詩賈島贈杜駘馬詩皆本集所無又沈佺期古意高棟竄改成律詩王維渭城曲客舍青青楊柳春句俗本改爲柳色新賈島贈劍客詩誰爲不平事句俗本改爲誰有如斯之類此書皆獨存其舊亦足資考證也穀生於五代文敝之際故所選取法晚唐以禮讓宏敞爲宗救巖疎淺弱之習未爲無見至馮舒馮班意欲排斥宋詩遂引其書於崑體推爲正宗不知李商隱等唐書但有三十六體之目所謂西崑體者實始於宋之楊億等唐人無此名也

【搜玉小集一卷】江蘇巡撫採進本 不著編輯者名氏鄭樵通志已載之則其來舊矣舊目題凡三十七人詩六十三首此本但三十四人詩六十二首蓋毛晉重刊所釐定所註考證頗詳然胡鵠等三人有錄無詩晉并刪其姓氏已非闕疑存舊之意又人闕其三而詩僅闕其二不足分配三人必有一人之詩溷於他人名下矣則所訂亦未確也其次第爲晉所亂不可復考旣不以人敘又不以體分編次參差重出疊見莫能得其體例徒以源出唐人聊存舊本云爾

【古文苑二十一卷】兩淮馬裕家藏本 不著編輯者名氏書錄解題稱世傳孫洙巨源於佛寺經龕中得之唐人所藏所錄詩賦雜文自東周迄於南齊凡二百六十餘首皆史傳文選所不載然所錄漢魏詩文多從藝文類聚初學記刪節之本石鼓文亦與近本相同其真僞蓋莫得而明也南宋淳熙間韓元吉次爲九卷至紹定閒章樵爲之註釋明成化壬寅福建巡按御史張世用得本刊之樵序稱有首尾殘闕

者姑存舊編復取史冊所遺以補其數釐爲二十卷又有雜賦十四首頌三首以其文多不全別爲一卷附於書末共爲二十一卷則已非經龕之舊本矣中間王融二詩題爲謝朓蓋因附見朓集而誤又文木賦出西京雜記乃吳均所爲見段成式酉陽雜俎亦不能辨别則編錄未爲精核至柏梁一詩顧炎武日知錄據所註姓名駁其依託錢曾讀書敏求記則謂舊本但稱官位自樵增註妄以其人實之因啓後人之疑又如宋玉釣賦娟淵誤作元洲曹夫人書官綿誤作官錦皆傳寫之譌而註復詳爲之解王應麟困學紀聞亦辨之則註釋亦不能無失然唐以前散佚之文間賴是書以傳故前人多著於錄亦過而存之意歟據此書所題樵字升道臨安人以朝奉郎知吳縣事成化杭州府志則作昌化人知處州事宋詩紀事亦作昌化人其號曰峒麓嘉定元年進士歷官知漣海軍授朝散郎知處州蓋昌化即臨安屬縣此書舉其郡名處州乃所終官此書則其知吳縣時所註也

【文苑英華一千卷】御史劉錫嘏家藏本 宋太平興國七年李昉扈蒙徐鉉宋白等奉敕編續又命蘇易簡王祐等參修至雍熙四年書成宋四大書之一也梁昭明太子撰文選三十卷迄於梁初此書所錄則起於梁末蓋即以上續文選其分類編輯體例亦略相同而門目更爲繁碎則後來文體日增非舊目所能括也周必大平園集有是書跋稱太平御覽冊府元龜今閩蜀已刊惟文苑英華士大夫閒絕無而僅有蓋所集止唐文章如南北朝閒存一二是時印本絕少雖韓柳元白之文尙未甚傳其他如陳子昂張說張九齡李翹諸名士文籍世尤罕見故修書官於柳宗元白居易權德輿李商隱顧雲羅隱或全卷收入當真宗朝姚鉉銓擇十一號唐文粹由簡故精所以盛行近歲唐文摹印漫多不假英華而傳其不

行於世則宜云云。蓋六朝及唐代文集南宋初存者尙多故必大之言如是。迄今四五百年唐代詩集已漸滅於舊文集則宋志所著錄者殆十不存一即如李商隱樊南甲乙集久已散佚今所存本乃全自是書錄出又如張說集雖有傳本而以此書所載互校尙遺漏雜文六十一篇則考唐文者惟賴此書之存實爲著作之淵海與南宋之初其事迥異矣。書在當時已多譌脫故方崧卿作韓集舉正朱子作韓文考異均無一字之引證彭叔夏嘗作辨證十卷以糾其舛漏重複然如劉孝威紹古詞一收於二百三卷一收於二百五卷而字句大同小異者叔夏尙未及盡究也此本爲明萬曆中所刊校正頗詳在活字版太平御覽之上而卷帙浩繁仍多疎漏今參核諸書各爲釐正其無別本可證者則姑仍其舊焉。

【文苑英華辨證十卷】內府藏本 宋彭叔夏撰叔夏廬陵人自署曰鄉貢進士其始末未詳江西通志亦但列其名於紹熙壬子鄉舉條下不爲立傳蓋已無考矣是書蓋因周必大所校文苑英華而作考必大平園集有文苑英華跋曰孝宗皇帝欲刻江鈚文海臣奏其去取差謬不足觀乃詔館閣裒集皇朝文鑑臣因及文苑英華雖祕閣有本然舛誤不可讀俄聞傳旨取入遂經乙覽時御前置校正書籍一二十員往往妄加塗注繕寫裝飾付之祕閣頃嘗屬荆帥范仲藝筠倅丁介稍加校正晚幸退休求別本與士友詳議疑則闕之惟是元修書非出一手義理重複首尾衝決一詩或析爲二二詩或合爲一姓名差互先後顛倒不可勝計其中賦多用員來非讀秦誓正義安知今日之云字乃員之省文以堯圭對舜桀非讀本草註安知其爲菖蒲又如切磋之磋馳驅之驅挂帆之帆仙裝之裝廣韻各有側音而流俗改切磋爲效課以駐易驅以席易帆以仗易裝今皆正之詳註逐篇之下不復偏舉始於嘉泰初年至四年秋訖

工云云。是書之首亦有嘉泰四年叔夏自序稱益公先生退老邱園命以校讐考訂商榷用功爲多散在本文覽者難徧因薈粹其說以類而分各舉數端不復具載云云則必大所稱與士友詳議者蓋即叔夏故與必大校本同以嘉泰四年成書也所分諸類一曰用字爲目凡三二曰用韻爲目凡二三曰事證無子目四曰事誤爲目凡二五曰事疑無子目七曰人名爲目凡五八曰官爵爲目凡三九曰郡縣爲目凡三十曰年月爲目凡四十一曰名氏爲目凡三十二曰題目爲目凡二十三曰門類無子目十四曰脫文爲目凡四十五曰同異十六曰離合十七曰避諱十八曰異域十九曰鳥獸二十曰草木均無子目二十一曰雜錄爲目凡五其中如磾驅帆裝諸字與必大所舉者合然序文稱小小異同在所弗錄原註頗略今則加詳其未註者仍附此篇則視必大原本亦多所損益矣文苑英華本繼文選而作於唐代文章採摭至備號爲詞翰之淵藪而卷帙既富牴牾實多在宋代已無善本近日所行又出明人所重刊承訛踵謬抑又甚矣叔夏此書考核精密大抵分承譌當改別有依據不可妄改義可兩存不必遽改三例中如杜牧請追尊號表以高宗伐鬼方爲出尙書顯然誤記而叔夏疑是逸書未免有持疑不決之處然其用意謹嚴不輕點竄古書亦於是可見矣

【唐文粹一百卷】內府藏本 宋姚鉉編陳善捫蠡新話以爲徐鉉者誤也鉉字寶臣廬州人自署郡望故曰吳興太平興國中第進士官至兩浙轉運使事蹟具宋史本傳是編文賦惟取古體而四六之文不錄詩歌亦惟取古體而五七言近體不錄考阮閱詩話總龜載鉉於淳化中侍宴賦賞花釣魚七言律詩賜金百兩時以比奪袍賜花故事又江少虞事實類苑載鉉詩有疎鐘天竺曉一雁海門秋句亦頗清遠

則鉉非不究心於聲律者。蓋詩文儻偶皆莫盛於唐。盛極而衰。流爲俗體。亦莫雜於唐。鉉欲力挽其末流。故其體例如是。於歐梅未出以前。毅然矯五代之弊。與穆修柳開相應者。實自鉉始。其中如杜審言臥病人事絕一首。較集本少後四句。則鉉亦有所刪削。又如岑文本請勤政改過疏之類。皆文苑英華所不載。其蒐羅亦云廣博。王得臣麈史。乃譏其未見張登集。殊失之苛。惟文中芟韓愈平淮西碑。而仍錄段文昌作。未免有心立異。詩中如陸龜蒙江湖散人歌。皎然古意詩之類。一概收之。亦未免過求朴野。稍失別裁。然論唐文者。終以是書爲總匯。不以一二小疵掩其全美也。

【西崑酬唱集二卷】編修汪如藻家藏本

不著編輯者名氏。前有楊億序。稱卷帙爲億所分。書名亦億

所題。而不言哀而成集。出於誰手。考田況儒林公議。云楊億兩禁變文章之體。劉筠錢惟演輩從而效之。以新詩更相屬和。億後編敘之題曰西崑酬唱集。然則即億編也。凡億及劉筠錢惟演李宗諤陳越李維劉騷刁衍任隨張詠錢惟濟丁謂舒雅晁迥崔遵度薛晏劉秉十七人之詩。而億序乃稱屬而和者十有五人。豈以錢劉爲主。而億與李宗諤以下爲十五人歟。詩皆近體。上卷凡一百二十三首。下卷凡一百二十首。而億序稱二百有五十首。不知何時佚二首也。其詩宗法唐李商隱。詞取妍華。而不乏興象。效之者漸失本真。惟工組織。於是有優伶擇擣之戲。石介至作怪說以刺之。而祥符中遂下詔禁文體浮艷。然介之說蘇軾嘗辨之。真宗之詔緣於宣曲一詩。有取酒臨邛之句。陸游渭南集有西崑詩跋。言其始末甚詳。初不緣文體發也。其後歐梅繼作。坡谷迭起。而楊劉之派遂不絕如綫。要其取材博贍。練詞精整。非學有根柢。亦不能鎔鑄變化。自名一家。固亦未可輕詆。後村詩話云。西崑酬唱集對偶字面雖工。而佳句可

錄者殊少。宜爲歐公之所厭。又一條云。君僅以詩寄歐公。公答云。先朝劉楊風采聳動天下。至今使人傾想。豈公特惡其碑版奏疏。其詩之精工穩切者。自不可廢歟。二說自相矛盾。平心而論。要以後說爲公矣。其書自明代以來。世罕流布。毛奇齡初得舊本於江寧。徐乾學爲之刻版。以剞劂未工。不甚摹印。康熙戊子。長洲朱俊升。又重鐫之。前有常熟馮武序。馮舒馮班。本主西崑一派。武其猶子。故於是書極其推崇。然武謂元和大和之際。李義山傑起中原。與太原溫庭筠。南郡段成式。皆以格調清拔。才藻優裕。爲西崑三十六體。以三人俱行十六也。考唐書。但有三十六體之說。無西崑字。億序是集稱取玉山策府之名。題曰西崑酬唱集。則三十六與西崑各爲一事。武乃合而一之誤矣。

【同文館唱和詩十卷】浙江鮑士恭家藏本。宋鄧忠臣等撰。同文館本以待高麗使人。時忠臣等同考校。即其地爲試院。因錄同舍唱和之作。彙爲一編。案宋史藝文志。有蘇易簡禁林宴會集。歐陽修禮部唱和詩集。此書獨不著錄。宋志最爲舛漏。蓋偶遺之。其相與酬答者。忠臣而外。爲張耒晁補之。蔡肇余幹耿南仲商倚曹輔柳子文。李公麟孔武仲等。凡十一人。又有但題其名曰向曰益。而不著姓者二人。益疑即溫益。向則不知何人也。未補之肇。南仲公麟。武仲益。七人。宋史有傳。忠臣倚竝入元祐黨籍。惟幹子文行事不概見。輔亦非靖康時爲樞筦者。樓鑰誤合爲一。王應麟困學記聞已辨之矣。集中不著唱和年月。考宋史未補之傳。俱稱元祐初爲校書郎。以未詩贊書芝閣上。補之詩輒直贊書省。二語核之。乃正其官祿省時。而元祐三年知貢舉者爲孔平仲。事見本傳。此集竝無平仲之名。則非在三年可知。惟忠臣詩有單闕孟夏草木長句。自註云。丁卯四月還朝。丁卯爲元祐二年。意者即在是歲歟。又案輔詩云。九人同日鎖

重闡而子文又有毛遂未至空連房句註云同舍十九人余獨後入疑試官許先後入院宋制本自此時共事十九人而集中闕其八人蓋古人真樸不強爲其所不能如蘭亭修禊與會者四十一人有詩者僅二十六人非佚脫也諸家專集惟耒柯山集補之雞肋集武仲清江三孔集今尚存於世其餘如肇之丹陽集忠臣之玉池集已佚不傳其餘并有集無集亦不可考殘篇闕句實藉此以獲見一斑即有集諸人以集本校之亦頗互異如補之五言官醪持餉婦雞肋集官醪作宮壺七言詩似涼風淒有興句雞肋集淒有興作來有思此類頗多題目亦往往不相合亦未嘗不藉爲參訂之助矣

【唐百家詩選二十卷】內府藏本 舊本題宋王安石編安石有周禮新義已著錄是書去取絕不可解自宋以來疑之者不一曲爲解者亦不一然大抵指爲安石惟晁公武讀書志云唐百家詩選二十卷皇朝宋敏求次道編次道爲三司判官嘗取其家所藏唐人一百八家詩選擇其佳者凡一千二百四十六首爲一編王介甫觀之因再有所去取且題曰欲觀唐詩者觀此足矣世遂以爲介甫所纂其說與諸家特異案讀書志作於南宋之初去安石未遠又晁氏自元祐以來舊家文獻緒論相承其言當必有自邵博聞見後錄引晁說之言謂王荊公與宋次道同爲羣牧司判官次道家多唐人詩集荊公盡即其本擇善者籤帖其上令吏鈔之吏厭書字多輒移所取長詩籤置所不取小詩上荊公性忽略不復更視今世所謂唐百家詩選曰荊公定乃羣牧司吏人定也其說與公武又異然說之果有是說不應公武反不知考周煥清波雜志亦有是說與博所記相合煥之曾祖與安石爲中表故煥持論多左袒安石當由安石之黨以此書不憾於公論造爲是說以解之託其言於說之博不考而載之耳此本爲宋乾道中倪仲

傳所刊前有仲傳序其書世久不傳國朝康熙中商邱宋犖始購得殘本八卷刻之既又得其全本續刻以行而二十卷之數復完當時有疑其僞者閻若璩歷引高棟唐詩品彙所稱以元宗早渡蒲關詩爲開卷第一陳振孫書錄解題所稱非惟不及李杜韓三家即王維韋應物元白劉柳孟郊張籍皆不及以證其真又殘本佚去安石原序若璩以臨川集所載補之其文俱載若璩潛邱劄記中惟今本所錄共一千二百六十二首較晁氏所記多十六首若璩未及置論或傳寫讀書志者誤以六十二爲四十六歟至王昌齡出塞詩諸本皆作若使龍城飛將在惟此本作盧城飛將在若璩引唐平州治盧龍縣以證之然唐三百年更無一人稱盧龍爲盧城者何獨昌齡杜撰地名此則其過尊宋本之失矣

【會稽掇英總集二十卷】浙江鄭大節家藏本
宋孔延之編前自有序首題其官爲尙書司封郎中知越州軍州事浙東兵馬鈐轄末署熙寧壬子五月一日越州清思堂案施宿嘉泰會稽志延之於熙寧四年以度支郎官知越州五年十一月召赴闕壬子正當熙寧五年其歲月與會稽志合惟志稱延之爲度支郎官而此作司封郎中集中有沈立等和蓬萊閣詩亦作孔司封集爲延之手訂於官位不應有誤知施宿所記爲譌也延之以會稽山水人物著美前世而紀錄賦詠多所散佚因博加搜採旁及碑版石刻自漢迄宋凡得銘志歌詩等八百五篇輯爲二十卷各有類目前十五卷爲詩首曰州宅次西園次賀監次山水分蘭亭等八子目次寺觀分雲門寺等四子目而以祠宇附之次送別次寄贈次感興次唱和後五卷爲文首曰史辭次頌次碑銘次記次序次雜文書中於作者皆標姓名而獨稱王安石爲史館王相蓋作此書時王安石柄政之際故有所避而不敢直書歟所錄詩文大都由搜巖剔藪而得之故多出名

人集本之外爲世所罕見。如大歷浙東唱和五十餘人。今錄唐詩者或不能舉其姓氏。實賴此以獲傳。其於唐宋太守題名壁記皆全錄原文。以資考證。裨益良多。其蒐訪之勤可謂有功於文獻矣。其書世鮮流傳。藏弆家多未著錄。此本乃明山陰祁氏淡生堂舊鈔。在宋人總集之中最爲珍笈。其精博在嚴陵諸集上也。

【清江三孔集四十卷】兩江總督採進本 宋新喻孔文仲。及其弟武仲平仲之詩文。慶元中臨江守王蓮所編也。文仲字經父。嘉祐六年進士。官中書舍人。武仲字常父。嘉祐八年進士。官禮部侍郎。平仲字毅父。治平二年進士。官金部郎中。事蹟具宋史本傳。文仲兄弟與蘇軾蘇轍同時。並以文章名一世。故黃庭堅有二蘇聯璧。三孔分鼎之語。南渡後遺文散佚。蓮始訪求而刻之。前有慶元五年周必大序。陳振孫書錄解題。稱文仲二卷。武仲十七卷。平仲二十一卷。與此本合。文仲詩僅七首。然呂祖謙宋文鑑載其早行古詩一首。乃佚而不收。文鑑編於孝宗淳熙四年。舍人集編於寧宗慶元四年。在其後二十一年。不應不見。豈蓮有所去取耶。武仲侍郎集。青詞齋文同題曰制於例未安似非原目。平仲郎中集中。古律詩外別出詩戲三卷。皆人名藥名回文集句之類。蓋仿松陵集雜體別爲一卷例也。案王士禎居易錄載宋寧寄三孔文集通僅五卷。惜其已非慶元之舊。士禎寧皆家富圖籍。而所見尙非完帙。則此本歸然獨全。亦深足寶重矣。

【三劉家集一卷】江西巡撫採進本 宋劉渢。劉恕。劉義仲撰。渢字凝之。筠州人。登天聖八年進士。爲潁上令。以太子中允致仕。恕渢之子。有通鑑外紀。義仲恕之子。有通鑑問疑。並已著錄。渢祖孫父子並剛直。

有史才而恕最優。司馬光稱其博聞強記，細大之事皆有稽據。誠公論也。是集爲咸淳中其裔孫御史元亨所輯。蓋南宋之末已無傳本。僅掇拾於殘闕之餘。故渙僅詩四首文二首。恕僅通鑑外紀序一首。併其子所記通鑑問疑。義仲僅家書一首。餘皆同時諸人唱和之作。及他人之文。有關於渙父子者也。其中稱渙曰西澗先生。稱恕曰祕丞。稱義仲曰檢討。固其子孫之詞。至於諸人詩文標題。一概刪去其稱字之文。而改曰西澗先生祕丞檢討。則非其實矣。是其編次之陋也。至明萬安貪鄙無恥。爲世僇笑。而獨存其一跋於卷末。渙父子祖孫豈藉是人以表彰乎。今刊除之。俾無爲三人玷焉。

【二程文集十三卷附錄二卷】江西巡撫採進本 宋明道程子伊川程子合集也。陳振孫書錄解題載明道集四卷。遺文一卷。伊川集一本二十卷。一本九卷。又河南程氏文集十二卷。二程共爲一集。爲建寧所刻本。是宋世所傳。已參錯不同。此本出自胡安國家。劉珙張栻嘗刻之長沙。安國於原文頗有改削。如定性書明道行述。上富公謝帥書。中刪落至數十字。又辭官表顛倒次第。易傳序改泓爲泲。祭文改姪爲猶。子珙等所刻。一以安國爲主。朱子深以爲不可。嘗以書抵珙及栻。盛氣詬爭。辯之甚力。具載晦菴集中。然二人迄不盡用其說。蓋南宋之初學者猶各尊所聞。不似淳祐以後。門戶已成羽翼。已眾於朱子之言。一字不敢異同也。元至治閒。臨川譚善心重爲校刊。始與蜀人虞槃商榷考訂。悉從朱子所改。其定性書富謝二書所刪字亦求得別本補足。又搜輯程子遺文十六篇。遺事十一條。竝朱子論胡本錯誤諸書。別爲二卷。附之於後。惟伊川詩僅有三章。河南府志載其陸渾樂游詩云。東郊漸微綠。驅馬欣獨往。舟繁野渡時。水樂春山響。身閒愛物外。趣逸諸心賞。歸路逐樵歌。落日寒山上。集中無之地。志率多假借名人。以

誇勝蹟。其殆好事者所依託歟。

【宋文選三十二卷】浙江巡撫採進本 不著編輯者名氏。案張邦基墨莊漫錄稱崔伯易有金華神記。編入聖宋文選後集中。則此乃其前集。在南渡以前矣。所選皆北宋之文。自歐陽修以下十四人。惟取其有關於經術政治者。詩賦碑銘之類不載焉。中無三蘇文字。而黃庭堅張耒之文則錄之。豈當時蘇文之禁最嚴。而黃張之類則稍寬歟。又其中無二程文。蓋不以文士目之也。何焯義門讀書記跋。所校元豐類彙後曰。己卯冬於保定行臺案。焯是時在直隸巡撫李光地署中。閱內府所賜大臣古文淵鑒。有在集外者六篇。則書魏鄭公傳邪正辨說。再上田正言書。上歐蔡書也。後知立齋相公案。立齋爲大學士徐元文之別號。有建本聖宋文選數冊。其中有南豐文二卷。嘉善柯崇樸借鈔。遂傳於外。此六篇者。皆在焉。云云。案書魏鄭公傳後一篇。宋文鑑亦載。不僅見於此集中。焯蓋考之未審。然南豐外集續彙。今竝不傳。其佚篇。惟賴此集以存。蓋亦不爲無功矣。宋人選宋文者。南宋所傳尚夥。北宋惟此集存耳。其貶備雖不及文鑑。然用意嚴慎。當爲能文之士所編。尤未可與南宋建陽坊本出於書賈雜鈔者。一例視之也。

